





DE
DIFFERENTIA
NEXVS RERVVM
SAPIENTIS ET FATALIS
NECESSITATIS,

NEC NON
SYSTEMATIS HARMONIAE
PRÆSTABILITÆ ET HYPOTHESIVM
SPINOSAE
LVCVLENTA COMMENTATIO,
IN QVA SIMVL
GENVINA DEI EXISTENTIÆ DEMONSTRANDI
RATIO EXPENDITVR

ET
MVLTÆ RELIGIONIS NATVRALIS CAPITA
ILLVSTRANTVR.

AVTORE
CHRISTIANO WOLFIO,
POT. REG. SVECORVM, HASSIAE LANDGRAVII, CONSILIARIO
REGIMINIS, MATHEMATVM ET PHILOS. PROF. PRIMARIO IN
ACADEMIA MARBVRGENSI, PROFESS. PETROPOLITANO
HONORARIO, ACADEMIAE REGIAE SCIENT. PARIS.
ATQVE SOCIET. REG. BRIT. ET BOR.
MEMBRO.

EDITIO SECVNDA.

HALAE MAGDEB. MDCCXXXVII.
PROSTAT IN OFFICINA RENGIERIANA.

VIRIS

*SVMME REVERENDIS, EXCELLENTISSIMIS,
NOBILISSIMIS ATQVE DOCTISSIMIS*

**DN. DANIELI ERNESTO
JABLONSKY,**

**S.S THEOL. D. CONCIONATORI AVLICO PRIMARIO,
CONSISTORII CONSILIARIO, SOCIETATIS REGIÆ SCIEN-
TIARVM PRO-PRÆSDI, ECCLESIA RV M EVANGE-
LICO-REFORMATARVM PER POLONIAM
SENIORI**

**DN. HENRICO AVGVSTO
Steinberg,**

**CONCIONATORI AVLICO ET DIRECTORII EC-
CLESIASTICI EVANGELICO - REFORMATI
CONSILIARIO.**

DN. ERNESTO ANDREÆ,

**S. S. THEOLOGIÆ DOCTORI ET CONCIONATORI
AVLICO.**

**DN. JOANNI ARNOLDO
NOLTENIO,**

**S. S. THEOLOGIÆ DOCTORI ET CONCIONA-
TORI AVLICO.**

**DN. JOANNI WAREN-
DORFFIO,**

CONCIONATORI AVLICO.

PATRONIS ET FAVORIBVS

OMNI OBSERVANTIÆ CVLTV

VENERANDIS.

VIRI SYMME ET MAXIME REVERENDI.



Tsi omnia in universum dogmata metaphysica subtilitate, sublimitate, profunditate cetera vincant, ut ad ea evolvenda & e tenebris in apricum producenda opus sit acumine ac ingenio, ad rationis trutinam summa accuratione singula exigere nato: inter ea tamen in Metaphysica generali eminet doctrina de necessario & contingente, quam maxima ingenia magis intricantes, quam extricantes, cum notiones communes rationi conciliare non possent, in fatalem rerum necessitatem prolapsi sunt; in speciali autem commercium inter mentem & corpus caput altum extollit, nodus Gordius philosophis visum, quorum

rum acutissimi eum non solventes, sed secantes eo tandem audaciæ progressi sunt, ut alterutrius substantiæ existentiam negantes, alii idealismum, alii materialismum defenderent. Equidem non probo vanas & injustas illorum vociferationes, qui ex quovis errore in metaphysicis admisso atheismi quoddam crimen exculpant, immo, ut exculpere possint, veritatem in errorem vertunt, ne desit, contra quod dictatoria quadam auctoritate declament; operam tamen dandam esse existimo, ut veritati suus constet honos, & ne ex errore periculum immineat incautis. Ea igitur fini in meditationibus meis metaphysicis difficillimam quoque de contingente & necessario, itemque de commercio inter mentem & corpus doctrinam enodavi, usus inter alia luminibus viri etiam post fata summi LEIBNITII, quæ in præclaro Theodicæ opere his argumentis affudit. Neque enim Cel. FONTENELLIVM (a) a vero aberrare, quando hunc rei literariæ heroem Theologum in sensu strictiori appellat, qui in lectione Patrum & Scholasticorum multum versatus dissensum in Theologia intimius perspexerit, vobis, Viri summe & maxime Reverendi, abunde constat, quos minime fugit, ob rerum theologicarum intimiorem peritiam & animum in judican-

(a) Hist. de l'Acad. Roy. des Scien. A. 1716. p. 145. edit. Bat.

dicando ab omni adfectuum impetu liberrimum, a Monarcha quodam potentissimo, dignum habitum fuisse LEIBNITIVM, qui in condendo corpore doctrinæ ad Protestantés inter se conciliandos socias operas præstaret, commendatione dubio procul Theologorum, quos doctrina & virtus commendabat. Quamvis adeo arma attulerim, quibus opinionum in metaphysicis monstra debellari datur magno in Theologiam christianam emolumento, id quod etiam agnoverunt viri Theologi trium in imperio stabilitarum religionum, ne Pontificiis quidem exceptis; hoc tamen non obstante, postquam altera operis editio fere consenuit, sparsi sunt rumores magna temeritate nec improbitate minori publice disseminati, quasi dogmata mea metaphysica de Deo, anima & mundo ex SPINOSA hausta sint, & religioni cum naturali, tum christianæ, omni etiam morali ac civili doctrinæ interitum minentur. Equidem hæc nulla veri specie affirmantur; nec ullum famæ periculum metuo ex accusatione, quæ nimis manifesta mali in me animi indicia prodit; attamen ne inde in academiam, in qua doctor publicus cum applausu profiteor, quæ titulis adeo odiosis onerantur, aliquod redundet detrimentum, malevolis in rem suam abutentibus accusa-

cusatione injusta, clamores istos quam primum retundi fas fuit. In præsentī igitur commentatione clarissime monstravi, me communes Theologorum notiones adversus SPINOSAM stabilire, recepta dogmata demonstrativa quadam ratione deducta erroribus ejus opponere, nec minima veri specie invito imputari consequentias, quibus anthropomorphistæ magnitudinem Dei extollentibus infensi delectantur. Vobis autem, Antistites Venerandi, commentationem istam offero, tum quod acumine polleatis ad has controversias dijudicandas, tum quod candore præditi non imputetis autoribus consequentias, quas & ipsimet detestantur, & ex suis dogmatis non fluere ostendunt, tum quod vera in Deum pietate usi detestemini illorum artes, qui hæreseos reos agunt, ut sibi quodvis in eos licere argutari queant, tum quod propria experientia edocti noveritis illorum genium, qui consequentias horridas ex proprio ingenio effectas cumulant, ut ab anthropomorphismo alienorum sententias imperitis execrabiles sistant. Accipite igitur, quod vobis offero, munus literarium serena fronte, Viri de ecclesia Christi & orbe literario meritissimi, meque favore vestro dignamini. Dabam in Academia Fridericiana die X, Augusti
A. O. R. MDCCXXIII.



DE DIFFERENTIA NEXVS
RERV M SAPIENTIS ET FATALIS
NECESSITATIS, NEC NON SYSTEMATIS
HARMONIÆ PRÆSTABILITÆ ET HYPO-
THESIV M SPINOSÆ,
LVCVLENTA COMMENTATIO.

SECTIO I.

DIFFERENTIAM NEXVS RERV M
SAPIENTIS ET FATALIS NECESSITATIS
LVCVLENTER EXPONIT.

§. I.



Vamprimum animum, tyrociniis depo-
sitis ad studendum appuli, sententia-
rum in Philosophia & Theologia di-
vortia magnopere displicuerunt. Nec
multum aberam a studiorum fastidio,
quibus ab utero devotus fueram, nisi
mature monitus fuisset, veterum Geo-
metrarum *Euclidis*, *Archimedis*, *Apol-
lonii*, *Theodosii* dogmata extra omnem controversiæ aleam
posita esse, nec in aliorum Mathematicorum scriptis abesse
veritates, quæ summa evidentia adsensum vel invito extor-

*Meta studi-
orum Auto-
rit.*

(DIFFER. NEX. RER.)

A

que-

queant, quamprimum intelliguntur. Spem igitur concipiebam haud exiguam fore, ut evidentiae rationes mihi innotescerent, si Mathematicorum demonstrationes sollicitius rimarer atque inde a specie ad genus argumentaturus generales demonstrandi regulas abstraherem. Cumque insuper intelligerem, habere Mathematicos Artem inveniendi veritates ad forum suum spectantes, quæ *Algebrae* nomine celebretur, me inde generalia inveniendi artificia abstracturum confidebam. Atque his rationibus permotus magno Matheseos & *Algebrae* inprimis addiscendæ desiderio flagrabam & in *Academiâ* profectus, ut idem explerem, omnem lapidem movebam. Nec incassum cecidit labor: etenim in methodo cognoscenda mire proficiebam & mox luce inexpectata collustratus clarissime perspiciebam, unde omnis in disciplinis confusio ortum trahat. Animadvertēbam enim, deesse notiones distinctas, deesse demonstrationes, deesse ordinem, quo veritates concatenato nexu copulantur. His igitur malis medelam allaturus mihi proposui ad maiorem certitudinis gradum evehere disciplinas philosophicas, Theologiam inprimis naturalem & Philosophiam practicam, ut non haberent homines profani, quod contra religionem naturalem ac veram morum honestatem objicerent.

§. II.

Quid in Metaphysicis præstiterit,

Hunc ut adsequerer scopum, attuli animus ad laborem sane arduum ab omni affectuum impetu vacuum & veritatis solius cupidum, nihil pro certo assumens, nisi intime convictus, nec tanquam erroneum rejiciens, nisi manifestam cum principiis rationis contradictionem adsecutus. Religionis igitur naturalis fundamenta solida ac inconcussa positurus (quæ enim divinitus revelata fide amplectimur, ea rationis iudicio non subsunt, sed ejus sphaeram transcendunt), a primis notionibus ordiendum esse duxi. Atque hinc enatum est opus metaphysicum, quod de Deo, anima & mundo ac ente in universum publici juris feci, magno applausu ab eruditis exceptum, ut mox altera editione fuerit opus. In

co

eo enim notiones distinctas exhibui terminorum generalium, qui in Ontologia hætenus magna obscuritate sepulti fuerunt: distinctam tradidî mentis humanæ cognitionem & omnes ejus facultates a priori ex unico conceptu deduxi, quod antea nemo fuerat ausus: novam quandam disciplinam concedere cepi, quam *Cosmologia transcendentalis* nomine compellare soleo, in qua veritates maxime arduæ de universo materiali explicantur, ad mentis humanæ naturam intimius cognoscendam, & de Deo ex lumine rationis accuratoria ratiocinia contexenda adprime utiles; theologiam denique naturalem methodo demonstrativa concinnavi, ita ut ex definitione Numinis, in subsidium vocatis principiis in Ontologia, Pneumatica, Cosmologia transcendentali stabilitis, concatenata serie attributa divina derivaverim. Dudum mihi cognitum atque perspectum est, præstantissimos Theologos trium in imperio stabilitarum religionum & inter hos quoque plurimum Reverendos Patres Societatis Jesu principia mea sana & doctrinis Theologorum conformia agnoscere, qui nempe potestatem terminorum recte evolvunt & catenas ratiociniorum summa attentione persequuntur: id quod ad Systema intelligendum necessarium esse, Theologus æquitatis non minus, quam variæ eruditionis laude celeberrimus *Christophorus Matthias Pfaffius* (a) cum intelligentibus & cordatis judicat,

§. III.

In demonstranda existentia Dei usus sum argumento *Notanda de a contingentia hujus universi petito*: unde apparet, cur in argumento, ejus gratiam tractationem de universo præmiserim. A con-quo *Autor* tingentia universi ad existentiam Numinis argumentatus et-utitur *ad* iam fuit *D. Thomas*, quem ecclesia Romana *Doctoris Angelici Dei existentiæ*, Theologi nostrates *Confessoris veritatis* elogio ornant, & tiam decum ipso alii, quamvis non eadem evidentia, qua ego usus monstranfui. Quod enim argumentum hoc multo magis evolverim, dum.

A 2

atque

(a) In Nota 1 ad Orationem de Egoismo p. 12. 13.

atque ad maiorem certitudinis gradum evexerim, quam ab aliis hactenus factum, nemo negabit, qui meas meditationes metaphysicas hac in parte cum aliorum scriptis contulerit. Ceterum *via contingentiae* in demonstranda Numinis existentia adeo nota Philosophis & Theologis, ut etiam compendiis Theologiae naturalis ac revelatae inserta fuerit. Sane ex nostratibus Summe Reverendus Abbas *Schmidius*, cum adhuc in Academia Jenensi philosophiam profiteretur, huic viae inter argumenta, quibus existentia Dei a posteriori probatur, in Theologiae naturalis compendio p. 44. locum fecit &, quod *D. Thomas* de eadem suo modo proponit, ex ipsius summa Theologiae adducit. Inter Theologos ecclesiae Romanae R. D. *Ludovicus Carbo a Cossaciario* in Compendio totius Summae Theologiae *D. Thomae Aquinatis* part. 1. quaest. 2. art. 3. n. 3. p. 4. idem argumentum urget. Et recentius *Johannes du Hamel*, Socius Sorbonicus & in Academia Parisiensi Professor in Philosophia universali Tom. 3. p. 187. & 188. eidem argumentandi rationi suo modo insistit. Enimvero quod ego argumentum, ab aliis obscurius propositum nec sufficienter extensum, in majori luce constituerim & ultra limites, qui iusto arctiores praefigebantur, produxerim, ut novam prorsus formam induerit ac acumine opus sit, quo agnoscat; id potissimum causae subest, quod ad principium rationis sufficientis ante *Leibnitium* non satis expensum animum adverterim, atque methodi rationem diligentius habuerim. Vir acumine praestans *Bülfingerus*, Philosophus in Academia Tubingensi clarissimus, argumentum meo modo evolutum vel ideo venerabile vocat (b), quod sacri codicis auctoritate approbatum est, quod rigorem demonstrationis PRÆ CETERIS optime sustinet, quod & attributis Dei cognoscendis accommodum est, quod fecundam corollariis etiam praedictis

Dei

(b) In Commentatione de harmonia animi & corporis humani maxime praestabilita sect. 7 §. 255. p. 246. not. h.

Dei notitiam animo ingenerat. Erit forsan, qui mirabitur, quod argumentum a me propositum sacri codicis auctoritate approbatum dicatur. Atat intelligentibus in aprico posita est ratio! Apostolus Rom. I. 20. ex versione vulgata: Invisibilia Dei a creatura mundi per ea quæ facta sunt intellecta conspiciuntur, sempiterna quoque ejus virtus & divinitas. Quæ verba hac paraphrasi effert doctissimus Hammonius Tom. 2. novi fœderis f. 8. ex editione Cel. Clerici Amstelodamensi A. 1705. quæ per se sub oculos non cadunt, infinita Numinis potentia ac divinitas, quæ semper a creatione mundi oculos fugerunt; ea tamen in varia ejus rerum humanarum administratione & mundi totius gubernatione tanquam in speculo conspecta jam manifesto cernuntur. Quicquid sit, omnes in eo consentiunt, virum divinitus afflatum his verbis affirmare: universum rerum materialium esse speculum existentia ac perfectionum divinarum, ita ut in ejus contemplatione occurrant, unde Numinis existentiam & perfectiones arguere possis. Et hunc quoque sensum clarissime fundit versio B. Lutheri germanica. Enimvero quanam sint illa, unde existentia, unde sapientia, unde omniscientia, unde omnipotentia, unde bonitas, unde perfectiones ceteræ arguantur, speciatim minime persequitur Apostolus, nec modum arguendi distinctus exponit: neque enim diuina revelatione doceri opus erat, quæ recto rationis usui subsunt. Quodsi igitur quidam fuerint, qui circa modum arguendi in diversas abeunt sententias, illi haud quaquam de veritate divinitus revelata, sed de hypothesebus philosophicis inter se decertant. Cum ego assertum Apostoli divinum tanquam veritatem indubiam semper amplexus fuerim, a diversis tamen existentia divina a posteriori petitis ostensionibus, ut par est, distinxerim; in his, quæ rationi dijudicanda ab ipsis scriptoribus sacris relinquuntur, in aliorum auctoritate acquiescere recusans proprio Marte inquirendum esse duxi, quale Speculum perfectionum divinarum exhibeat universum.

A 3

At-

Atque eum in finem institui contemplationem universi generalem, quam *Cosmologiam metaphysicam* seu *transcendentalem* appellare soleo atque in meditationibus metaphysicis c. 4. quantum instituti ratio postulat, exposui, pluribus in alium locum aliudve tempus reservatis (c). Deprehendi autem universum hoc esse speculum existentiae divinae vi contingentiae suae cum in corporum actu, tum in legibus naturae motus obviae, unde rerum eventus pendent. Idem esse speculum infinitae scientiae Numinis vi nexus rerum & harmoniae universalis: esse speculum sapientiae divinae vi finium rebus naturalibus praestitutorum & eorundem nexus a necessitate absoluta & fatali liberi: esse speculum potentiae vi contingentiae & actus ad eam relati & ita porro. Quae singula alibi a me distinctius demonstrantur (d). Atque haec est ratio, cur a contingentia ad Dei existentiam argumenter, non a nexu rerum & harmonia qua tali, non a finibus, non ab ordine &, si quae alia in contemplatione universi generalia occurrunt, quorum ratio in attributis divinis tanquam primis possibilibus terminatur. Pervidit haec utique acutissimus *Büttsingerus*, etsi me tantum Doctore in Mathesi usus fuerit, ac ideo non ex praecipitantia, sed cum ratione argumentum a me pro existentia Dei altarum sacri codicis auctoritate approbatum pronunciat. Hujus enim auctoritate, ut modo vidimus, constat, universum esse speculum perfectionum divinarum & intuendo hoc speculum in Numinis cognitionem nos penetrare debere. Sed ego eam animo concepi universi ideam & existenti conformem probavi in meditationibus meis metaphysicis, ut inde demonstrativa quadam ratione non modo existentia, verum

- (e) Steti promissis in *Cosmologia generali methodo scientifica pertractata*, A. 1731. primum edita, sed A. 1736. Veronae recusa,
 (d) Nimirum in *Tractatu Germanico von den Absichten der natürlichen Dinge* part. I. c. 2. Sed multo uberius in *Theologia naturali* §. 798 & seqq.

verum etiam attributa Numinis reliqua consequantur, atque sic perfectiones summas in hac idea universi veluti in speculo contueamur.

§. IV.

Vulgo non satis discernitur, quomodo universum existentiae necessariae Numinis, quomodo sapientiae, quomodo omniscientiae, quomodo potentiae speculum referat, hoc est, non distinguuntur ea, unde existentia Numinis inferri debet, a ceteris, unde ejus sapientia, omniscientia, potentia &c. arguitur. Sed cum (quæ Dei gratia est) eo acumine polleam, ut hæc distinguere possim, quis jure succensebit, quod videns cæcutire nolim & aliorum acumen meo juvem, cum in his faciam quod officii est? Ego jam ante plures annos rationes publice reddidi (e), cur viam contingentiae ceteris argumentis, quæ pro existentia Dei afferri solent, prætulerim, nimirum cum præ ceteris, si rite incedamus, rigorem demonstrationis optime sustineat: id quod etiam Cl. Büttfingerus adsecutus (§. 3.). Ostendi enim, quæ in ceteris occurrant difficultates, obstantes utique, ut vel nonnisi multis ambagibus, atque sic difficilius quam a nobis factum est, vel prorsus non summum in demonstrando rigorem consequaris, empædis tandem nescio in qua judicii valentia sibimet applaudentibus os tandem obturaturum, si in arenam descendant. Neque ego primus sum, vel solus, qui eas pervidit. Quotusquisque enim Philosophorum atque Theologorum est, qui non agnoverit, omnes has vias, quas pro existentia Dei demonstranda commendant, non esse æque efficaces, cum quædam moralem saltem ingenerent certitudinem, quædam magis, quædam minus urgeant, quædam pluribus, quædam paucioribus atheorum exposita sint objectionibus? Sane, quæ adduxi verba sunt Theologi multa eruditionis ac singularis moderationis laude dudum clarissimi, ipso senio nunc venerabilis, Summe Reverendi Abbatis Schmidii f). Quæ igitur hic

(e) In Ratione Prælectionum Sect. 2. c. 2. §. 37. & seqq.

(f) In Theologia naturali positiva part. 1. Sect. 1. §. 6. p. m. 50.

hic in genere dicuntur; ego expressius docui, indicans ea, quæ ulteriorem demonstrationem, quæ limitationem quandam postulant, ut maiorem morali certitudinem nanciscantur, nec atheorum exceptionibus amplius aliquis sit locus. *Joannes Museus*, acerrimi iudicii Theologus, in *rationibus & argumentis & rebus creatis de Deo deductis, sæpe difficultatem baud exiguam latere & facile admissi errorem* iudicat (g), cum animum requirant artibus ac disciplinis bene excultum (h). Atque ea in re sequitur D. *Thomam* (i) ita statuentem: *Veritas de Deo per rationem investigata a paucis & per longum tempus & cum admissione multorum errorum homini provenit*. Dum ego errores in demonstranda existentia Dei commissos indicavi, dum rationes cur difficilis sit hac vel ista ratione instituta demonstratio enumeravi, dum quibus artibus ac disciplinis excultus esse debeat animus demonstratoris particularim monstravi; quid amabo! aliud egi, quam ut Summorum in ecclesia Doctorum iudicium statuinarem? Argumentum meum a contingentia universi ad existentiam entis necessarii sive Dei procedens cur obscuritatis insimules non est. Cum enim totum universum, propterea quod contingentium in numero habetur, rationem existentiae in se nullam habeat; inde existentiam entis necessarii infero, quod rationem sufficientem existentiae hujus universi contineat, atque ens necessarium ita concipiendum esse probo, ut eorum, quæ in universo notantur nec in eodem rationem habent, sufficientem contineat rationem. Sic Cosmologia metaphysica, non imprudenti consilio Theologiae naturali a me præmissa, ad perfectiones divinas absolute summas agnoscendum instar fidissimi comitis manu duxit. Nemo hic obscuritatem obtendet, nisi qui vel acuminis proprii de-

(g) In Introductione in Theologiam de distinctione Theologiae in naturalem & revelatam c. 1. §. 13. p. 38.

(h) loc. cit. p. 39.

(i) in Summa Theologiae part. 1. quæst. 1. art. 1.

defectum fateri nolit, vel simulationum involucri conquirat, quibus desidiā tegat. Si quis vero præfracte contendat, in autoritate omne præsidium collocans, ceteras vias, quæ in datione Prælectionum a me notantur, & claritate vincere eam, quam ego elegi, & animum magis convincere; ei per me integrum esto, ut mea contemnat &, si quoddam inde solatium capit vel in eo ad tuendam autoritatem pondus quoddam invenit, prorsus damnet, certissime persuasus me hæc æquissimo animo laturum, quamdiu ab insidiis abstinebit. Pulchre in rem nostram, paucis mutatis, loquitur *Keplerus*, sagacissimi mortalium elogio dudum cohonestatus (k): *Qui hebetior est, quam ut philosophicam scientiam capere possit, vel infirmior, quam ut inoffensa pietate Philosopho credat: ei suadeo, ut missa scibola philosophica, damnatis etiam si places Philosophorum quibuscunque placitis suas res agat & ab hac peregrinatione mundana desistens domum ad agellum suum excolendum se recipiat, oculisque, quibus solis videt, in hoc ad præstabile cælum sublati soto pectore in gratiarum actionem & laudes Dei conditoris effundatur, certus se non minorem Deo cultum præstare quam Philosophum, cui Deus hoc dedit, ut mentis oculo perspicacius videat.* Neminem, puto, offendent verba *Kepleri*: de argumentis enim philosophicis & eorum forma sermo est, quorum utique ad Philosophiam spectat dijudicatio.

§. V.

Ceterum ne temere censuisse videar, quod censu-
ram non merebatur, utque appareat me non ex præcipi-
tanta statuere, antequam ad trutinam expenderim, de quo
est statuendum, præsertim ubi de re maximi momenti, qua-
lis est Numinis divini existentia, agitur; in gratiam in-
telligentium clarius edisseram, unde sit, quod nonnullis ar-
gumentis, quæ pro existentia Dei a conditione universi pe-
(DIFFER. NEX. RER.) B tun-

(k) In Introductione ad Commentarium de stella Martis.

runtur, tantum insit certitudo moralis & cur nonnullæ per ambages ad existentiam Dei perducant. Tenendum itaque, mundum non esse speculum existentia divina nisi vi contingentia, qualem ego in meditationibus meis metaphysicis definio, hoc est, non dari in universo generatim expenso quicquam præter contingentiam, unde ad Dei existentiam firmo mentis ratiocinio assurgere valeas. Etsi enim objicias, harmoniam præstabilitam inter mentem & corpus demonstrativa ratione arguere existentiam Numinis, nec me ea in re dissentientem habeas: attamen attentius arguendi modum considerans clarissime videbis, cur hinc existentia divinitatis inferatur, non aliam subesse rationem, quam contingentiam actus. Quod si enim hæc harmonia necessaria esset quoad actum, fieri sane haud quaquam posset, ut divinitatis existentia inde concluderetur. Qui ad alios divinitatis characteres in universo expressos animum advertunt, non hinc existentia, sed aliorum attributorum divinorum ideam nanciscuntur, atque sic per ambages ab hoc attributo ad existentiam demum pervenire debent, si quidem plena demonstratione scrupulosioribus veritatis indagatoribus satisfacere velint. Illud quidem fieri potest propter nexum attributorum divinorum inter se, vi cujus ab uno ad alterum argumentari licet, adeoque etiam ad existentiam necessariam, quæ inter attributa divina suum quoque tuerur locum, quemadmodum e. gr. a ternario numero laterum in triangulo ad ternarium angulorum numerum & ab hoc ad istum, itemque a ternario numero angulorum trianguli rectilinei ad eorundem cum duobus rectis æqualitatem & ab hac æqualitate ad ternarium numerum in Geometria elementari argumentatio procedit, aut in sublimiori semiordinata rectangulo abscissa in constantem potentia æquali ad subnormalem constantem & vicissim ab hac ad istam certo semper argumento concluditur. Quod si ergo ex contemplatione universi acquisiveris e. gr. notionem
sapi-

sapientia divinar, inde ad existentiam divinam certa dabitur argumentatio. Sapientia divina est absolute summa, existentia divina absolute necessaria. Datur itaque nexus tantum inter sapientiam absolute summam seu perfectissimam & existentiam necessariam. Sed non cuiusvis est nexum hunc perspicere, nec cuiusvis etiam est notionem sapientia absolute summæ seu perfectissimæ ex contemplatione universi derivare, nisi supponas (existentia divinitatis, unde mundus pendet, aliunde demonstrata) universum esse opus Dei seu entis necessarii ab eodem diversi, & rationem hujus sufficientem continentis, hoc est, nisi ex contingentia mundi existentiam Dei ante deduxeris. Et si verum fatendum est, hac ratione semper reducitur existentia divinar demonstratio ad argumentum *Cartesii*. Hæc ut facilius intelligantur, exemplo aliquo speciali opus est. Sumamus ergo argumentum, quod a finibus peti solet ac præ ceteris assensum urgere judicatur. Finium consideratio sapientia ideam animo ingenerat, arque ego, postquam via contingentia ad existentiam Numinis perveni, per fines sapientiam ejus agnosco. Antequam constet, esse Deum & ab ejus libero decreto pendere præsentem universi conditionem, non certo constat, utrum usus, quem sibi mutuo præstant res naturales, in finium numero collocandi sint, nec ne: finis enim juxta notionem communem supponit agens liberum, quod eum intendit & cujus gratia operatur. Qui ergo res naturales contemplatus sumit, earundem usus esse fines, is tacite supponit, structuras & texturas rerum earumque præsentem conditionem alias esse potuisse; sed has destinato quodam consilio electas fuisse, consequenter vi contingentia existentiam entis, a quo mundus pendeat, vitio quodam subreptionis in ratiocinando commisso, sumit, hincque nascitur omne, quod sentire nobis videtur, argumenti robur. Equidem in hac suppositione nihil falsi est, sed bona tamen methodus requirit, ut non gratis supponantur,

nec vitio subreptionis tanquam clara admittantur, quæ demonstratione indigent, præsertim si argumentum exceptionibus ad speciem multam compositis non debeat esse expositum. Quodsi leges methodi severius custodias, nondum demonstrata Dei existentia & universi ab eodem dependentia, quod finium nomine in rebus naturalibus celebratur, notionem quidem sapientiæ admirandæ, sed non perfectissimæ seu absolute summæ animo ingenerare aptum. Enimvero si ansam inde arripimus sumendi perfectissimam seu absolute summam sapientiam, de ejus realitate a posteriori non constat. Quamobrem cum ex aliqua notione firmiter nil concludatur, nisi ejus realitate evicta, demonstrandum utique est, notionem summæ sapientiæ esse possibilem, antequam eam pro attributo alicujus entis habere atque hinc ulterius evincere possis, attributum istud esse entis necessarii ob nexum scilicet, quæ sapientiæ perfectissimæ cum existentia necessaria intercedit. Atque sic tandem per multas ambages deducimur ad argumentum *Cartesii*, quod eo demum in casu genuinum admisit *D. Thomas*, ubi evictum fuerit, perfectionis summæ notionem esse realem, seu, ut *Leibnitius* loquitur, perfectionem summam esse possibilem. Ut igitur adpareat, quomodo a ceteris viis, quæ ad divinarum perfectionum notiones ducunt, regressu ad *Cartesii* argumentum facto, tandem ad existentiam Numinis perveniat; in genere ostendam, perfectionem summam esse possibilem: id quod ad unamquamque perfectionem divinam in specie, occasione ita ferente, applicare licebit. Tenendum itaque est, omnem negationem provenire ab entitatis defectu atque adeo non habere locum in eo, quod expers omnis limitationis censetur, liberum profecto a defectu ulterioris entitatis, quem adfert limes. Fieri ergo haud quaquam potest, ut, quod limites nescit, negationem quandam in conceptu suo includat. Quamobrem cum contradictio simultaneam ejusdem affirmatio-

tionem & negationem ponat, in eo, quod illimitatum est, qualis perfectio summa habetur, contradictioni nullus relinquitur locus. Jure autem definitionis inter possibilia locum sibi vindicat, quod a contradictione liberum ac immune. Nil igitur obstat, quo minus perfectionem summam in eorundem numerum referamus. Ex his apparet, argumenta a posteriori petita rigorem tunc demum tueri, ubi ad rationes metaphysicas reducuntur: unde non mirum, quod *Cartesius*, quod nos, quod alii ad rationes metaphysicas delapsi fuerimus, ubi eadem in prima principia resolvere decrevimus, ut evidentiam rationis consequeremur. Quibus ratio non satis exulta, illos lux nimia confundit, ut de obscuritate conquerantur principiorum minime familiarium concatenationem sibi insuetam videntes, at non pervidentes, quemadmodum ad lucem solis meridianam caligant, qui ex loco umbroso in apicum subito procedunt.

§. VI.

Ut contingentiam totius universi in aprico colloca-
remus, nexum rerum materialium intimius ut scrutare-
mur opus fuit. Quodsi enim is absolutam habeat neces-
sitatem, nullus in universo erit contingentiae locus; arce-
bitur ex eodem sapientia, arcebuntur fines, arcebitur a re-
bus creatis perfectio, quam ipsis tribuit vulgatum illud
Metaphysicorum: *omne ens est bonum seu perfectum*. Quod
si vero rerum nexus a necessitate absoluta fuerit exemptus,
universum contingenter existit: si nihil in eodem fuerit
sine ratione, arcebitur fatum & sapientiae fores pandun-
tur, locumque habere potest in rebus perfectio. Con-
stat *Spinosam*, *Hobbesium*, alios contingentiam totius uni-
versi negare, a rebus corporeis perfectionem, a mundo
sapientiam auferre, cuncta fato subijcere. Ut igitur fon-
tes errorum detegerem, principia excutienda fuisse,
quibus ipsorum hypotheses nituntur, utque conclusiones
profanas, absurdas, impias evitarem, saniora & veriora

principia surrogari oportuit. Contraria, quibus necessitatis absolutæ ac fati defensores utuntur, stabilivimus: sic enim certissimum erat, contrarias quoque prodituras esse conclusiones. Quis enim concefferit, ex principiis contrariis, immo contradictoriis, eandem sequi conclusionem. Ecce igitur, quænam præmeditatus fuerim, antequam rem arduam, quæ summorum ingeniorum vires deluserat, excutiendam aggrederer! Nonne vides, me non cœco quodam impetu in nexum rerum a me stabilitum irruisse, ut facillimum fuerit nubem pro Junone amplecti?

§. VII.

*Dissensus
Auctoris &
Spinozæ circa
notionem
possibilem.*

Cœpi itaque in notiones possibilis & impossibilis, necessarii atque contingentis inquirere, ut ex distinctis iudicium fieret, cum, quæ a confusis ortum ducunt, errori sæpius obnoxia drehenduntur. Cum ergo considerarem, neminem esse, qui non inter impossibilia referat rectilineum bilineum, triangulum rectilineum tres angulos duobus rectis majores habens, vel triangulum æquiangulum inæqualium laterum & quæ his gemina sunt, modo elementorum Geometriæ fuerit gnarus; in rationem inquisivi, cur istiusmodi entia pro absolute impossibilibus habeantur, ita ut ne Deus quidem per omnipotentiam suam istiusmodi quid efficere posse concipiatur: nemo enim eandem ad ea extendit, quæ simpliciter fieri non posse intelliguntur. Statim autem animadverti, rectilineum bilineum pro impossibili haberi, quod ejus notio contradictionem involvat, cum a Geometris demonstratur ipsique sensui manifestum sit, duas rectas spatium comprehendere non posse. Nec aliam subesse rationem in ceteris, haud difficulter adsecutus fui. Etenim contradictoriæ sunt propositiones: Figura habet tria latera rectilinea & eadem figura habet tres angulos duobus rectis majores, cum nullo modo fieri posse concipiatur, quam ut figura trilatera rectilinea tres habeat angulos duobus rectis æquales. Similiter contradictorium est, habere tres angulos æquales & tria latera

tera inæqualia. Uno admissio, alteri locus non est. Nullus igitur dubitavi definire *impossibile* per id, quod contradictionem involvit, cum hanc impossibilis notionem esse reperissem, juxta quam judicant Geometræ, rigidissimi demonstratores, consentientibus omnibus, quotquot eorum judicia adsequuntur. Nec puto quempiam fore, qui circa hanc impossibilis definitionem scrupulum moveat. Et si quis esset, qui contradictoria admitteret, contra primum Philosophiæ principium, quod *fieri non posse* inculcat *ut idem simul sit & non sit*; nã! adversus illam valeat vulgatum illud: *contra negantem principia non est disputandum*. Nimirum nisi quis hoc contradictionis principium admittere velit, fieri non potest, ut ullius veritatis convincatur, vel ullius erroris redarguatur. Postulat enim, ut sibi pro arbitrio insanire liceat. Jam vero hoc concessio, impossibile esse, quod contradictionem involvit; non video, quo jure negari possit, *possibile* esse id, quod contradictionem non involvit, perinde enim est, ac si diceres, possibile est, quod non impossibile. Alteram contradictionis partem definiri posse per alteram, quæ alia ratione definita fuit, Logicæ satis gnarus non ignorat. Et si quis regulam male intellectam, quod definitiones non esse debeant negativæ, ad hunc casum trahere veller, is facile erroris in applicando commissi convinceretur, ratione non procul petita, sed ex ipsa definitionis nominalis (quam recentiores vocant) definitione. Statim equidem succurrebat, absolutæ necessitatis defensores hanc *possibilis* definitionem ægre ferre, cum huic hypothese inimica reperiatur: enimvero cum nullo jure impugnari possit, immo maxima in prima eaque evidentissima principia injuria rejiciatur, collegi inde illius propugnatores ante statuisse, quam de principiis cogitarent, nec ab his ad conclusiones descendisse, id quod bonæ methodi legibus merito adversum judicatur. Sane *Spinosus* & alii, qui necessitati absolutæ atque fato patrocinantur, possi-

possibilium numerum valde restringunt, cum in eodem juxta ipsos non sit, nisi quod vel actu est, vel aliquando fuit, vel olim futurum. Inde emanavit possibilitium definitio, quæ legitur apud *Spinosam* (l), quod ita dicantur *res singulares, quatenus, dum ad causas, ex quibus produci debent, attendimus, nescimus an ipsæ determinate sint ad easdem producendum*. Atque ideo *Spinoza* possibilitatis notionem tantum defectum cognitionis nostræ circa rei existentiam significare (m) statuit. Ejus de possibilitate dogma, omnibus fatalis necessitatis assertoribus ante ipsum commune, jam operose refellit D. *Thomas* & ex eo *Dominicus de Flandria*, Philosophorum Thomistarum princeps (n). Convenit autem quoad rem Doctoris Angelici definitio cum nostra: cum enim *possibile esse*, ait, *quo posito in esse, nullum sequitur impossibile*; quid, quæso aliud sibi volunt hæc verba, quam possibile nullam in suo conceptu involvere contradictionem. Et tenendum quidem est, dudum agnovisse Philosophos, etiam Scholasticos, notionem possibilitium, quam nos amplectimur, necessitati absolutæ contraria esse; oppositam vero, qua possibilitas cum actu iisdem limitibus coercetur, cum necessitate absoluta adeo firmiter connexam esse, ut uno admissio alterum negari nequeat. En differentiam nostræ possibilitium notionis a notione, quam format *Spinoza*, quam formarunt ante ipsum, quotquot necessitati absolutæ patrocinati fuerunt. Nostra possibilitium notio necessitati geometricæ adeo inimica, ut eadem admissa hæc collabatur. Nos igitur tanquam possibile admittimus, quicquid nihil contradictionis involvit, sive illud existat, sive non. Actus ad possibilitatem non confert. Possibile sane est, ut mentis quadratæ inducatur figura rotunda, etsi forsam nunquam futurum, ut

co-

(l) *Ethic. part. 4. def. 4. p. 165.*(m) In *Cogitationis Metaphysicis part. 1. c. 3. p. 104.*(n) In *Quæstionibus in libros Metaphysicæ Aristot. lib. 9. quæst. 3. art. 1. p. 650. & seqq.*

eadem figura eidem unquam inducatur. Similiter juxta nostram notionem possibile fuit, ut surgerem, cum sederem: quod *Spinosæ* & Fatalistæ minime concedunt, nec salva sua hypothefi concedere possunt.

§. VIII.

Vidimus, quis sit circa notionem possibilium *dis-* *Dissensus* *sensus* inter me & *Spinosam*, seu in genere inter eos, qui *Autoris* *Contingentiam* universi admittunt, & illos, qui fatalem *Spinosæ* *circum-* *necessitatem* defendunt. Sed agendum! videamus porro, *ca notionem* quinam sit dissensus circa notionem necessarij & con- *necessarii* *tingentis* me inter atque *Spinosam*, seu ut (verborum tax- & *contin-* *diolæ* ambages evitare liceat) inter *Contingentiarios* & *gentis*.

Fatalistas. Ego *necessarium* definivi per id, cujus oppositum contradictionem involvit, seu impossibile existit (o). Hanc notionem ut certam consequeretur, denuo a posteriori derivavi, expensis exemplis necessariorum extra omnem controversiæ aleam positis. Nemo non largitur, quæ numeris ac figuris insunt, veritates necessarias esse, cum inde factum constat, ut *necessitatem absolutam* seu absolute sic dictam, de qua nobis in præsentī sermo est, *geometricam* dixerint Philosophi. Absolute igitur necessarium est, triangulum rectilineum habere tres angulos duobus rectis æquales, at pro tali non habetur, mensuræ figura est quadrata. Verum enim vero quænam differentia intercedit inter has propositiones logice consideratas, & quænam subest ratio, ut in priori *prædicatio* dicatur *necessaria*; in altera *contingens*, seu, quod perinde est, ut ipsa prior propositio dicatur *necessario*, posterior nonnisi *contingenter vera*? Differentia profecto non alia intercedit, quam quod propositio priori opposita, triangulum rectilineum habere tres angulos duobus rectis inæquales, sit impossibilis, quæ vero posteriori opponitur, mensuræ non habet figuram quadratam, sit possibilis, cum evidens sit, ejus figuram

(DIFFER. NEX. RER.)

C

quo-

(o) In Meditat. Metaphysic. §. 36.

quoque rotundam & polygonam fieri posse, hoc est, nullam dari figuram planam, quæ non perinde ac quadrata mensuræ induci queat. Evidens adeo erat *necessarium* hic dici, cujus oppositum impossibile, seu contradictionem involvit; *Contingens* vero vocari, cujus oppositum possibile deprehenditur. Atque ita una nascebatur contingentis definitio, tanquam ejus, quod necessario opponitur. In his non acquievi, sed ulterius progressus in rationem inquisivi, unde sit, quod in aliis oppositum sit impossibile, in aliis vero possibile. Attendi igitur denuo ad exempla modo allata atque intellexi æqualitatem trium angulorum cum duobus rectis determinari per numerum ternarium laterum & per linearum speciem, neque adeo integrum esse, ut numero ac specie laterum salvis angulorum quantitas varietur: contra vero per ea, quæ notio mensuræ involvit, figuram quadratam non determinari, sed salva ista hanc variis modis determinari posse. Atque hæc est ratio, cur fontem contingentis ultimo qualiverim in determinabilitatis diversitate. Sed ea hic distinctius exponenda non sunt, cum tuto ignorentur, etiam si dissensum me inter atque *Spinosam* in hoc argumento perspicere velis. Ceterum omne in Geometria theorema ita se habet, ut ejus oppositum sit impossibile. Ideo duplici via ejus veritatem demonstrare licet, vel *directe* ostendendo scilicet ejus possibilitatem, seu nexum cum veritatibus aliis, unde sequitur; vel *indirecte*, monstrando oppositi impossibilitatem, seu contradictionem, quam cum aliis veritatibus involvit. Neque vero nostra definitio absolute necessarij differt a definitione *D. Thomæ* quod scilicet sit *illud, quod non contingit aliter se habere* (p): cum enim necessarij oppositum sit impossibile, contingere profecto nequit ut aliter se habeat. V. gr. quoniam impossibile est triangulum rectilineum habere tres angulos duobus

(p) Vid. Dominicus de Flandria loc. cit. lib. 5. quæst. 5. art. 1. E. 237.

bus rectis majores, contingere sane nunquam potest, ut iidem in aliquo triangulo rectilineo duobus rectis majores evadant. Retinetur definitio D. Thomæ etiam a Theologis Augustanæ Confessioni addictis, qui suis eandem compendiis inserere sueverunt. Exemplo esto *Scherzerus*, Theologus quondam apud Lipsienses clarissimus (q). Dum autem monuit Doctor Angelicus, necessitatem absolutam pendere ab intrinseco, nequaquam vero ab extrinseco quodam principio. Ego qui operam dare soleo, ut distincte explicem, quæ ab aliis confusis notionibus contentis indignantur, clarissime ostendi, quodnam sit illud intrinsecum absolutæ necessitatis principium, nempe determinabilitatis unicitas (ut voce barbara uti mihi liceat ad rem accurate exprimendam aptissima) aut, si mavis, immutabilitas. Ostendi enim v. gr. in triangulo rectilineo per id, quod perimenter tribus constet lineis rectis, quantitatem angulorum omnium simul ita determinari, ut alii locus esse nequeat, salva hac perimetro. Contingens opponi necessario, nemo ignorat. Quamobrem ipsa notio necessarii insinuat, quid sibi velit contingens. Nimirum quoniam necessarium est, cujus oppositum impossibile; *contingens* definiri debet per id, cujus oppositum est possibile. E. gr. Sedere, & non sedere sibi mutuo opponuntur. Sed non sedere perinde possibile est atque sedere, etiam tum, quando sedemus. Atque ideo actus sedendi pro contingente habetur. Similiter figura mensæ quadrata inter contingentia refertur, quoniam non quadratam, v. gr. polygonam aut rotundam, perinde recipere valet ac quadratam. Quod si ergo porro quæsiveris, quodnam principium contingens agnoscat, videbis profecto, non aliud esse, quam quod principio necessarii opponitur, nempe, determinabilitatis diversitatem. E. gr. data corporis humani structura, diversi situs sunt posibles, cum

C 2

vi

vi eiusdem determinari possit ad sedendum, standum, cubandum &c. Atque ideo unus finis eidem non necessario competit, sed contingenter. Intelligimus porro existentiam seu actum contingentis cum non habeat intrinsicum; ratione extrinseca gaudere, atque in eo a necessario differre. Neque nostra contingentis notio ab ea differt, quam habet D. Thomas (r) *contingens* definiens per id quod potest esse & non esse. Etenim si contingentis oppositum possibile, patet etiam illud esse non posse: esse enim hic idem est ac existere. Similiter qui vulgo *contingens* definiunt (s) per id quod aliter se habere potest, a nobis minime dissentiant. Quod enim aliter se habere potest, ejus oppositum possibile esse debet: secus enim aliter se habere non posset. *Spinoza* neque in Cogitatis Metaphysicis, neque in Ethica definitionem necessarij in genere adfert, quam studio evitasse videtur, ut lectori facilius fatalem rerum necessitatem persuaderet. Equidem haud ægre definitionem nostram admissurus videtur, quod scilicet necessarium sit illud, cujus oppositum impossibile: enim vero qui curatius res expendunt, me non monente perspiciunt, illam tantum admitti quoad verba, nequaquam vero quoad vim & potestatem verborum. Etenim cum magna differentia circa notionem possibili ac impossibilis inter nos atque *Spinosam* intercedat, alia prorsus ratione definitionem nostram necessarij *Spinoza* interpretari debet, quam a nobis fieri solet (§. 7.). In Cogitatis Metaphysicis (t) monet, *necessarium duobus modis dici, vel respectu essentia, vel respectu cause. Respectu essentia Deum necessario existere, cum ejus essentia non possit concipi sine existentia. Chimaram respectu implicantiæ suæ essentia non potis esse, ut existat. Respectu cause dici res e.*
gr.

(r) Vid. Dominicus de Flandria loc. cit. lib. 6. quæst. art. 2. f. 443.

(s) Scherzerus in Manuali Philosophico p. 43.

(t) c. 3. p. 100. 101.

gr. materiales esse impossibiles aut necessarias: nam si tantum ad eorum essentiam respiciamus, illam concipi posse clare & distincte sine existentia, ac ea propter eas nunquam existere posse vi & necessitate essentiae: sed tantum vi causae, Dei nempe omnium rerum creatoris. Si itaque in decreto divino sit, ut res aliqua existat, eam necessario existere; sin minus, impossibile esse, ut existat. Per se enim manifestum esse, id quod nullam causam, internam scilicet aut externam habeat ad existendum, impossibile esse, ut existat. Atqui rem in hac secunda hypothesis poni talem, ut neque vi suae essentiae, quam per causam internam intelligat, neque vi decreti divini, unica omnium rerum causae externa, existere possit: unde sequatur, res, ut in secunda hypothesis statuatur, impossibiles esse ut existant. Quis non videt, quanta his verbis insit confusio, quod notiones impossibilis & necessarii non satis distinguantur, nec notio necessarii in genere evolvatur? Antequam enim affirmare licet, necessarium aliquid esse vel respectu essentiae, vel respectu causae; disquirendum est in genere, quid sit necessarium. Hæc sane distinctio restringit necessitatem ad solam existentiam, nec respectum una involvit ad essentiam, de qua tamen necessitas quoque prædicatur. Qui dissensum inter nos & *Spinosam* de notione possibilis animo comprehendit (§. 7.), fontem erroris *Spinozæ* detexit. Ceterum ex dictis liquet, *Spinosam* id agere, ut ostendat, omnia absolute impossibilia esse, quæ in decreto divino non habeantur ut existant, atque adeo possibilitatem a decreto divino, consequenter ab ipsius voluntate arcessere. Hæc enim hypothesis favet ipsius hypothesei principi de fatali necessitate, neque per nostra ac Philosophorum Scholasticorum, nec non Theologorum Augustinæ Confessioni & ecclesiæ Romanæ addictorum principia stare potest, per quæ rerum essentiae in intellectu divino ante decretum concipiuntur: sic enim ab eodem nulla in res derivatur necessitas absoluta, quam vi decreti iisdem inesse con-

tendit *Spinoza*. Sed de his infra suo loco dicentur plura. In Ethica (u) necessitatem definit, quatenus opponitur libertati, ita ut sit synonymon coactionis, atque hoc in sensu *res necessaria vel potius coacta* ipsi est, *quæ ab alio determinatur ad existendum & operandum certa ac determinata ratione*. Sed hæc significatio nihil facit ad rem præsentem, ubi sermo est de mundo materiali, an contingenter existat & de eventibus etiam rerum materialium in universo, num fatalis quædam necessitas ipsis insit. Apparet adeo denuo, notionem necessitatis in genere a *Spinoza* non fuisse evolutam: id quod tamen fieri debebat, ubi de fatali rerum necessitate tractatur, cum notiones istæ generales tanquam simpliciores hanc notionem magis complexam ingrediantur. Enimvero confusio parit errorem & facit ad palliandos errores: unde non mirum, si in tanta notionum simpliciorum confusione non caste fuerit philosophatus. Interea evidens est, nos a *Spinoza* circa notionem *necessarii* dissentire, non modo quod distinguamus, quæ ille confundit, & explicemus, quæ idem sicco pede præterit; verum etiam quod nostra definitione *necessarii* salva subsistere nequeant, quæ de necessitate philosophatur: id quod mox clarius constabit, ubi ad conclusiones descendemus. Quod contingentiam attinet, necessitatis absolutæ oppositum, in Ethica nobiscum consentire videtur. *Res singulares*, ait (x), *voço contingentes, quatenus, dum ad earum solam essentiam attendimus, nihil invenimus, quod earum existentiam necessario ponat, vel quod ipsam necessario secludat*. Enimvero re attentius considerata, toto coelo a nobis differt. Nos enim definivimus contingens per id, cujus oppositum non impossibile: Sed hoc non prorsus coincidit cum eo, quod rationem existentiae in se non habet, nec existentiae repu-

(u) Part. 1. def. 7. p. 2.

(x) Part. 4. def. 3. p. 165.

pugnet, quo abit definitio *Spinoſe*. Etenim ſecundum noſtram definitionem non implicat, ut oppoſitum, tanquam æque poſſibile, perinde exiſtat: ſed hæc implicantiæ locum habere poteſt, ſalva definitione *Spinoſe*, quemadmodum etiam eandem tuetur. Et ſicuti in ceteris principiis hominis vaſtri, ita hic quoque ſingula ejus verba probe ſunt conſideranda, ne incautiſ imponat. Latet enim anguiſ in herba. Etenim quid ſibi volunt hæc verba: *dum ad earum ſolam eſſentiam attendimus?* Nonne vides, notionem contingentæ in earum numerum referri, quas ſecundas vocarunt Scholaſtici, & quibus nihil extra mentem reſpondet, cum a defectu cognitionis ortum trahant, quem voce *ſola* indicat *Spinoſa*. Immo alibi (y) mentem ſuam clariuſ exponit & contingentiam inter defectuſ noſtræ perceptionis reſert, negans contingens eſſe reale quidpiam. *Si ad rei*, inquit, *eſſentiam ſimpliciter*, non vero *ad ejus cauſam attendamus*, illam contingentem dicemus, hoc eſt, illam ut medium inter Deum & chimaram, ut ſic loquar, conſiderabimus, nempe quia ex parte eſſentiæ nullam in ipſa reperimus neceſſitatem exiſtendi, ut in eſſentia divina, neque etiam implicantiæ ſive impoſſibilitatem, ut in chimæra: - - *Sat erit*, ſi nobis concedat, hæc duo (nempe poſſibile & contingens) nonniſi defectuſ noſtræ perceptionis, nec aliquid reale eſſe.

§. IX.

Postquam igitur oſtendi, quanta ſit differentia inter nos & *Spinoſam* circa notionem ſimpliciores, in quas *rum materi-* notio nexus rerum materialium reſolvitur; nunc pro alium, quapius ad rem præſentem accedendum eſt, ut internum *lem Autor* diſcrimen iſtius nexus & fatalis neceſſitatis clariffimum defendit, de- evadat. Danda itaque eſt opera, ut rem arduam ad ca- ſcribitur, prum explicemus. Eum in finem primum nexum rerum materialium, qualis a me defenditur, deſcribere lubet;

mox

(y) In Cogitatis Metaphyſ. part. 1. c. 3. p. 102.

mox delineaturus fatalis necessitatis faciem: ita tandem ex utriusque collatione discrimen manifestum evadet. Res materiales connexas esse statuo cum ratione spatii, tum ratione temporis (z), & hinc omne universum, quatenus omne spatium replet & omne tempus exhaurit, unum totum & ens unum esse probo (a). Atque ea est ratio, quod *universum* definiam per seriem simultaneorum & successivorum inter se connexorum (b). Unde apparet, vim dictis inferri, si qui ad structuram mechanicam mundi seu compagem corporum mundi totalium trahunt, quæ ego de universo prædico: neque enim universum, prout a me sumitur, idem est cum compage corporum mundi totalium, sed plura involvit. Fieri potest, ut in universo mutatio accidat, nec idem subsistat, etsi compages corporum mundi totalium eadem maneat. Dabo exemplum: Post *Leibnitium* ostendi, si quis a Deo per miraculum in natura corporea producat effectus, naturaliter non secuturus, universum in posterum non amplius fore idem, quod absente miraculo futurum fuerat, nisi per potentiam Dei extraordinariam status per miraculum mutatus talis restituatur, qualis naturaliter futurus erat. Ratio hæc est, quod ob rerum nexum in futuro universi statu a miraculo semper aliquid admittendum, quod non futurum erat, miraculo absente. Minima autem diversitas tollit identitatem. Declaravi rem simili, comparans miraculum cum motu indicis in horologio vi externa vel retroacti, vel promoti, qui situs diversitatem inducit omni tempore subsecuturo, quamdiu motus interitus durat. Sed qui hanc mutationem ad compagem corporum mundi totalium trahunt, quasi per miraculum sol & planetæ suis locis dimoveri dicantur, & hanc sententiam ineptam oppugnant, illi cum umbris pugnant & similes sunt ei, qui simile ita interpretaretur, quasi ob adfer-

tum

(z) §. 549. Met. (a) §. 549. (b) §. 544.

tum motus indicem diversum a violento e situ suo motu, qui per structuram non futurus fuerat, statueretur machinæ structuram internam mutari. Sed sinamus Sciamachos fortitudinem suam exercere in pugna (si superis placeat!) tam laudabili, neque enim invidemus ipsis victoriam, si quam de umbris suis reportaturi sunt, atque e diverticulo in viam redeuntēs nexum rerum materialium curati-
us lustremus, quamvis mihi non appareat, cur is providentiam divinam negare dicendus sit ipsaque miracula, qui per miraculum in corpore partiali patratum mutationem aliquam compagi totalium induci per errorem statueret. Ego tam lynceus esse non opto, ut talia videam. Quodsi igitur res in universo inter se connexas spectes; ego vi notionis possibilium (§. 7.) admitto, esse adhuc alia corpora mundi totalia perinde ac ea, quæ existunt, possibilia, quæ simili aut diversa ratione collocari possunt: immo si asserueris, hæc ipsa, quæ præsentem rerum compagem constituunt, corpora totalia alia adhuc ratione collocari potuisse, me non invitum habebis. Corpora enim mundi totalia ego cum rotis horologii comparare soleo, quarum in locum aliæ substitui possunt, si diversam ab eo machinam desideres, & quas ipsas etiam ad constructionem alterius machinæ adhibere liceret, si quidem præsentem compagem dissolvere volueris. Diversa mundi systemata, quæ apud Astronomos prostant, clarissime loquuntur, eadem corpora totalia diversis modis locari posse & sic diversas prodire eorundem compages. Atque ea ratio est, cur a priori veritas systematis mundani demonstrari nequeat, sed ex phænomenis dijudicanda sit. Si eadem corpora totalia nonnisi uno modo locari possent, ceteri tanquam impossibiles contradictionem involverent (§. 7.), & hac contradictione ostensa corrueret prætensa compages. Enimvero cum ab ea, quæ existit, diversæ contradictioni obnoxie non sint, nec earum a priori impossibilitas demonstrari potest. Diversitas corporum mundi

(DIFFER. NEX. RER.)

D

tota-

totalium in partialibus diversitatem requirit : etenim si hæc forent prorsus eadem , nec in eorum situatione diversitas aliqua occurreret , totalia ut different fieri haud quaquam posset. Quoniam adeo admitto , præsentem rerum compagemaliter se habere posse , seu , ut magis philosophice dicam , oppositas eidem compages alias non esse impossibiles ; juxta communem ac meam contingentis definitionem pro contingente habenda , nec absolutæ necessitati subest (§. 8.). Equidem non nego , antequam eadem potentia divina ad actum deduceretur , immo antequam Numen omniscium ejus existentiam decerneret (ordinis hic , non temporis rationem habemus) , eam fuisse possibilem , nec ejus possibilitatem a decreto pendere , consentiens Philosophis ac Theologis essentias rerum necessarias statuentibus ; sed quis ideo dixerit , eam esse absolutæ necessitatis , nisi summa imis miscens omnia confundere voluerit ? Cum sedes , possibile est , ut surgas , antequam surgis : sed quis dixerit ideo hunc actum esse absolutæ necessitatis , quod fuerit possibilis , antequam eundem decreveris ? Vidimus superius (§. 8.) , principium contingentiae esse rebus intrinsicum , nec eas demum contingentes fieri per decretum , quo causa libera actum earundem determinat. Etsi autem 2. largiar , res materiales essentiae suæ convenienter agere & pati (id quod nemo Philosophorum in dubium vocat) ; regulas tamen motus in materia minime fundatas esse atque perinde ac situationes corporum a necessitate absoluta exemptas cum *Leibnizio* agnosco. Atque ea subest ratio , cur principia , unde illæ a Mathematicis demonstrantur in Cosmologia metaphysica non a priori ex notione materiae , sed ex phænomenis a posteriori derivaverim. Quamobrem rebus materialibus juxta leges motus in se mutabiles operantibus , ipsi quoque eventus in universo non sunt immutabilis necessitatis. Si enim Deo , universi Autori , alias motus regulas præscribere libuisset , alii prorsus futuri erant , iisdem manentibus

re-

rerum essentiis, eadem permanente corporum totalium compage, eventus. Immo Vir summus *Newtonus* (c) principia ista, quæ legum naturæ titulo decorat, non demonstrat, sed ex phænomenis agnita supponit. Ceterum hanc universi contingentiam quoad corporum compagem & rerum materialium situationes legesque motuum defendit quoque Theologus multa rerum scientia ac varia eruditione præstans *Juannes Clarkius*, magnæ Britanniae Regi a sacris ordinariis (d). Nec sane major in universo concipi potest contingentia, quam quæ a nobis defenditur, ubi & spatium aliis corporibus repleti, quam repletum deprehenditur, & tempus aliis prorsus eventibus distingui potuit, quam in præsentī distinguitur, illis vel maxime iisdem manentibus. Hæc quidem cum ita se habeant, 3. præsentem rerum nexum, sive corporum compagem, sive eventus spectes, a liberrimo Dei decreto derivō, ita ut Numen sapientissimum per meam de universo theoriā & ipsam rerum compagem infinitis modis variare, & in unaquaque ipsos quoque rerum eventus ad arbitrium determinare potuerit: qua sane major ex parte objecti libertas in Deo conditore concipi nequit. Ex his sane principiis demonstro (e), plures mundos esse possibiles, & ex innumeris hunc a Deo liberrimo decreto (f) fuisse productum (g), etsi ad ceteros quoque sese extendat potentia ipsius (h). Non contentus ab universo removere absolutam necessitatem ulterius progredior atque fato sublato, sapientiæ divinæ locum facio, fines in naturam rerum introduco & rebus perfectionem tribuo. Nimirum 4. evinco, res in universo cum ratione ordinatas esse quoad spatium & eventus cum ratione consequi quoad tempus: illud obtinet, quod situs corporum rationem habeat sapientiā divinā dignā; hoc vero accidit, quod
D 2 leges

(c) Princip. Philos. Nat. Mathem. p. m. 12.

(d) Enquiry into the cause and origin of evil p. 90. 91. (e) §. 569. & seqq. Met. (f) §. 980. 984. (g) §. 1053. (h) §. 1021.

leges motus seu principia regularum motus per rationes eidem sapientiæ conformes fuerint determinatæ. Atque hinc resultat nexus rerum sapiens, quem defendo, ad propulsandum fatum deficiente acumine adsertum. Quando enim ajo, omnia in universo cum respectu spatii, tum respectu temporis inter se connexa esse (i), id ita explico, quod unum quodque corpus contineat rationem, cur alterum ipsi contiguum sit (k), & status præsens habeat in se rationem aliquam sequentis (l), hoc est, in unoquoque corpore aliquid inesse, unde intelligi possit, cur alterum ipsi sit contiguum, & in statu præsentis aliquid reperiri, unde similiter intelligi possit, cur alter ipsum sequatur (m): quæ etiam experientiæ consona sunt & scientiam physicam fundant. Dum itaque ostendo, omnia cum summa ratione a Deo ordinata esse, tollitur fortuitus rerum materialium concursus, a *Lucretio* descriptus, ubi sapientiæ nullus est locus, finibus exulantibus. Dum hunc nexum etiam in partibus unum corpus quantumlibet exiguum constituentibus agnosco, omnibus inter se vi harmoniæ universalis pulchre consentientibus (n), perfectioni locum in rebus materialibus facio libere iisdem a Deo tributæ (o). Dum denique eas leges motus corporibus latas propugno, ut omnes rerum eventus sint fines per rerum essentias tanquam media obtinendi (p), in omni universo sapientia divina dominatur, nec ullibi bruta necessitas, quæ fatum absolvit, nec cum absoluta necessitate confunden-
da, eventibus inest.

§. X.

Spinosa absoluta & bruta seu fatalis necessitas describitur.

Qui in hac idea mundi, quam nos concipimus, absolutam necessitatem & fatum sibi imaginatur, is nullam finget, quæ absolutæ necessitatis ac fati expers sit, cum etiam absolutam necessitatem ac fatum adpellet, quod e diametro

(i) §. 548. (k) §. 546. (l) §. 547. (m) §. 29. Met. (n) §. 600.
(o) §. 984. (p) §. 1026. & seqq.

tro eidem opponitur. Hæc clariora evadent, ubi *Spinoza* ideam de universo excusserimus. Vidimus 1. jam superius (§. 7.), *Spinosam* non admittere possibilia corpora mundi totalia ac partialia, nec aliam eorundem situationem, nisi quæ aliquando existunt, & prout actû collocantur; cetera pro defectu cognitionis nostræ habet. Atque adeo 2. rejicit receptum dogma, quod possibilitates seu essentiae rerum non pendeant a decreto divino; sed in intellectu concipi debeant antecedenter ad decretum ipsius: verum ipsas quoque perinde ac existentiam a decreto Dei unice derivat, cum impossibile dicat, quod in eodem non habeatur ut existat, quia omni causa cum interna, tum externa ad existendum caret (§. 8.). Ea nimirum ex falsa possibilitium norione fluunt. Esse autem hanc *Spinoza* sententiam non modo ex supra explicatis notionibus generalibus concluditur; sed ipse disertis verbis adserit. *Res*, inquit, *nullo alio modo, neque ordine a Deo produci poterunt, quam productæ sunt* (q). Negat ideo 3. apertissime (r), *in rerum natura ullum dari con-singens, sed omnia ex necessitate divinæ naturæ determinata esse, ad certo modo existendum & operandum*. Et Deo 4. adimit libertatem eligendi affirmans (s), *omnia ex necessitate divinæ naturæ sequi*, ridens eos (t) qui contendunt, *feri posse, ut, quæ in Dei potestate sunt, non fiant sive ab ipso non producantur: quod idem esse, ait, ac si dicerent, Deum posse efficere, ut ex natura trianguli non sequatur, ejus tres angulos æquales esse duobus rectis, sive ut ex data causa non sequatur effectus*. Et porro (u) addit, *quicquid concipimus in Dei potestate esse, id necessario esse*. Negat 5. (x) rebus

D 3

rebus

(q) Ethic. part. I. prop. 33. p. 29.

(r) Loc. cit. prop. 29. p. 26.

(s) Loc. cit. prop. 16. p. 16.

(t) Loc. cit. schol. prop. 17. p. 17.

(u) prop. 35. p. 33.

(x) in præf. ad part. 4. Eth. p. 163.

rebus inesse perfectionem, perfectionem & imperfectionem
revera modos solum modo cogitandi esse, nempe notiones quas
fingere solemus ex eo, quod ejusdem speciei aut generis indi-
vidua ad invicem comparamus.

§. XI.

Differentia Quodli jam ea, quæ de nexu rerum sapientis, quem
nexus re- defendimus, in medium protulimus (§. 9.) & quæ ex *Spino-*
rum sapien- *nosa* de fatali rerum necessitate excerpta dedimus (§. 10.)
tis Absolu- una cum nostris ac *Spinoſe* principiis, quibus ista inni-
ta ac fatalis tuntur, supra (§. 7. & 8.) evolutis, inter se conferre volu-
necessitatis eris; videbis me & *Spinoſam* tum quoad principia, tum
Spinoſæ evi- quoad conclusionem in terminis contradictoriis harere:
dentissime me recepta Theologorum principia & dogmata tueri, con-
monſtratur. traria vero a *Spinoſa* propugnari. Etenim 1. mihi possibile
est, quod nullam involuit contradictionem, sive a Deo
decretum fuerit, ut existat, sive non; *Spinoſa* vero pro
possibili non agnoscit, nisi quod in decreto divino habetur,
ut existat, cetera, quæ a nobis una in possibilem num-
merum referuntur, pro defectu cognitionis habet. Ego 2.
affirmo, multa fieri posse, quæ nunquam fiunt; negat
id *Spinoſa*. Mihi 3. contingens est, cujus oppositum pos-
sibile deprehenditur, seu quod aliter se habere posse concipitur;
Spinoſa hanc contingentium notionem rejicit, nec
taliam existere, quorum oppositum perinde existere poterat,
largitur, tanquam pro aris & focis pugnans affirmat,
quod existit, ejus contrarium perinde existere non posse.
Ego 4. doceo plures mundos esse posibles & ex iis
Deum liberrime elegisse, quem produxit, nulla sane necessitate
extrinseca, nulla intrinseca adductum; *Spinoſa*
non concedit alium mundum possibilem, nisi qui existit,
atque hunc ex essentia Dei necessario fluere, atque a Deo
necessario fuisse productum. Ego 5. cum Theologis omnium
trium per leges imperii in eodem stabilitarum religionum
possibilitatem rerum a decreto divino eximo, rerum
essentias necessarias antecedenter ad illud ab intellectu

lectu divino derivo; *Spinoza* radicem possibilitatis in voluntate divina quarit & rerum essentias ab ejus decreto derivat. Ego 6. potentiam Dei ad ea etiam extendo, quæ nunquam existunt, modo non sint contradictoria seu absolute impossibilia; *Spinoza* eandem ad ea tantum restringit, quæ fiunt. Ego 7. rebus perfectionem tribuo; *Spinoza* eandem aufert. Ego 8. sapientiæ in universo locum facio; *Spinoza* ejus in locum fatum furrogat. Ego 9. fines in rerum natura considero; *Spinoza* iis nullum in universo locum concedit. Ego 10. leges motus in natura corporum minime fundatas agnosco, sed a sapientia Dei derivo; *Spinoza* alias a Deo fieri non potuisse tuerur, easque in se immutabiles agnoscit. Quodsi hoc discrimen non sufficit, ut nexus rerum sapiens diversus habeatur ab absoluta & fatali necessitate *Spinoze*, adfirmandum utrique erit, nullam res inter differentiam intercedere, sed omnes esse eandem.

§. XII.

Dixi Theologos omnium trium per leges imperii in eodem stabilitarum religionum rerum essentias seu possibilitates ab existentia præcisas non a voluntate Dei liberari, sed ab intellectu ipsius antecederent ad decretum derivare easque necessarias esse defendere: quis enim dixerit, quod possibile est, idem simul impossibile esse posse? Etsi autem assertum manifestum sit penes omnes, qui historica rerum cognitione non destituuntur: ne tamen minus vere aliquid adseruisse videar illis, qui notionem essentiarum arbitrariorum imbuti historiam dogmatis de necessitate essentiarum aut ignorant, aut ab aliis ignorari mallent; eorum in gratiam illud comprobatum dabo. Philosophos Scholasticos, quorum adhuc vestigia legunt ecclesiæ Romanæ Doctores, essentias rerum necessarias, æternas & immutabiles statuere, libri ipsorum metaphysici palam loquuntur. Et nota est controversia, quæ inter Thomistas & Scotistas agitur, an essentia rerum habeant esse

esse reale & actuale ab æterno : cum enim in virtuali & cognito omnes consentiant, illius cum omnipotentia, hujus cum omniscientia nexum abunde perspicientes, in reali tantum & actuali dissentiunt, illis affirmativam, his negativam defendentibus. Et *Thomiste* quidem ex necessitate & immutabilitate realitatem & actualitatem inferunt, contra quam illationem disputant *Joannes du Hamel*, Doctor Sorbonicus & in Academia Parisiensi Professor (y), & *Joannes Gabriel Boivin*, in Provincia Franco-Parisiensi strictioris observantiæ & apud Fratres Minores Virienses Professor (z). Immo nec præstantissimis ecclesiæ patribus infensa fuit necessitas, æternitas & immutabilitas essentiarum, ad quas Deus decreturus existentiam rerum respexit & quæ termino *Platonis* earum *ideæ* appellantur. Sufficiat in præfenti testem appellasse D. *Augustinum*, qui (a), *Ideæ sunt, inquit, principales quedam formæ vel rationes rerum, stabiles atque immutabiles, quæ ipsæ formatae non sunt, ac per hoc æternæ ac semper eodem modo se habentes, quæ in divina INTELLIGENTIA continentur.* Et cum ipsa non oriantur, nec intereant, secundum eos tamen formari dicitur omne, quod oriri & interire potest. Quod si hæ rerum creandarum creaturarumve rationes continentur in mente divina, quidquam nisi æternum & incommutabile non potest esse. Quæ rationes non solum sunt *ideæ*, sed ipse veræ sunt, quia æternæ sunt & ejusmodi atque incommutabiles manent. Quarum participatione fit, ubi fit, quicquid & quomodo est. Neque videtur mihi D. *Thomas* realitatem & actualitatem essentiarum ab æterno defendens aliquid a D. *Augustini* sententia diversum statuisse, quam quod *ideæ* singularum extiterint ab æterno in intellectu divino, & ita singulari habe-

(y) In Philosophia Univers. Tom. 3. p. 32. & seqq.

(z) Philosophia Scoti. Part. 2. Metaphys. part. 1. c. 3. quæst. 3. p. 54. & f. qq.

(a) Lib. octogiuta trium quæstion. quæst. 46.

habeant esse quoddam reale atque actuale in intellectu divino. Sed quicquid ejus rei sit, ad scopum nostrum illius controversiæ decisio nullum adfert momentum. Nostros doctrinam de essentiis rerum æternis & necessariis retinuisse & ita explicasse, quod ab æterno nullam involvant contradictionem; nemo ignorat, qui cursum studiorum academicorum emensus est. Si quis ea de re dubitet, is evolvat celebris nuper Theologi Lipsiensis, *Johannis Adami Scherzeri* Manuale philosophicum (b) aut alium libellum metaphysicum. Nec esse hodiernum inter Reformatos, qui idem sentiant, ex viri clarissimi, *Abrahami Pungeleri*, Theologiæ & Historiæ sacre in Lyceo Herbornensi Professoris, dissertatione de rerum possibilium ideis in Deo liquet, quam *Poireto* opposuit Scholasticis insultanti & essentias rerum arbitrias; hoc est, realitatem suam ex libero Dei placito mutuantes defendenti. Explicat ibidem vir doctus perinde ac nos possibile per id, quod contradictionem non involvit (c) & negans, possibilitatis & cognitionis omnium possibilium radicem & fundamentum esse Dei decretum, quo & futura voluit & novit, multis argumentis defendit (d), Deum possible vi naturæ & scientiæ simplicis intelligentiæ cognoscere, atque rerum possibilium ideas eidem naturales esse, profligatis tandem *Poireti* argumentis contrariis. Vocant Theologi scientiam naturalem, qua Deus ab æterno ante omne liberum decretum voluntatis cognovit res omnes posibles. Ita ex *Becani* Theologia Scholastica *Gerbardus* noster (e). Immo addit idem de suo, scientiam Dei necessariam sive naturalem (hæc enim synonyma esse quis ignorat?) præcedere omnem liberum divinæ voluntatis actum. Ceterum notatu dignum est, quod idem

(DIFFER. NEX. RER.)

E

Ger.

- (b) Part. 3. Tit. 1. Reg. 6. p. 11.
 (c) c. 1. p. 7. & seqq.
 (d) c. 2. p. 14. & seqq.
 (e) In locis Theolog. loc. 2. f. 314.

Gerhardus admirabundus quasi reprehendat *Scotum*, quod modum definiturus, quo fieri possit, ut Deus futura contingentia præciat, affirmet, *voluntatem divinam prius determinare contingentia, antequam illa intellectus divinus intelligat.* Cum autem in necessitate & æternitate essentiarum cum *Augustino* & Theologis per leges imperii auctoritatem consecutis consentiam; quæ inde petitur adversus meum systema objectio non me solum ferit, sed etiam illos in universum omnes, cumque per easdem imperii leges a crimine absit ea profiteri, non opus erat, ut in gratiam eorum, qui cum *Potresio* & aliis essentiarum arbitrariorum defensoribus a recepta doctrina discedunt ac cum *Spinoza* possibilitatem a voluntate divina arcessunt, illam diluerem. Faciam tamen ex superabundanti, ne in possessione veritatis prætenso confidere videar, qui non in auctoritate, sed in rationibus robur omne collocare soleo. Sunt nimirum, qui, essentiarum necessitate ac immutabilitate admissa, imaginantur quasi Deo sic omnis in creando adimeretur libertas. Ajunt enim, si tota ista possibilitatum series, quæ universum præsens constituit, possibilitatem habuit independentem a decreto divino, nec Deus per illud quicquam in ea immutare potuit, evidens omnino esse, quod Deus mundum non condere potuerit, prout ipsi volupe fuerit, sed prout idea immutabilis requisivit. Et, si vel maxime concedatur, quod plures istiusmodi rerum possibilitatum series fuerint, ex quibus Deus eam libere eligere potuerit, quæcunque ipsi maxime arrisit; hac ratione tamen difficultatem non tolli, cum quælibet series in se sit absolute necessaria, consequenter Deus semper producat mundum fatalis necessitatis, quamcunque tandem seriem elegerit. Qui hoc dubium urget, sui ipsius obliviscitur. Eodem enim jure, quo hic in universo fatalem necessitatem urget, in omnibus ejus actionibus fatalis & absoluta necessitas locum habere dicenda erit. Ponamus enim, te stantem alium eligere

gere debere corporis situm, vel motum. Plures sane æque possibiles sunt: potes enim sedere, potes cubare, potes ambulare, saltare, tripudiare &c. Possibilitas horum moruum & situum non pendet a decreto tuo, sed a corporis tui structura & natura. Possibilis est saltatio, etiamsi non saltabis; possibilis est ambulatio, etiamsi non ambulabis, & ita porro. Immo nisi per structuram & naturam corporis fieri posset, ut saltares, ut ambulares &c. nihil te juvaret decretum tuum. Decerne, si velis, volatum: num ideo volabis? Quodsi saltare decernas, num alia ratione saltare potes, quam fert corporis conditio? Nihil profecto in possibilitate saltus mutare tibi integrum: non aliter ad actum deducitur, quam ut ante eundem ab intelligente fieri posse concipitur. An igitur dicendum, quia possibile fuit ut saltares, antequam saltationem decerneres, & ubi eam decernis, non alia ratione saltare potes, quam qua possibile fuit, ideo saltationem non esse amplius actum liberum, sed fatalem & absolutam necessitatem involvere? Vides non valere consequentiam: si quod eligitur fuit possibile, antequam eligeretur, nec eligens, quod elegit, aliter ad actum deducere valet, quam quomodo possibile, illud ideo absoluta ac fatali necessitate gaudet, nec eligens in actione sua liber dicendus. Hæc enim est propositio generalis, sub qua obiectio contra libertatem Numinis in creatione universi & altera ipsi similis contra libertatem nostrarum actionum continetur. Sed reddenda mihi quoque est ratio, cur consequentia ista non valeat. Si nimirum valere deberet, aut admittendum foret, Deum posse facere impossibilia, quod absolum; aut concedendum, eundem simul posse aliquid decernere & non decernere, nimirum in executione mutare decretum, quod non minus repugnat, neque enim in Deo concipi potest ratio, cur aut poeniteret decreti, aut in executione corrigeret ac emendaret, quæ in melius mutari possent. Hæc in hominibus locum habent ob scientiæ ac potentiæ defectum:

E 2

ne-

nequaquam vero in Deo, qui vi omniscientiæ omnia adæquate cognoscit, & vi omnipotentæ existentiam largiri valet omni possibili seu contradictionis nescio. Quod si etiam libertatis notionem expendamus, satis superque constabit, eam non requirere, ut agens impossibilia efficere possit, nec in ejus præjudicium vergere illius, quod eligitur, cognitionem distinctam, immo adæquatam. Libertas nimirum Dei decernentis in eo sese exerit; quod ex innumeris possibilibus citra omnem coactionem externam, vel internam elegerit, quæ sapientiæ suæ infinitæ conformia judicavit, ut scilicet prodiret universum, quod esset speculum perfectionum divinarum: quæ in meo de finibus rerum Tractatu fufius persequor. Egit propter finem, dum condidit universum & ex omnibus, quæ fieri poterant, rerum possibilium combinationibus eam selegit, qua eundem optima ratione consequitur. Quis vero dixerit, agentem non esse liberum, propterea quod eligit media, quæ ad finem ducere possunt, & in executione ab iisdem plane non deviat? Etsi autem in meditationibus meis metaphysicis (f) exinde Numinis divini libertatem demonstræm, quod ipsum expers omnis coactionis externæ atque internæ ex pluribus mundis possibilibus elegerit fini, quem intendit, consequendo præ ceteris aptum; haud quaquam tamen ideo libertatem divinam in hac electione sola totam consistere statuo. Omnis actus liber præbet argumentum, quo libertatem agentis demonstrare possis; sed non ideo, qui hoc argumento utitur, omnem agentis libertatem ad hunc actum solum restringere dicendus est. Simili prorsus ratione ex quovis animalis motu arguitur ipsum vivere; sed dum hoc facis, quis jure dixerit, te statuere, quod vita animalis in illo unico motu consistat, quem observasti & unde ipsum vivere collegisti?

§. XIII.

(f) §. 980.

§. XIII.

Quemadmodum possibilitatem rerum ab intellectu Num de-
 Dei, ita existentiam ab ejus voluntate derivo, statuens ni-
 hil ex regione possibilium in numerum actualium trans-
 ferri nisi per decretum divinum (g). Cum vero illud rerum ne-
 ipsum sit immutabile, fieri non potest, ut non contingat, cessitatem
 quod Deus ut eveniat decrevit, nec posse fieri ut con-
 tingat, quod ut eveniat, Deus non decrevit (h). Ostendi
 autem decretum divinum in rebus nihil immutare, sed
 eas relinquere, prout in statu possibilitatis deprehendun-
 tur, necessarias nempe, quæ necessariae sunt, contingen-
 tes, quæ contingentes sunt, liberas, quæ liberae sunt (i):
 atque adeo vi decreti ejusdem quædam a DEO tantum
 permitti, ut a creatura, præsertim libera, fiant, quod ea
 ad fines suos vi sapientiæ dirigere possit (k). Quoniam
 Dei, qui falli nequit, dum futuros intuetur rerum even-
 tus, decretum immutabile non fert, ut quicquam eidem
 contrarium contingat; omnes rerum eventus certos esse
 adfirmo, seu, ut alii loqui malunt, hypothetice necessarios,
 atque adeo in istis hypotheticam necessitatem admitto,
 nequaquam vero absolutam seu geometricam, nempe ne-
 cessarium nunc est hæc talia evenire, propterea quod
 Deus his essentiis existentiam impertiri & corporibus has
 leges motus præscribere immutabili consilio decrevit.
 Qui sic universalem fatalitatem in eventus rerum intro-
 duci arbitrantur, recte sentientium judicio multum fallun-
 tur. Etsi enim *Spinoza*, fatalis necessitatis acerrimus prop-
 ugnator, quoque asserat, *si in decreto divino sit, ut res ali-*
qua existat, eam necessario existere; sin minus, impossibile ut
existat (§. 8.): non tamen ideo absolutam necessitatem &
 fatum tuetur, quod rerum existentia a decreto divino
 pendeat, sed quod idem decretum necessarium absolute
 statuatur & ab eodem quoque essentiam rerum derivet.

E 3

Deus

(g) §. 988. Met. (h) §. 999. (i) §. 970. 994. (k) §. 1058. & seq.

*Deus, inquit, non operatur ex libertate voluntatis (l), nec res ullo alio modo, neque alio ordine a Deo produci poterunt, quam productæ sunt (m). En decreti necessitatem! Quod vero possibile non admittat, nisi quod in decreto habetur, ut existat, superius jam docuimus (§. 8.). Qui rerum essentias, seu possibilitates ab existentia præcisas, a voluntate Dei arcessunt, illi ex parte cum Spinoza sentiunt: nos vero nihil cum ipso commune habemus, quin potius cum Theologis consentimus, quorum per decreta imperii stat autoritas. Videamus saltem, quomodo dogmata nostra cum iis conveniant, quæ a Theologis Augustanæ Confessionis addictis defenduntur. Sumamus exemplum eventus contingentis, nempe terminum vitæ. De eo scribit Bechmannus, celebris quondam Jenensium Theologus, qui eam potissimum laudem consecutus, quod dogmata theologica clare ac perspicue exponere valuerit (n): *Deus decrevit eum non decreto absoluto & immutabili, sed secundum cujuslibet hominis naturam & temperamentum. Sicut enim Deus ab æterno novit, quæ cujusque hominis sit natura, quale temperamentum sit habiturus, quamdiu duraturus sit, si secundum se & cum causis secundis spectetur; ita decrevit modo ordinario concursum præbere usque ad terminum naturaliter definitum, sive quem secundum naturam homo assequi potest. — Studio dico: si secundum se spectetur: nam si Deus prævidit causas quasdam peculiare, quæ impedimentum obiecturæ sint huic termino, quo minus homo eum attingere possit, Deus alium definit terminum, intuitu talis impedimenti. E. gr. si hominatio naturæ & temperamenti secundum se potuisset attingere annum quinquagesimum, Deus autem prævidit, hominem vitæ intemperantia sibi acceleraturum esse mortem ante annum quinquagesimum, v. g. anno trigesimo, Deus intuitu intemperan-**

(l) Ethic. part. 1. prop. 32. cor. 1 p. 29.

(m) loc. cit. prop. 33. p. 29. (n) in Annotat. ad Compend. Hutleri loc. 8. quæst. 2. §. 9. 200. 201.

rantia constituit ipsi hunc terminum, ut v.g. anno trigesimo moriatur. Mox addit: Terminus vitæ necessarius est, non tamen absoluta, sed tantum hypothetica necessitate. Posito enim, Deum exactissime præcivisse naturam & temperamentum hominis, quamdiu duraturum sit, nullasque prævidisse causas vitam ante hunc terminum abbreviaturas, decrevisse etiam ordinaria providentia & de lege communi concursum præbere, necesse omnino est, vitæ terminum futurum esse eo modo, quo Deus præcivit, alias præscientia Dei infallibilis non esset. Hæc vero est necessitas tantum hypothetica. Terminus vitæ inter rerum eventus refertur & Deus dicitur eum decrevisse. In decernendo eundem respexisse ad ideam possibilitatis in intellectu antecedenter ad decretum existentem, nec eum aliter definitum, quam eundem Deus possibilem agnovit. Decretum adeo non extenditur ad possibilitatem consequendi hunc terminum, sed ad existentiam tantum refertur ejus, quod ante decretum erat possibile. Dicitur præterea Deus in definiendo hoc termino hominem non considerasse absolute tantummodo, sed etiam in ordine ad nexum rerum sive in relatione ad causas secundas. Atque eventui huic inesse necessitatem hypotheticam, tum in natura rerum, tum in decreto divino fundatam, quatenus vi hujus Deus rebus per se tantum possibilibus existentiam largitur. Nimirum vi naturæ rerum terminus vitæ erat sic, non aliter possibilis, & vi decreti divini certo exiturus erat, Deo per concursum ordinarium rebus existentiam impertiente. Atque ita vides, omniscientiam Dei pariter ac ipsius decretum res tantum extrinsece afficere, nec quicquam in ipsis immutare, quemadmodum a me contenditur. Et idem quoque fatetur *Bechmannus*. Etenim præscientia, inquit (o), Dei rebus absolutam necessitatem non tribuit - - Necesse est necessitate hypothetica, ea esse futura, cum infallibilis sit DEI præ-

(o) loc. cit. loc. 2. quæst. 2. §. 14. p. 61.

præscientia. Necessitas autem hypothetica simul cum contingentia rerum consistit. Item: Decretum Dei non tollit contingentiam. Sed nec in eo a receptis Theologorum dogmatis recedo, quod Deum omnia unico decreto statuisse affirmem. Una ac simplici volitione Deus vult, inquit B. Gerhardus, quæcunque decernit ac facit, non multis realiter (p) distinctis voluntatis suæ actibus. Audi etiam Burmannum, celebrem ecclesiæ Reformatæ doctorem (q): Confilium Dei unicum tantum est. Quænam subest ratio? Addit eandem verbis sequentibus: Non enim longæ deliberationum moræ, secundæ ac meliores curæ ac penitūdines in Deum cadunt, neque rerum momenta denique ac occasiones speculatur atque ex iis pendet. Novi equidem Socinianos, cum præscientiam divinam negent non capientes, quomodo cum eadem contingentia & libertas actionum humanarum consistere possit, circa hominem & res singulares temporaria admittere decreta. Enimvero quid ad me Socinianorum errores? Quis eos normas constituit philosophandi? Esto ita, quod nonnullis acute philosophari videantur: ego aliter sentio. Mihi nunquam sese probavit ipsorum philosophia. Quodsi vero concesseris, quicquid decrevit Deus, ipsum ab æterno decrevisse, non sane video cur multi realiter distincti voluntatis actus sint admittendi.

§. XIV.

*An contingentia mun-
di a nobis
adserta sit
veri nominis
contingentia.*

Sunt qui sibi persuadent, contingentia a nobis adserta non esse veri nominis contingentia. Neque enim sufficere, quod alia forent, si Deus aliam mundi compagem produxisset, aliasque leges motus corporibus tulisset. Contingentia proprie sic dicta esse, quæ a causa libera pendeant, nec mechanisimi legibus subiaceant, sed pro libero causæ efficientis arbitrio possint fieri aut non fieri, & hoc aut isto modo fieri. Ego defendo, contingentia quoad exi-

(p) Loc. 2. § 152. f. 231.

(q) in Synopsi Theolog. lib. 1. c. 37. §. 20. p. 239. 240.

existentiam a causa libera pendere, non quoad essentiam, sed talia esse, etiamsi causa libera de existentia eorum nunquam cogiter. Si ergo mea contingentia non sunt contingentia veri nominis, necesse est ut, qui hæc statuit, eadem quoad essentiam a causa libera pendere arbitretur. Erit itaque aliquid contingens ideo, quod pro libero causæ efficientis arbitrio fieri possit aut non fieri, & hoc aut isto modo fieri. Ergo contingentia & absolute necessaria non habent principium intrinsecum, quo differunt, consequenter in se prorsus non differunt. Ego potius dixerim, a causa libera aliquid posse fieri hoc, vel isto modo, quia contingens est. Nec video, quid contingentia oblit, ut aliquid legibus mechanis subiaceat. Nonne ambulatio in numero contingentium habetur? Quidni? Homo enim potest ambulare & non ambulare, hoc est, vel sedere, vel stare, vel saltare &c. Sed quis dixerit, mechanis legibus non teneri ambulantiem? Num quis aliter ambulare valet, quam fert structura corporis, ac per Staticæ ac Mechanicæ regulas integrum? Mirum dictu! Erit ergo actus ambulandi minime contingens, quod pedes non longiori intervallo a se invicem dimovere possis, quam fert eorum longitudo. Si hæc videntur absæona: dicendum est, definitionem intelligendam esse de existentia, non de essentia seu possibilitate ab existentia præcisæ, hoc est, eundem in meam sententiam. Sed tunc non capio, quid sibi velint hæc verba: *hoc aut isto modo fieri*. Modus enim, quo aliquid fit, ad possibilitatem pertinet, non ad existentiam. Pendent quoque juxta me contingentia quoad existentiam a causa libera: atque ideo a contingentia universi quoad existentiam ad causæ liberæ, Dei nempe, existentiam argumentatus fui (§. 3.). Mechanismus vero tantum abest, ut contingentia oblit, ut potius ejusdem fons sit. Etenim vi structuræ mechanicæ corporis humani & vi regularum Staticæ ac Mechanicæ varii ejus situs atque motus possibiles sunt, atque

(DIFFER. NEX. RER.)

F

adco

adeo nullus eorum corpori absolute necessarius. Nihil vero ad hoc confert mentis liberum arbitrium, quo tantum determinatur existentia ejus, quod possibile vi mechanismi. Contingens adeo qua tale a mechanismo pendere potest, etsi a causa libera ad existendum determinetur. Quodsi urgeas vi harmoniæ præstabilitæ actiones humanas e contingentium numero eximi; mihi quidem id non videtur: neque videtur aliis, qui hoc systema intelligunt, etsi idem non amplectantur. Sed de eo dispi-ciemus infra suo loco. Neque enim hic nobis sermo est de contingentibus in relatione ad hominem, sed potius in relatione ad DEum, cujus gratia universi corpori contemplatio instituitur, ut exinde Dei existentia demonstretur, quam ex mundi in se contingentis existentia deducimus (§. 3.). Quamvis autem vel maxime verum esset, quod tamen toto coelo a veritate distare infra monstraturi sumus, cum systemate harmoniæ præstabilitæ actionum humanarum contingentiam subsistere non posse; haud tamen ideo dici poterat, contingentia a me definita non esse contingentia veri nominis, nec me in universo admittere vera contingentia, sed cum *Spinoza* absolutam ac fatalem necessitatem defendere, cum notio contingentia a me stabilita eadem sit, quam, improbante *Spinoza*, animo conceperunt Philosophi ac Theologi, quotquot a fatali necessitate fuerunt alieni, atque ex ea notione contingentiam totius universi omniumque eorum eventuum, qui a causis mechanicis pendent, demonstravi. Quodsi quis opinetur, hac contingentia admissa, corruiere contingentiam eorum, quæ a causa agendi libera in universo jam constituto, v. gr. ab homine, dependent, immo negandum esse ipsam Dei hominumque libertatem ac providentiam, atque hanc consequentiam tanta evidentia gaudere, ut probatione non indigeat; cum de legitima consequentia sermo sit ex Logicæ regulis dijudicanda, breviter respondeo: Fiat syllogismus. Probetur major, probetur minor.

Fa-

Faciamus ejus rei periculum, ut, quæ illationi insit evidentia, adpareat.

Quodcunque ens produxit mundum ex istiusmodi corporibus, quorum loco alia producere poterat, eaque hoc modo inter se locavit, cum multis aliis locare posset, immo leges motus præscripsit, in structuris corporum & notione materiæ in genere minime fundatas, cum alios præscribere posset; illud non est liberum. Atqui Deus &c. Ergo &c.

Paucos fore puto, qui sinceritate usi majorem concedent. Eodem modo se res habet, si inde homini libertatem denegare, aut providentiam divinam tollere volueris. Quod si excipias, eventus rerum materialium in universo esse necessarios, & quidem absolute (hypothetica enim necessitas, consentientibus Theologis (§. 13.) contingentiam non tollit) quoad mundi partem materiale[m] cum *Spinoza* facis & fatalem necessitatem introducis, Dei in creando libertatem limitas eamque ad solam existentiam restringis, ut cetera taceam, quæ inde prono alveo fluunt, ne consequentiis pugnare videar, quod a moribus hominis æqui atque ingenui alienum. Si porro instas, vocare eventus rerum in universo ideo contingentes, quod universi machina aliter constitui aliisque legibus regi potuerit, idem esse ac feriem motuum mechanicam, quæ in horologio sit necessaria, ideo vocare contingentem, quia horologium potuerit aliter construi & ex alia constructione alium motuum ordinem habere: me non invitum habebis, nec quenquam alium, qui ex notionibus judicat, siquidem absolute necessarium non fuit, ut hæc motuum series existeret. Dicuntur hi motus necessarii in oppositione ad libertatem & respectu essentia, non autem respectu existentia. Horologium non libere agit, sed ex necessitate essentia, ac natura, hoc est, structuræ suæ ac legibus motuum convenienter, atque ad hunc agendi modum per essentiam & naturam determinatum libertatis expers est,

F 2

cum

cum non locus sit principio, quo agens seipsum determinet, ubi jam ad agendum sufficienter determinatum: his tamen non obstantibus, contingenter agit, cum enim existentia ejus sit contingens, omnes quoque ipsius motus contingenter existunt, non necessario, nisi quod ob necessitatem sic, nec aliter agendi, hypothetica necessitas adsit. Immo simile hoc egregie præsens negotium illustrat & fallitatem consequentiarum modo memoratarum evidentissime illustrat. Compone nimirum horologium cum mundo, rotas aliasque, quibus constat, partes cum corporibus totalibus, artificem cum DEO & omnia erunt manifesta. Quemadmodum itaque hoc horologium ideo non necessario existit, quod ejus loco artifex aliud ab eo diversum producere poterat, similiter quoque hoc universum ideo non necessario existere intelligitur, quod ejus loco aliud a Deo produci poterat. Porro quemadmodum artificis non impossibile in structura horologii quædam immutare, quando ipsi visum fuerit, propterea quod alia structura in multis cum ea conveniens, in paucis quibusdam differens æque possibilis; ita quoque Deo non impossibile in mundi fabrica, siquidem ipsi visum fuerit, quædam immutare, propterea quod alia mundi structura in plurimis cum præsentī conveniens, in paucissimis quibusdam differens æque possibilis. Quemadmodum artifex, structura horologii salva, motum vel indicis, vel alterius partis, siquidem visum fuerit, mutare valet, propterea quod is equidem structuræ horologii convenienter fiat, haud quaquam tamen necessario ex ejus structura sequitur; ita DEUS, structura universi atque corporum partialium salva, siquidem visum fuerit, motus quosdam mutare valet, propterea quod ii structuræ quidem universi ac corporum convenienter accidunt, haud quaquam tamen per eam solam determinantur. Apparet itaque contingentiam universi a me adsertam idem non subducere causæ liberæ, quin potius ex ea demonstrativa quadam ratione sequi, quod

quod causæ liberæ potestati relinquatur. Hæc adeo manifesta sunt, ut, nisi adit causa, quæ impediatur, ne verum cernatur, nullus ea in re scrupulus superesse possit. Facillimo negotio eodem simili miraculorum effectum ac indolem illustrare poteram; sed cum id jam fecerimus in ipsis meditationibus metaphysicis, iis repetendis superfedemus. Quodsi jam ulterius quæseris, num aliquando consultum videatur DEO quicquam vel in structura totius universi, vel in structura corporum mundi partialium, vel in motu sive totalium, sive partialium per concursum extraordinarium seu diversum ab eo, quo res in essendo & operando constanter conservantur, immutare, ea alterius generis quæstio est, quæ non ex contingentia notione, sed aliunde decidenda. Potest autem illud fieri, potest non fieri, salva contingentia: neque enim contingentia universi ab hac mutatione actuali, sed hujus potius possibilitas ab illa pendet.

§. XV.

Quod quæstionem hanc attinet, num DEUS aliquando quidpiam in structura universi immutet, aut motus quosdam corrigat, eam in meditationibus meis metaphysicis non attigi, cum in Cosmologia metaphysica in iis acquirat Deus quieverim, quæ ad demonstrandam Numinis existentiam & ejus attributa sufficiunt. Ista vero quæstio ex attributis divinis potius decidenda, tantum abest, ut ipsa ad eadem demonstranda quidpiam conferat. Unde porro patet, quod ne quidem commode ibidem decidi potuerit, non dum provocare licet, ubi eadem nondum fuerunt demonstrata. Quodsi urgeas, correctionem istam a posteriori demonstrari posse; lubens fateor, nullum mihi suppetere exemplum, quo probari possit. Si cui quædam in promptu sint, quæ huc facere ipsi videntur, ut eadem communicet rogo certissime persuasus, me non ex præcipitania de iis judicaturum, sed ipsa potius rigorofo examini

mini submissurum. Neque enim ego præjudicio alicujus hypotheseos teneor: mihi quidem perinde est, quod verum sit, modo tale esse demonstretur, ut intellectus ad assensum cogatur. Si quis arbitretur, ex sacris litteris machinæ mundanæ correctiones probari posse; silentium meum tanto æquiori animo feret, quod ex rationis principiis aut experientia demonstrare non aggressus sim, quæ fide tenenda in Theologia, non in Philosophia doceri debent. Qui quæstionem aliquam non attingit, non ideo dicendum est rem negare &c, si vel maxime neget, quod fiat, propterea non pro impossibili eandem habet. Quo jure autem reprehendi possit, si possibilitatem ipse ostenderit, de eo judicent alii. Ego nullibi professus sum, quod Deus machinam suam subinde corrigat, sed quod possit, si velit, quædam immutare, ostendi (§. 4.). Quod si autem confiteri jubeor, quæ mihi ea de re verior videatur sententia, negativam amplecti religioni non duco. Quæ enim subest ratio, cur artifex quædam in structura horologii emendet, aut alius quicumque vi externa indicem dirigat? Non alia profecto, quam quod experientia docetur, structuram horologii nondum esse adeo perfectam, ut per eam finem intentum consequatur, nempe ut horologium exacte indicet temporis labentis momenta. Quod si ergo prævidisset, horologium, quod parat, successu temporis defecturum, nullum quidem est dubium, quin statim eam ejus fecisset structuram, quæ, errore per experientiam cognito, per emendationem prodit. Si autem agnovisset, horologium adeo perfectum construi non posse, quod absque aberratione per omne tempus, quo moveretur, temporis momentum indicare possit; tum quidem sciens indicis directionem motori externo reliquisset. Quoniam Deus rebus in universo singulis præfixit fines iisque structuras convenientes dedit, regulis quoque motus præscriptis ad eos consequendos idoneis; mihi quidem totum universum ita construxisse videtur,

ut

ut sine emendatione ac sine extraordinaria directione unumquodque finem sibi præscriptum consequatur. Aut enim DEus hæc facere potuit, aut non. Si potuit facere, fecit: neque enim ulla suadet ratio, cur statuamus, DEum mundum ita effecisse, ut emendatione opus habeat ac extraordinario concursu, cum tanta perfectione condere posset, ut sine emendatione & extraordinaria directione finibus a se intentis satisfaceret. Suadet potius contrarium finis totius universi primarius in demonstranda gloria divina consistens. Rectius enim agnoscitur omniscientia, sapientia, potentia & bonitas divina, si operi suo omnem perfectionem dedit, quem a fine requisitam dare poterat, quam si minorem largitus. Hoc enim perinde esset, ac si elegisset media ad finem consequendum non prorsus apta, cum aptissima nosset ac eligere posset. Si non potuit tantam mundo impertiri perfectionem, aut aberrationes a scopo non prævidit, aut fieri non potuit, ut per rerum structuras emendatiores eas præcaveret. Prius Sociniani defendunt, qui præscientiam divinam negantes particularibus decretis locum faciunt: posterius nemo hætenus demonstravit, nec ulla ratione probabile reddere potuit quispiam, hoc tantum artificium esse sapientia & potentia divina superius. Ego, qui a Socinianorum hypothesibus maxime alienus, in summi autem Numinis gloriam pronus, haud facile ve-reor, ne in extollenda sapientia & potentia sum nimius: immo facillime condonarem errorem, si quis in re dubia sapientiam & potentiam DEI ad impossibile vel maxime extenderet. Vanus est metus, quod, si DEus omnia finibus suis convenienter in caulis suis prædeterminasse dicatur, ut particularibus decretis ad emendationem & extraordinarias directiones non habeat opus, providentia specialis corruat, aut prorsus fatali necessitati locus fiat. De posteriori pudet dicere, cum absolutæ ac fatalis necessitatis notio huc non quadret, sed locum tantum habere

ne-

necessitas hypothetica, quæ, ut supra notatum est, Theologorum judicio cum contingentia & libertate consistit (§. 13.). Quod vero providentiam specialem attinet, case in eo exerit, quod eventus rerum in hominum commodum & incommodum dirigantur, prout conveniens videtur sapientiæ divinæ. Nonne igitur perinde est, siue Deus, quæ infinita est ipsius sapientia & potentia, universum ita constituit, ut eventus finibus convenientes justo accidant tempore; siue res vi ordinis naturæ aliorum tendentes retrahat quasi e cursu suo & in aliam plagam dirigat. V. gr. Ponamus Zephyrum continuo pluere, damna daturum frugibus. Ponamus preces fundi ad DEum, ut det serenitatem. Ponamus denique Solanum reducere serenitatem. Annon perinde DEus axaudivisse dicendus est preces supplicantium, siue naturæ eum fecerit ordinem, ut tunc præcise temporis, quo preces ad eum fultum iri per præscientiam suam præviderat, Zephyrus vices cum Solano commutaret, siue tunc demum, quando preces funduntur, peculiari quodam decreto facto, extraordinario quodam concursu Zephyrus in Solanum vertatur naturaliter non subssecuturum. Ego nullum video in directione eventus ad hominis precantis salutem discrimen nisi extrinsecum, scilicet quod in priori casu directio fiat per concursum ordinariam, posteriori autem per miraculosum. Ipsa eventuum directio experientia comprobatur, an vero concursu ordinario, an extraordinario fiat, non item. Quantum tamen causas rerum naturalium scrutari licet, nunquam desunt effectuum naturalium causæ secundæ, ut adeo probabilitas sit, etiam si ad experientiam tantum attendas, DEum in hac quodque directione ordinario suo concursu uti. Quod si regeras, si in nostro casu jam is sit naturæ ordo, ut Zephyrus cum Solano vices suas commutet, frustraneas esse preces, atque Zephyrum vices traditurum Solano precibus nullis ad DEVM fultis. Miror hanc objectionem! Nonne DEVS prævidit homi-

homines tum preces ad ipsum fusuros esse, cum in eorum gratiam eum efficeret naturæ ordinem, ut Zephyro Solanus succederet, & intuitu harum precum hæc ita constituit, cum posset aliter? Cumque præscientia DEI sit infallibilis, num fieri potest, ut Zephyro pluvie preces non fundantur? Qui intelligit, quæ Theologi docent præscientiam divinam adversus Socinianos tuentes, inani hoc metu minime angitur. Ceterum ne ea, quæ dixi, perversæ interpretationi obnoxia fiant, tenendum est, me hæc intelligere nonnisi de regno naturæ, nequaquam vero de regno gratiæ. Philosophus enim in iis acquiescit, quæ naturalis luminis vi deteguntur: quæ autem divinitus revelata ex scripturis sacris hauriuntur, ea Theologis discutienda relinquit. Mirum tamen videri debet, quod, si quis, Socinianorum decretis temporariis rejectis, largitur, quæ a Deo fiunt in tempore, ea ab æterno fuisse decreta & essentias sive possibilitates rerum a decreto seu voluntate ipsius derivat, hoc tamen non obstante neget, mundum a Deo ita fuisse factum, ut finibus consequendis esset aptus, citra quandam emendationem in structuris rerum aut correctionem in motu: neque enim is causari potest, mundum tam artificiosè constructum esse sapientia divina ejusque potentia superiorem, cum potentiam non metiatur ex possibilitate, sed possibilitatem potius ex voluntate, cui potentia æquiparatur. Quis enim ignorat, Deum facere posse, quæcunque vult? Si qui vero ulterius contendunt, si omnes rerum materialium eventus in causis suis determinati sint, mundum fore machinam, quæ sibi relicta suas res agat, nec manu DEI auxiliatrice habeat opus, sicque concursum divinum corrumpere: ad hoc dubium jam sufficienter responsum est alibi. Repetam tamen breviter, quæ e re sunt. Tenendum itaque, horologium in motu suo non requirere manum auxiliatricem artificis, propterea quod motus ejus per structuram sufficienter determinati sunt, sed quod constet ex materia, quæ ab ipso

(DIFFER. NEX. RER.)

G

ut

ut conservetur non habet opus. At quod substantiale est in universo vi propria existere nequit: eget adeo ad existendum divino continuo influxu. Quamobrem & conservatio continuata creatio dici solet, cum eadem virtute opus sit ad conservandum, qua opus erat ad creandum. Qui essentias rerum necessarias ipsasque perinde ac attributa earundem incommunicabilia statuunt, juxta eos implicat, ut DEus creaturæ impertiatur vim, qua citra ipsius continuum influxum per se subsistere possit. Cum enim existentia necessaria sit attributum essentiae divinae, cum eadem reciprocabile, & propria vi existere idem sit ac necessario existere, si DEus diceretur creaturæ communicare vim existendi propriam, id perinde esset ac si eidem communicaret attributum divinum, hoc est, ens ab alio converteretur in ens a se. Qui essentias & veritates arbitrarías admittunt, talia ipsorum hypothésibus non invitis comminisci possunt: sed non est id facere integrum essentiarum necessariarum propugnatoribus. Ecce igitur tibi, quomodo per ea, quæ nos defendimus, principia concursus DEI continuus ad omne, quod positivum est in creatura, demonstrativa quadam ratione consequatur, & per rerum prædeterminationem in causis suis omniscientia, sapientia & potentia DEI in immensum extollatur ultra omne id, quod cogitari potest. Quomodo vero supra ostendimus, nos quoad essentias rerum necessarias fulciri auctoritate Theologorum, quorum per leges imperii stat auctoritas (§. 12.), ita nec eadem deficit circa prædeterminationem. Quis enim ignorat, Theologos contra decreta Socinianorum temporaria ob negatam præscientiam divinam disputantes admittere contingentium esse determinatum & ex hac determinatione præscientiæ divinæ possibilitatem arguere? Si quis vero fuerit adeo hospes in Theologia, ut ea ignoret, is evolvat *Bechmanni* supra laudati annotationes in *Husteri* Compendium. *Deus,*
in-

inquit (r), futura, quæ decrevis, cognovit quoad esse suum determinatum, siue quia determinate fuerunt futura. Hoc esse autem omnibus futuris contingentibus est commune. Et ut adpareat, hoc esse determinatum non esse diversum a prædeterminatione in causis suis, adde quæ paulo inferius (s) habet: Præsciri possunt, quatenus certo a causa sunt producenda adeoque certo futura. Præclare quoque in rem præsentem D. Augustinus (t): Non est consequens, ut, si Deo certus est causarum omnium ordo, ideo nihil sit in nostræ voluntatis arbitrio & ipse quippe nostræ voluntates in causarum ordine sunt, qui certus est Deo ejusque præscientia continetur, quoniam & humane voluntates humanorum operum cause sunt, atque ita qui omnes rerum causas præscivit, profecto in eis causis etiam nostras voluntates ignorare non potuit, quas nostrorum operum causas esse præscivit. Quomodo ergo ordo causarum, qui præscienti Deo certus est, id efficiat ut nihil sit in nostra voluntate, cum in ipso causarum ordine magnum habeant locum nostræ voluntates. Apparet adeo, præstantissimum quoque hunc ecclesiæ Patrem admittere causarum ordinem & eventuum in suis causis prædeterminationem, vi cujus a Deo hunc causarum ordinem adæquate intelligente præsciri potuerint.

§. XVI.

Cur causarum ordine in universo fuerit opus, ex natura contingentium in meditationibus meis metaphysicis clarissime ostendi (u). Nimirum cum contingens, fatalem ne-
propterea quod ejus oppositum aequale ipsum possibile, cessitatem
per essentiam ad existendum determinatum non sit, causa & independen-
opus habet, ut existat, hoc est, necesse est detur extra dentiam
contingens ens quoddam, quod rationem existentie sufficiens mundi a
sufficientem alterius in se contineat. Quodsi causa hæc Deo infusa
G 2 itir.

(r) Loc. 2. quæst. 2. §. 4. p. 58.

(s) Loc. cit. §. 13. p. 61.

(t) lib. 5. de Civitate Dei c. 9. (u) §. 579.

itidem fuerit contingens, & ipsa causa aliqua opus habet ad existendum. Quamobrem si contingens aliquid naturaliter existere debet, opus est nexu seu ordine causarum infinito. Idem sentit celeberrimus noster *Hoffmannus* (x), dum scribit: *In rebus contingentibus causarum progressio fit in infinitum, nam una causa semper est effectus alterius causæ.* Cum *Spinoza* (y) doceat, quodcumque singulare, sive quamvis rem, quæ finita est & determinatam habet existentiam, non posse existere, nec ad operandum determinari, nisi ad existendum & operandum determinetur ab alia causa, quæ etiam finita est, & determinatam habet existentiam: & rursus hunc causam non posse etiam existere, neque ad operandum determinari, nisi ab alia, quæ etiam finita est, & determinatam habet existentiam, determinetur ad existendum & operandum, & sic in infinitum: quidam verentur, causarum seriem infinitam ad existentiam contingentis requirentem in *Spinosismum* delabi, immo regressum in infinitum admittere, omnem libertatem & actionum moralitatem tollere, existentiam Dei sublestatam reddere & mundi æternitatem statuere. Quamvis acerba sit accusatio, facillima tamen est defensio. Etenim 1. in genere absurdum & a moribus hominis ingenui alienum censetur, si cuius asserta cum verbis Autoris damna ti conferantur; quæ illa dogmata non attingunt, ob quæ censuram meritis. *Spinoza* Autor damnatus habetur, quod naturam cum DEO confuderit, omnium rerum fatalem necessitatem defenderit, nec DEO, nec homini libertatem agendi concesserit, Christianæ religionis mysteria & omnia in universum miracula negaverit; non vero quod dixerit, naturaliter contingens existere non posse nisi per nexum seu ordinem infinitarum causarum. Deinde 2. tenendum est, me & Collegam venerandum *Hoffmannum* non docere, dari progressum causarum in infinitum actum, sed

(x) Tom. I. *Medic. ration.* p. 44.(y) *Ethic.* part. 1, prop. 28, 25.

sed nos tantum, ubi de veritatum analysi agimus, affirmare, si contingens quodpiam sola vi naturæ existere deberet, illud ad existentiam pervenire non posse nisi admissa infinita causarum serie; atque ea in re differentia inter nos & *Spinosam* intercedit, qui progressum in infinitum actuale defendit. Tantum adeo abest, ut existentiae divinæ a nobis præjudicium fiat, ut potius 3. ad eam firmissime demonstrandam viam sternamus. Etenim cum facillime ostendi possit, seriem causarum contingentium in infinitum non continere rationem sufficientem existentiae contingentium, recta via sic deducimur ad causam primam, quæ extra contingentium seriem existens rationem existentiae contingentium sufficientem continet, hoc est, ad DEum. Porro 4. si quis vel maxime, quem DEum admittere aliunde constat, asserat, contingentium existentiam supponere seriem causarum innumerarum (ut ego locutus sum) aut earum progressionem fieri in infinitum, ut Cel. *Hoffmanni* verba habent: non tamen ideo dicendus est cum atheis ad incrustandum atheismum progressum in infinitum statuere. Quis enim nescit, infinitum hoc in casu esse modum loquendi & designare numerum, qui a nobis definiri nequit? Poteram & hac responsione esse contentus, nisi revera longius prospexissem, quemadmodum modo notatum est. Denique 5. quod ideo a nobis libertas & actionum moralitas tollatur & mundi æternitas defendatur, id quidem per se in auras abit.

§. XVII.

Dixi DEum esse ens, in quo continetur ratio sufficiens existentiae universi, & hanc definitionem ejus non auctoris Dei definitivam dedi in meditationibus meis metaphysicis, quod nomen nominam a contingencia universi ad existentiam DEI arguatur sit *Spinosam* (§. 3.). Evidens equidem est, *Spinosam* definitivam DEI esse ab hac prorsus diversam, nec cum hypothelibus ejus consistere: sunt tamen, qui ex *Spinosam* hau-

itam esse arguantur. *Spinoza* (z) DEum definit *per ens absolute infinitum*, hoc est, *substantiam constantem infinitis attributis, quorum unumquodque eternam & infinitam essentiam exprimit*. Hanc definitionem cum mea non esse eandem, per se liquet. Sed quod definitionem meam *Spinoza* admittere non possit, salvis suis hypothesibus ex superioribus patet. Etenim is non admittit istiusmodi contingentiam universi, qualem ego defendo, adeoque nec admittere potest ens, in quo eiusmodi contingentiae ratio sufficiens continetur. Sed ecce tibi, quomodo probetur, definitionem meam cum *Spinoza* placitis convenire. Inter ejus propositiones de DEO habetur etiam (a) sequens: *Quicquid est, in Deo est & nihil sine Deo esse, nec concipi potest*. Jam rationem existentiae universi sufficientem continere, idem esse dicitur ac in Deo esse. Patet ergo si superis placet! consensus cum *Spinoza*. Etsi autem crimen non haberet, quod accusationem meretur, si mea DEI definitio cum hac *Spinozae* propositione consentiret, namque & in sacris literis totidem verbis legitur (b), *nos in Deo esse*: qui tamen definitionem meam ex notionibus a me explicatis interpretatur, is statim intelliget, in DEO esse & rationem sufficientem existentiae contingentis, de qua hic sermo est, in DEO habere, non esse unum idemque. Etenim *per rationem* (c) ego intelligo *id, ex quo perspicitur alterum esse possibile*. Rationem ergo existentiae suae in DEO habere quando dicitur mundus, perinde est, ac si affirmarem, esse in DEO aliquid, unde intelligi possit, quomodo mundus in se contingens existentiam nactus fuerit. Equidem non minus crimen habetur, quod in hac definitione creationis & quidem in sensu genuino seu communi nulla fiat mentio. Enimvero quis Logicus eam de-

(z) Ethic. part. I. def. 6, p. 1.

(a) Ethic. part. I. prop. 12, p. 15.

(b) Act. XVII, 28. (c) §. 29. Met.

definiendi legem tulit, quod in definitione alicujus substantiæ mentio fieri debeat omnium ejus actionum? Et, si quis Logicus talem legem ferret, ego tanquam genuinis Logicæ regulis ac accuratiori methodo adversam rejicerem. Immo si necessitatis est, ut in definitione DEI nominali creationis expressa mentio fiat; cur non etiam mentio fieri debet conservationis, cur non redemptionis, justificationis, sanctificationis &c. ne talem definivisse dicaris Deum, quem etiam homines a Christianismo alieni admittunt? At urges præterea, cum hac definitione consistere hypothelin de æternitate mundi, quæ constanter atheismi fundamentum fuerit habitum. Cum ex mea definitione non sequatur, mundum esse æternum; difficultas eo redire videtur, quod ex ea demonstrari minime possit, mundum non esse æternum. Sit ita! sed quid tum? Quis Logicorum unquam docuit, definitionem nominalem substantiæ ita esse concipiendam, ut omnes ejus operationes inde demonstrari possint. Ceterum nondum evicta est impossibilitas demonstrandi ex hac definitione, mundum non esse æternum. Ast instas, me (d) mundo æternitatem tribuere, quod dixerim, ex principiis rationis difficulter demonstrari posse, immo publice hæcenus demonstratum non esse, quod genus humanum aut mundus coeperit. Qua, quæso, consequentia id infertur? Deinde tenendum est, me cum D. Thoma sentire. Is enim (e) disertis verbis pronunciat, *mundum non semper fuisse, demonstrative probari non potest, & ita sola fide tenetur*. Immo idem asserit Paulus (f) & D. Thomas ideo monet, *ut caveant, qui demonstrare contendunt, ne afferant rationes*, QVÆ DENT OCCASIONEM RIDENDI. Et meo quidem judicio rectius illis sentit, qui a tot Scriptoribus e principiis

(d) in Rat. Prælect. sect. 2. c. 3. §. 43. p. 156.

(e) Sum. Theol. part. 1. quæst. 46. art. 2. Concl. 1. p. 96, apud Carbonem.

(f) Hebr. XI, 3.

piis rationis solidissime id demonstratum esse affirmant. Nam quæ ego vel recentissime in hoc genere pro demonstrationibus venditari vidi, ea mihi & aliis occasionem ridendi dedisse sancte confiteor. Monui autem in *Metaphysicis* (g), non opus esse ut cum atheo de æternitate mundi ferram contentionis reciprocemus: etenim si vel maxime concedamus interea, mundum esse æternum, nihil tamen inde adversus DEI existentiam concludi posse, cum mundi æternitas prorsus diversum quid sit ab æternitate DEI, quia infinitum tempus non idem cum æternitate proprie sic dicta. Quamvis autem hoc adsertum dedecere Philosophum Christianum quasi attoniti judicent nonnulli; denuo tamen cum *D. Thoma*, quem veritatis Confessorem nostrates venerantur, eandem sententiam amplector. Ait enim apud *Carbonem* (h): *Licet mundus semper fuisset, tamen non parificaretur Deo in æternitate: quia esse Dei est æternum sine successione.* Causæ DEI rectius consulunt, qui in demonstranda Numinis existentia caute procedunt; quam qui quascunque ratiunculas pro demonstrationibus venditant & quod argumenta sint ad convincendum valida consensu nunc plurimorum, nunc omnium prudentiorum probant, quasi vero argumentum aliquod ex votorum pluralitate robur suum nancisceretur. Ceterum quæ ego cum *D. Thoma* de discrimine inter æternitatem DEI, & æternitatem mundi docui, eadem suo quoque calculo probat Theologus & Philosophus Anglus insignis, *Samuel Clarkius*, *Joannis* supra (§. 9.) laudati frater, in libro de existentia & attributis DEI, ut adeo adpareat, etiam in Anglia Theologos acumine præditos cum Doctore angelico consentire.

SECT. II.

(g) §. 1075. (h) loc. cit. concl. 6, p. 97.

SECTIO II. DE DIFFERENTIA SYSTEMATIS HARMONIAE PRAESTABILITAE ET HYPOTHESIUM SPINOSAE.

§. XVIII.

Systema harmoniae praestabilitae invenit mortalium *Systematis*
ingeniosissimus, *Godofredus Guilielmus Leibnizius*, *harmonia*
aeternum Germaniae decus, quem inter summos Phi-
losophos referendum esse unanimi ore consentitur, *historia* &
quotquot de meritis virorum egregiorum in scientias ju-
dicare datum, ac nuperrime suo quoque calculo con-
firmavit celebris apud Lugdunenses Philosophus *Grave-*
sandius (a). Incidit in hoc ingeniosum profecto inven-
tum tanto viro dignissimum jam seculo superiore, idque in
Diario eruditorum Gallico A. 1695. mense Junio & Ju-
lio primum publici juris fecit, cum ultra decem annos
pressisset, ut adeo nihil praecipitasse dicendus sit. Reve-
rendi Patres Societatis Jesu, Diarii Trevotiensis autores,
cum Theodicæam recensent, in hoc opere vastissimi inge-
nii & eruditionis praestantiam singularem undiquaque eni-
tescere falsi illustrique Autori ingenium meditationes suas
ad rationis trutinam exigere natum tribuentes, ubi qua-
dam ipsius principia se probare non posse monent, sub-
moleste v. gr. videntes *Lutheri* librum de servo arbitrio
adversus *Erasmum* ab eodem probari, mox addunt (verba
recito ex versione Latina, quam dedit Theodicæae inter-
pres in praefatione ad opus egregium, communi omnium
applausu exceptum:) *Sea horum in numero ingeniosum har-*
moniae praestitutæ systema minime profecto reponimus: est
enim illi systemati per omnia non assentiamur, ac certe id liber-
(DIFFER. NEX. RER.) tati

(a) in praefat. ad institutiones Philosophiae *Newtonianae*.
(b) p. 143 edit. Bat.

sati humana valde favere nobis est persuasissimum. Academiae Regiae Scientiarum Secretarius, *Fonsellius*, vir in omni scientiarum ac eruditionis genere versatissimus, systema harmoniae praestabilitae, inventum Philosophis prorsus inexpectatum, infinitae scientiae creatoris ideam prorsus admirandam exhibere fatetur in Elogio, quod in consessu Academicorum, virorum in omni Gallia eruditissimorum, recitavit & Historiae illius Academiae, quam pro Anno 1716. edidit, inseruit. Celeberrimus Dictionarii Critici Autor, *Petrus Badius*, cujus in judicando acumen praedicant omnes, postquam objectiones quasdam in hoc systema proposuisset, tandem omnem discursum his verbis concludit (c): *Mr. Leibniz par la penetration de son grand genie - - applanira tout ce, qui pourroit être de plus scabreux dans son systeme & qui nous apprendra d'excellentes choses sur la nature des esprits. Personne ne peut voyager plus utilement, ni plus surement que lui dans le monde intelligible. J'espere, que ses beaux éclaircissements feront disparoître toutes les impossibilitez, qui se montrent jusques ici à mon imagination, & qu'il résoudra solidement mes difficultez & même celle de Donn François Lami, & c'est dans cette esperance, que j'ai pu dire, sans compliment, que son systeme doit être considéré comme une conquête d'importance.* Vides adeo *Badium* contra *Leibnizianum* systema quaedam objicientem certissima spe fretum, fore ut *Leibnizius* pro summa ingenii profunditate objectionibus suis & aliorum ex affectu satisfaciatur, nec adeo eas pro insolubilibus habere, multo minus tales agnoscere, quibus systema funditus evertatur. Vides eundem lubentissime fateri, difficultates contra idem propositas imaginationi, non rationi deberi, adeoque veri tantum speciem quandam praese ferre. Vides eundem systema, de quibus jam nobis sermo est, inter inventa maximi

(c) in Diction. Histor. & Crit. Tom. 3. f. 2484. edit. Roterod. A. 1721.

ximi momenti referre, ut inventor herois inter eruditos locum ob id tucatur. Vides denique eundem agnoviſſe, quod nemo *Leibnitio* utilius & ſecurius in pnevmaticis verſari potuerit. Audiamus quoque judicium alicujus Theologi ex proteſtantium numero. *Jaqueſotus*, qui in religione naturali & Chriſtiana defendenda præclare verſatus, rationibus pugnans, non clamoribus, non jurgiis, non convitiis, non conſequentiis ad arbitrium effictis, quemadmodum ſolenne eſt iis, qui rationum momenta expendere neſcientes de rebus, quas non intelligunt, judicandi poteſtatem proterve ſibi ſumunt, in egregio de fidei & rationis conſenſu libro (d) fateatur, *ſyſtema cauſarum occaſionalium Carteſii a tot jam dudum Philoſophis & Theologis in hunc uſque diem deſenſum majoribus, quam Leibnitianum difficultatibus premi; ſyſtema Leibnitianum, ſi bene intelligatur, libertatem non deſtruere; exemptum eſſe difficultatibus, quæ in aliis, ipſo etiam ſyſtemate communi influxus phyſici, reperiuntur. Immo ſi velimus ſequi ideas, quas habemus de corpore & de ſpiritu, una cum propriis eorum attributis, atque adeo nolimus corpus agere in ſpiritum, aut ſpiritum creatum in corpus, amplectendam eſſe ſyſtema Leibnitianum.* Cum ego in meditationibus meis metaphyſicis, quæ de mente & ejus commercio inter ipſam & corpus obſervantur, ex utriusque notionibus ſive ideis a priori explicare mihi propoſuiſſem, invitus fere incidi in ſyſtema harmoniæ præſtabilitæ, quod ne nonnullis offendiculo eſſet omittere decreveram atque ſic reipſa expertus ſum, verum omnino eſſe, quod judicaverat acutiſſimus *Jaqueſotus*. Cum Cl. *Bulſſingerus*, Philoſophus apud Tubingentes eximius, A. 1721. ad Profeſſoris publici dignitatem eveheretur, diſputationis inauguralis argumentum fecit harmoniam præſtabilitam *Leibnitii*. Nuperrime autem de eodem ar-

H 2

gu-

(d) Conformité de la foy avec la raiſon p. 381. 382. conf. Acta Erudit. A. 1705. p. 553. & ſeqq.

gumento integrum edidit Tractatum (e), in quo objectiones singulas, a viris doctis contra hoc systema motas discussit, ut adeo non opus sit repetere, quæ ibi leguntur. Ceterum non modo Patres Societatis, qui *Diarium Trevol-* *tienſe* condunt, verum etiam *Faguelotus*, etſi utrique systemati per omnia consentire nondum voluerint, inventum tamen laude merita ornant, nec consequentias negant, quas *Leibniti*us non admittit. Tale quid homine ingenuo indignum censentes, ubi quædam de electione optimi contra *Leibnitium* disputant, in hæc verba erumpunt: *Ne tribuamus illustri viro consecraria, quæ ipse diserte respuit.* Ecce tibi! quodnam sit iudicium virorum, qui cum scientia & eruditione virtutem conjungunt. Abhorrent illi a liberiori illa Logica, quæ e conclusionibus, quæ per evidentem consequentiam e præmissis deductæ dicuntur, præmissas ipsas seu principia dijudicari & evidentiam consequentiæ ex multitudine consentientium æstimari jubet. Nova hæc Logica, in orbe erudito hætenus ignota, peperit iudicia de systemate harmoniæ præstabilitæ ab iis, quæ huc usque recensita sunt, prorsus diversa. Juxta hanc enim systema istud est commentum ex meris absurdis constans, cujus cum existentia & Numinis sapientia nexus ridendi occasionem præbeat atheis. Nihil aliud est, quam adoptatus pseudo-philosophiæ Spinozianæ foetus, novo potius nomine insignitus, quam alio habitu indutus. Fluunt inde corollaria, quibus omnis religio cum naturalis, tum revelata una cum omni moralitate subvertitur. Neganda est vi ipsius omnis libertas & providentia humana totaque doctrina moralis & civilis depravatur, immo fatalis omnium rerum necessitas introducit. Miraberis hunc Argum viris acutissimis acutior! Ast non miraberis, si animo recolās, quæ de nova
mo-

(e) De harmonia animi & corporis humani maxime præstabilita ex mente illustris Leibnitii Commentatio hypothetica.

modo Logica dicta sunt. Cum consensus harmoniæ præstabilitæ cum hypothesibus *Spinoſæ* hæcenus fuerit inauditus in orbe literato, nec ullus eruditorum vel somniaverit, *Spinoſum* eſſe primum hujus foetus parentem; Cl. *Bülfingerus* in Tractatu hoc anno edito ad hanc criminationem nihil reponere potuit. Noſtrum igitur erit in præſenti vindicare famam tanti Viri cum primus fuerim, qui integro ſyſtemati harmoniam iſtam innexui & multo illuſtriorẽ reddidi, applaudentibus illis, quos ſcientia juvat, ringentibus ceteris, quorum intereſt ne ſcientia capiat incrementa.

§. XIX.

Sed antequam accuſationis, quaſi B. *Leibniſius* pla-
gio quodam literario ex *Spinoſæ* operibus ſyſtema ſuum in explican-
ſurripuerit, falſitas oſtendi poteſt, paucis quidem expo-
nendum eſt ſyſtema atque reddenda ratio, cur iſtud cete-
rum commercio mentis cum corpore explicando præ-
tulerim. *Ariſtoteles* commercium inter mentem & cor-
pus explicavit per realem quendam influxum utriusque
ſubſtantię in alteram, tribuens corpori vim producendi
perceptiones in anima & animæ viciffim vim movendi
corpus: quod ideo *ſyſtema influxus phyſici* appellari con-
ſuevit. Hoc ſyſtema, cum diverſum ab eo ignoraretur,
uſque ad *Carteſii* tempora communiter receptum fuit, cum
ab incautis perinde ac in *Aſtronomia* ſyſtema terræ qui-
eſcentis ſenſuum teſtimonio comprobatum crederetur.
Quemadmodum vero *Copernicus* pro ea, qua pollebat, men-
tis acie haud difficulter videbat, ſenſuum teſtimonio non
conſtare, terram quieſcere & ſidera motu diurno circa eum
ferri; ita quoque *Carteſius* pro eo, quod ipſi erat acumen,
perſpiciebat nec ſenſus interni teſtimonio evidens eſſe,
quod corpus in animam, anima viciffim in corpus agat:
id quod ego ex ipſa experientiæ notione clariffime mon-
ſtravi. Sed nec ratio militabat pro influxu phyſico, cum
actio corporis in animam & animæ in corpus intelligibili

modo explicari non posset : immo potius ratio eidem contraria erat, quod actione animæ in corpus & corporis in animam leges naturæ, quibus DEus mundum materialem regit, turbarentur. Hæc cum perpenderet Philosophus, eo tandem delapsus est, ut statueret, DEum ad impressiones in organis sensoriiis factas producere in mente perceptiones iis convenientes & vicissim ad nutum mentis motus in corpore, determinando directionem spirituum animalium in cerebro jam in motu constitutorum, ut influant in hos vel istos musculos movendos, sancita lege quadam generali, quam in concursu suo observet. Hoc systema mirifice placuit Philosophis, multique etiam Theologi idem amplexi sunt. Sane in Gallia *Malebranchius*, Congregationis oratoriæ Presbyter, systema hoc maxime excoluit, & idem *Franciscus Lamy*, ex Benedictinorum familia religiosus, amplexus est. In Batavia hodiernum *Ruardus Andala*, Philosophus & Theologus in Academia Franequerana clarissimus, systema idem acerrime defendit. Immo in Germania *Joannes Christophorus Scurmius*, qui philosophiam eclecticam excoluit, ipsum quoque adscivit & adversus aliorum objectiones propugnavit. Enimvero *Leibnizius* considerans in systemate *Cartesiano*, quod vulgo *systema causarum occasionalium* appellari suevit, omnia fieri per continua miracula & non minus quam in systemate influxus turbari naturæ leges *Cartesii* tempore nondum cognitæ, ab *Hugenio* demum detectas; invenit tandem, difficillimum hoc negotium intelligibili modo secundum naturæ ordinem aliter explicari non posse, quam si anima ponatur ipsa vi sua omnes ideas successive evolvere, quæ actionibus corporum in organa sensoria respondent, corpus vero omnes motus appetitibus animæ convenientes producat, harmonia inter utriusque substantiæ actiones a DEO præstabilizata, ut eædem semper consentiant. Cum mihi propositum esset, quæ ad commercium inter mentem & corpus spectant, ex utriusque notionibus explicare, ceu

deccr

debet Philosophum : fieri sane aliter non potuit, quam ut systemate harmoniæ præstabilitæ uterer, quoniam, ipso *Faqveloto* iudice, non aliud systema idem præstat, quamvis ipse iudicium suum suspendat & nulli calculum suum adjiciat, etsi haud obscura indicia prodant, se magis in *Leibnizianum*, quam in commune influxus propendere : *Cartesianum* enim pro mera illusionem habet.

§. XX.

Sed mirum jam videbitur, qui vel ea tantum modo *Num syste-*
mente percepit, quæ nunc breviter de harmonia præstabi- *ma harmo-*
lilita dicta sunt, quod ex *Spinoza* mutuata dicantur. Ete- *nia præsta-*
nim *Spinoza* non admittit duplicem substantiam, adeoque *bilitæ sit ex*
nullum statuit inter mentem & corpus commercium, con- *Spinoza bau-*
sequenter juxta ipsius hypothesisin vana quæstio, quomo- *sum.*
do commercium illud obtineatur, seu quænam sit ejus
causa. *Substantia cogitans & substantia extensa una eadem-*
que est substantia, quæ jam sub hoc, jam sub illo attributo
comprehenditur. Sic etiam modus extensionis & idea illius
modi una eademque res est, sed duobus modis expressa. Ipsa
hæc *Spinozæ* verba sunt, quæ recito (f). Vide itaque,
quam absonum sit, systema harmoniæ præstabilitæ in *Spino-*
za quærere, qui nullo prorsus opus habet, cum in ipsius
hypothesi nullus sit commercio inter mentem & corpus
locus. Qui interrogant, num systema harmoniæ præstabi-
litæ hypothesisibus *Spinozæ* conveniat, similes sunt interro-
ganti, num systema influxus physici contineatur in *Hobbe-*
sio, qui tanquam Materialista solam substantiam corpore-
am admittit, mentis existentiam negat. Sed audiamus *Spino-*
zæ verba, quibus fucus fieri debet systema ipsius ignoran-
tibus, quasi is eadem doceret, quæ in systemate harmoniæ
præstabilitæ inculcantur. Obstupesces adduci verba, quæ
contradictoria eidem systemati palam eloquuntur, nimi-
rum quod *Spinoza*: *Mens & corpus ait, una eademque res*
est, quæ jam sub cogitationis, jam sub extensionis attri-
buto

(f) Eth. part. 2. prop. 7. schol. p. 46.

buto concipitur. Unde fit, ut ordo, sive rerum concatenatio una fit, sive natura sub hoc, sive sub illo attributo concipiasur, consequenter ut ordo actionum & passionum corporis nostri simul fit natura cum ordine actionum & passionum mentis. Dicit Spinoza, mentem & corpus esse unam eandemque rem, cogitationem & extensionem esse diversos eandem rem representandi modos: Leibnitius docet, mentem & corpus esse duas substantias a se invicem realiter diversas, cogitationem & extensionem esse attributa diversarum substantiarum. Spinoza affirmat, seriem perceptionum & seriem motuum esse unam eandemque concatenationem nec differre realiter, sed nostro tantum concipiendi modo, utpote, non nisi eandem unius substantiae modificationem: Leibnitius statuit, series perceptionum in mente vi diversa produci a serie motuum in corpore, secundum leges prorsus diversas, & modificationes mentis diversas prorsus esse a modificationibus corporis. Spinoza adserit, seriem perceptionum & seriem motuum esse simul natura; secundum Leibnitium tantum sunt simul tempore. Sed tædet plura eam in rem afferre, cum satis superque manifestum sit, desiderari in hac objectione candorem. Quis enim dixerit, duos idem sentire, quorum alter res duas a se invicem diversas inter se consentire statuit in actionibus atque passionibus suis, alter vero adfirmat, quæ instar rerum duarum inter se diversarum considerentur non esse nisi unam eandemque rem? Hoc tamen non obstante, ulterius ex Spinoza urgentur hæc verba (g): Ordo ac connexio idearum idem est ac ordo & connexio rerum, & vice versa ordo & connexio rerum idem est ac ordo & connexio idearum. Quare sicut ordo & connexio idearum in mente fit secundum ordinem & concatenationem affectionum corporis, sic vice versa ordo & connexio affectionum corporis fit, prout cogitationes rerumque idee ordinantur & concatenantur in mente. Mens & corpus Spinozæ una eademque res sunt

(g) Eth. part. 4. prop. 1. p. 237.

sunt: quid igitur mirum, quod eadem quoque juxta ipsum sint utriusque affectiones. Immo mentem humanam & corpus hominis ne quidem pro peculiari substantia habet *Spinosæ*, sed pro modo aliquo unicæ, quam admittit & Dei nomine insignit, substantiæ venditat. Qui ex his *Spinosæ* verbis systema harmoniæ præstabilitæ exculpunt, luculento specimine comprobant, quod in interpretandis aliorum sententiis nullam prorsus fidem mereantur, omnia pervertentes & summa ima miscentes. Et valde vereor, ne jacturæ olim, sed nimis sero poeniteat. Solent enim homines ab uno casu ad alios similes argumentari. Quinam candor deceat contra systema aliquod difficultates proposituros, *Jaqueloti* & Autorum Diarii Trevoltienſis exemplum docet (§. 18.).

§. XXI.

Cum adeo systema harmoniæ præstabilitæ cum hy- *An liberta-*
pothesibus *Spinosæ* nihil habeat commune (§. 10.), nec ve- *ti sit adver-*
rendum est, illud esse fatali necessitati obnoxium & omnem *sum & con-*
libertatem ac contingentiam evertere. Sufficenter jam *tingentiam*
respondum est ab aliis ad hanc objectionem, tum ego con- *sollat.*
trarium clarissime ostendi in meditationibus meis meta-
physicis (h), nec rationes meas quisquam convellere au-
sus est: id quod tamen fieri debet, si objectiones, ad quas
dudum responsum est, iterentur. Nullum enim jus habet
iterandi objectionem, nisi qui ostendere decrevit, eidem
per responſionem non esse satisfactum. Alias enim per-
inde est ac si quis in actu disputatorio missis præmissis ne-
garet conclusionem: id quod risu excipitur ab auditorio.
Etenim qui ad responſiones excipere nequit, quo ostendat
objectionem iis non obstantibus adhuc salvam esse, is prin-
cipia ignoranti similis censetur, cum quo disputandum non
esse Logici pronunciant: relegandus est in nostro casu ad
responſionem alibi datam, eo quidem majori cum jure,
(DIFFER. NEX. RER.) I quan-

(h) §. 883, & seqq.

quando jam ceteri, affirmativam non tuentes, iique viri intelligentes & candore eminentes, qui aliis, cum scientia careant, pietate eminere satagentibus exemplo esse possunt (quod nostro in casu (§. 18.) accidit), objectionem non posse habere locum fateantur. *Faquelouis* (i) non modo rationes reddidit, cur libertas in systemate harmoniae non destruat, verum etiam ad captum eorum, qui rationes comprehendere non possunt, ob sufficientis acuminis defectum, simili vulgari illustrat. Si *systema*, inquit, *Leibnitianum* BENE intelligitur, reperitur, in eo non destrui libertatem: anima enim facultatem habet decreta sua formandi ac volendi, quod placet. Et quod actiones corporis ab anima imperatas attinet, non potest officere libertati dispositio corporis ita a Deo formati, ut motus ejus praecise voluntatibus animae respondeant: quod tali exemplo intelligi potest. Ponamus mechanicum egregium scire, quae ego famulo meo tali die firmi imperaturus, eumque posse formare automatum per exequendis omnibus motibus a me ea die imperandis. Certum est, me tunc automato illi tanquam famulo meo imperaturum ea, qua fruor, libertate, neque illam ipsius automati spontaneam ad suos motus determinationem quicquam libertati meae praedictaturum. Eodem se modo res habet in corpore humano, secundum systema Leibnitianum, quod ideo appellari solet systema harmoniae praestabilitae. Deus formavit nostra corpora tanquam machinas, quae debent respondere certis motibus nostrarum animarum. Tale automatum non est impossibile Deo, qui novis omnes determinationes meae voluntatis, motusque machine bis determinationibus accommodavit. Hoc systema EXEMENTVM EST difficultatibus, quae in aliis reperiuntur. Non intelligitur in systemate recepto (scilicet influxus physici), quomodo voluntas agere possit in corpus (immo nec constet, quod agat), & in systemate causarum occasionalium omnia sunt miraculose, & Deus movet brachium meum occasio-

ne

(i) Vide Acta Erudit. A. 1705. p. 554.

ne mea voluntatis, corpus proprie loquendo nihil agit. Sed in systemate Leibnitiano agis revera. Quod animam attines, concipi atque potest, Deum ipsi in creatione dedisse ideas confusas & involutas omnium objectorum universi, quæ evolvantur & distinctæ fiant, prout objecta mutationes producant in eo corpore, quod animæ conjunctum est, quia Deus ita creavit animam & corpus, ut perfecte sibi respondeant. Anima inde in sese ipsa agit secundum illas ideas & perceptiones distinctas, ut judicia sua formes suæque placita ac destinata animo concipias secundum electionem, quam instituit. Ipsa impetrat, & corpus exequitur virtute dispositionis a creatore ad exequendum ei data. Ita sentit Theologus merito suo celebris, qui acumine, scientia, æquitate & candore usus, quemadmodum decet religionis cum naturalis, tum revelatæ defensor, causam Dei bene egit. Libertas in anima residet, non in corpore. Systema harmoniæ præstabilitæ nihil in anima ponit, quod non locum habere possit in communi quoque systemate influxus, nisi quod animæ tribuat vim producendi perceptiones mutationibus in organo sensorio ac inde porro in cerebro factis convenientes, quam vim systema commune ex anima in corpus transfert. Sed si perceptiones vi mentis propria, si vi corporis in eadem producantur, respectu libertatis perinde est: quocunque enim modo actus liberos ex perceptionibus objectorum elici statueris, systema harmoniæ præstabilitæ non obstat, quo minus eodem utaris. Cur enim anima judicia sua formatura & ad volitionem aut nollitionem sese determinatura aliter agere debet ideo, quod perceptiones ipsas produxerit, quam quod in ipsa mere sese passive habente productæ fuerint a corpore? Quamvis enim dicas, animam in producendis istis perceptionibus non esse liberam, sed ex necessitate naturæ agere; quid inde detrimenti in libertatem redundat? Nonne perceptiones quoque in systemate communi influxus physici necessario in mente producuntur, quæ in earum produ-

Etione sese mere passive habet? Sed quis inde libertati præjudicatum iri metuit? Nulla igitur neque ex hoc capite in statu animæ secundum utrumque systema differentia est. Nulla adest ratio, quæ vel suspicionem moveat, liberam mentis volitionem aliter explicandam esse in systemate harmoniæ præstabilitæ, quam in systemate influxus. Immo cum volitiones a perceptionibus ortum trahant (ignoti enim nulla cupido): in systemate influxus physici communi eadem a principio passivo originem ducunt & anima in liberis quoque actionibus a corpore pendet, cum in systemate harmoniæ præstabilitæ non pendeat nisi a seipsa. Unde corrunt omnes istæ difficultates, quæ a longo tempore ab illa dependentia animæ in actionibus suis liberis a corpore, agente necessario, adversus libertatem motæ sunt, neque illud perinde ac commune systema influxus physici libertatem animæ a mechanismo corporis dependentem facit. Atque ea est ratio, meo quidem iudicio, cur R. Patres Societatis Jesu Paritini in Diario Trevoltienti systema harmoniæ præstabilitæ *libertati valde favere dixerint*: nec aliam esse puto, quod R. P. Tourneminius ex eadem Societate, animæ in corpus actione concessa, neget tamen corporis in animam actionem, unam systematis harmoniæ præstabilitæ partem amplexus. Libere igitur vult anima perinde in systemate *Leibnitiano*, quam in *Aristotelico* sive vulgari, & libertas in utroque eodem modo sese exerit. At ais in systemate *Leibnitiano* motum corporis non esse liberum, sed necessarium. Facilis est responsio, nec in systemate *Aristotelico* sive vulgari motum corporis per se esse liberum; neque enim libertas est in corpore moto, sed in anima movente. In Systemate communi anima determinat spiritus animales in cerebro, ut insuant in musculos movendos motum causaturi: in systemate *Leibnitii* iidem spiritus determinantur ab aliis, qui ad motum concitati fuerant per objectorum in organa sensoria impressiones vi structuræ artificio-

ficiozæ cerebri, quæ ita a Deo facta est, ut istius modi motus consequi poterit. Idem sane motus est in corpore, sive spiritus animales determinantur ad influendum in musculos per actionem quandam animæ, sive ab aliis spiritibus sui similibus: id quod *Jaquelosus* simili illustravit. Quemadmodum vero libertas animæ eadem subsistit in systemate harmoniæ præstabilitæ, quæ fuerat in communi influxus; ita non minus contingentia actionis in utroque eadem. In systemate influxus non mutatur per decretum humanum, in systemate harmoniæ præstabilitæ non mutatur per decretum divinum, ceu superius vidimus (§. 13.). Unde rerum metaphysicarum gnari, qui ex notionibus distinctis, non confusis judicant, nequaquam verentur, actiones liberas vi harmoniæ præstabilitæ fato mechanico subjici, qui terminus ambiguus explicatione opus habet. Actiones externæ, quæ motu organorum corporis perficiuntur, mechanismo subjacent, nec anima eundem imperio suo violare potest, secus enim veri nominis miracula patraret: id quod absurdum. Sed quis ideo dixerit, fieri ex fatali & absoluta necessitate, quæ sunt ex mechanismo? Contrarium in superioribus abunde ostendimus (§. 14.), nec sufficit dicere, inde ad fatalem necessitatem & evertendam libertatem valere consequentiam; sed quomodo talia consequantur demonstrandum est. Id autem in æternum fieri non posse patet per ea, quæ dicta sunt, & admittendum ceteroquin, esset hoc absurdum, libertatem animæ pendere a virtute locomotiva corporis, consequenter hac per accidens violata, animam in volendo non amplius esse liberam. Vi locomotiva corporis mechanismo conformiter perficiuntur libera mentis decreta: libertas itaque in decernendo a locomotiva minime pendet, sed tantum decreti executio. Intelligentibus ac æquis rerum æstimatoribus libertas nihil negotii facit. Sed illud nonnullos suspensos tenuit, num machina corporis tam artificiose a Deo construi poterit,

ut extrinseca determinatione statuto tempore exequatur libera mentis decreta. Impossibile visum fuit *Batio*, sed qui primus objectiones quasdam proposuit *Foucherius*, Canonicus tum Divionensis, id DEO non esse impossibile concessit: idem etiam falsus est ex Theologis Reformatis *Jaquelotus*. Quod igitur hi generatim affirmarunt, ego quoad singula capita in specie deduxi in meditationibus metaphysicis. Atque in eo consistit, quæ nonnullos tantopere torquet, fati, ut loquuntur, mechanici extensio, qua ipsa corporis morio & directio, speciatim loquela oris rationalis, libertati, voluntati & operationi animæ abjudicata soli mechanismo tribuantur, & a quo ad negationem omnis libertatis & providentiæ humanæ, nec non ad depravationem totius doctrinæ moralis & civilis tanta evidentiā valeat consequentia, ut id instar axiomatis haberi debeat. In *Cartesii* systemate, quod, ut superius monuimus, a plerisque Philosophis, etiam eclecticis, & Theologis minimum Batavis hodie recipitur, DEus immediate determinat motum spirituum animalium, hoc est, per miraculum; in systemate *Leibniziano* DEus idem prorsus facit, sed naturaliter, mediantibus causis secundis. Minus ergo incommodi in hoc emergit, quam in isto. Sive autem DEus aliquid agat naturaliter, sive per miraculum, illud ideo fatali necessitati adscribi nequit. Nec video cur motus a DEO in gratiam animæ libere decernentis determinatus, qui & ipse in hac determinatione liber est, ideo fatali necessitati subijciatur, quod ab ipso determinetur, qui tamen talis futurus non erat, si ab anima determinatus fuisset. Finge, DEum animæ conferre vim determinandi motus in corpore volitionibus liberis respondentes, quam per essentiam in systemate *Leibniziano* non habet. Ergo jam dices motum exemptum esse a fatali necessitate, quia DEus eum determinavit mediate per vim animæ concessam seu mutuam: si vero idem per vim corporibus datam exequatur, aut sibi propria utatur, motum fato

fato & absolutæ necessitati subjici. Quanta confusio, orta ex notionum non satis distincte explicatarum defectu!

§. XXII.

Quoniam libertas animæ eadem prorsus est in sy- *An systema*
stemate harmoniæ præstabilitæ; quæ in systemate vulgari *harmonia*
influxus, nisi quod locomotiva in illo non pendeat *præstabilitæ*
ab reali quodam ejus influxu, pendeat tamen perin- *fit philoso-*
de ac in communi systemate a libera volitione (§. 2.); nul- *phia morali*
la profecto adest ratio, cur in gratiam systematis harmo- *ac civi i ad-*
niæ præstabilitæ quicquam vel mutetur, vel expungatur *versum.*
in philosophia morali, sive theoriam, sive praxin spectes.
Theoria philosophiæ moralis circa actuum humanorum
honestatem & decorum versatur, ad quos dijudicandos
nil confert explicatio commercii inter mentem & corpus.
Omnia enim, quæ ea fini adhibentur, systemata
circa locomotivam tantum differunt, in ejus nimirum de-
terminatione physica dissentientia, in determinatione au-
tem morali conspirantia. Neminem quoque videas mo-
rum vel juris naturalis Doctorem, qui physicam loco-
motivæ determinationem, hoc est, modum, quo spiritus
animales in cerebro determinantur ad influendum in mus-
culos, inter principia reposuerit, ex quibus morum ho-
nestas & decorum dijudicetur: multo minus novi quen-
quam, qui hoc principio ad dijudicandum actiones ho-
nestas & decoras fuerit usus. Nec potest sane quisquam
hoc principio uti, cum aliud sit actionum honestarum &
decorarum principium istis intrinsecum, unde honestas
& decorum pendet, decorum, inquam, verum, non ap-
parens, quod posterius ex hominum tantum opinione ta-
le censetur. Integra ergo subsistit omnis theoria philo-
sophiæ morum in systemate quocunque, quod in eam
controversia de commercio inter mentem & corpus non
inluat. Sed nec systema *Leibnitianum* praxi hujus philo-
sophiæ præjudicat. Omnis enim nostra praxis in hoc ge-
nere consistit in motivis ex actionum indole derivandis
qui-

quibus anima in alterutram contradictionis partem vi spontaneitatis suæ sese determinatura utatur, & in mediis ad fines consequendos & impedimenta removenda utilis describendis. Sed hic denuo nullus locus est controversiæ de commercio inter mentem & corpus. Neque enim motiva ex eo derivantur, quod spiritus animales hac vel ista vi in musculos movendos influant, neque etiam in mediis & remediis determinandis attendimus, quomodo spiritus animales in cerebro determinentur, ut in hos vel istos musculos influant. Sufficit nobis nosse, quinam motus in corpore imperio mentis subsint, non quomodo in eo producantur: de illo autem convenit in omni systemate. Salva igitur quoque est integra praxis philosophiæ moralis in systemate harmoniæ præstabilitæ, seu, ut verius loquar, in omni theoria & praxi morum nulla habetur ratio illius differentiæ, quæ in explicando commercio mentis cum corpore intercedit inter philosophos. Videbis etiam, me omnem theoriam & praxin moralem independentem ab hoc systemate dedisse, & in ea nihil immutandum esse, quodcunque systema aliquis fuerit amplexus. Irrito igitur conatu meum philosophiæ moralis & civilis systema ob defensum in metaphysicis harmoniæ præstabilitæ systema suspectum redditur, quasi nescio quid periculi habeat & nescio quem fucum faciat lectori. Vereor, ne judicent intelligentes, talia obijcientem aut doctrinas morales & civiles non intimius introspexisse, aut ab æquitate & candore quam longissime abesse. Sed tu forsan vereris, ne, si locomotiva a mente physice non dependeat, imputatio actionum non habeat locum. Vanus quoque hic metus; actiones imputantur, quatenus liberæ sunt, consequenter ob dependentiam locomotivæ moralem ab anima, nequaquam vero ob physicam. Non quod anima direxit spiritus animales, ut influerent in hunc vel istum musculum ad producendum motum appetitui convenientem, ideo actio eidem imputa-

putatur: sed quod appetitus, cui motus iste corporis respondet, fuerit liber. Libertas animæ in volendo & nolendo principium imputationis est, consentientibus omnibus in universum Moralists, non locomotivæ dependentia physica. Vereris porro, ne actione corporis in mentem negata, locum non habeant pœnæ, quarum metu coercetur. Vanus etiam hic metus in auras abit. In omni systemate oriuntur perceptiones in mente mutationibus in organo sensorio factis convenientes, atque ab iis, non a modo, quo producuntur, originem ducit metus pœnæ, sine quo civilis obligatio subsistere nequit. Controversiæ de commercio inter mentem & corpus rite explicando inter Philosophos agitatur minime influunt in obligationem civilem.

§. XXII.

Animam definivi per substantiam universi repræ- *An definitio*
sentativam pro ratione & situ corporis organici in uni- *anima auto-*
verso, atque ex hac vi universum repræsentandi seu ideam *ris liberta-*
ejus situ corporis organici limitatam producendi cetera *tem evetat.*
deduxi, quæ in ea fieri observantur. Hæc vis, quatenus
primum est, quod in anima concipitur, & unde cetero-
rum, quæ insunt aut inesse possunt, ratio derivatur, dicitur
a me conceptus mentis formalis seu essentia ejus. Sunt
qui sibi persuadent animam sic fieri ens mere passivum;
consequenter quod careat libertate veri nominis. Si sy-
stema commune influxus defenderem, ubi mens, cum ideæ
rerum materialium vi corporis producantur, se mere passi-
ve habet; cum veri quadam specie dici poterat, animam
videri ens mere passivum, quod ipsa etiam determinatio vo-
luntatis a passivo originem ducat. Sed ad hoc dubium non
mihi, sed communis systematis defensoribus responden-
dum est. Enimvero quoniam in systemate harmoniæ præ-
stabilitæ mens vi sibi propria mutat statum suum, dum per-
ceptiones variantur, eadem in idearum productione acti-
ve se habet, atque adeo, cum cetera ex eadem vi deriventur

(DIFFER. NEX. RER.)

K.

tur

tur, omnia a principio activo deducuntur. Viderunt hanc systematis *Leibnitiani* prerogativam dubio procul, qui cum Cel. *Tournemino*, Jesuita Gallo, ideo corpori in animam actionem denegarunt, etsi animæ in corpus agendi vlm reliquerint. Si adeo veri nominis libertas non est, quæ a principio passivo originem ducit: videant, qui hoc statuunt, quomodo monstrare possint in communi systemate influxus adesse veri nominis libertatem, ne se proprio gladio, qui nos minime ferit, jugulent. Qui se controversiis philosophicis, præsertim metaphysicis, immiscere voluerit, eum veteranum, non novitium esse oportet in studio philosophico & potentem, qui aliorum sententias accuratis analysibus ad vivum resecat, nec ante statuat, quam singula ad rationis trutinam exegerit. Quando vero menti tanquam substantiæ simplici non nisi unicam agendi vim tribuo & diversas, quæ ipsi vulgo tribuuntur, facultates & nonnisi nudas agendi possibilitates denotant, ab ea derivo tanquam possibile ab actuali; videor nonnullis facultates realiter distinctas confundere in unum, immo præter facultatem percipiendi non aliam admittere in anima, mira consequentia novæ *Logicæ*, quæ *liberioris* titulo ornatur, omnem vim activam & libertatem evertere, immortalitatem animæ ac omnem religionem destruere, immo omnia in anima ad meram passivitatē fato absoluto & inevitabili subjctam reducere. Aquis rerum æstimatoribus non liberior, sed liberrima videbitur hæc *Logica*, vi cujus istiusmodi consequentiæ necuntur, utpote regulis omnibus soluta. Quis animam concipiet tanquam ens compositum ex tot diversis a se invicem substantiis, quot ob diversitatem operationum seu modificationum ipsi attribuuntur facultates? Qui imaginario modo de eadem loquuntur, istiusmodi fingunt: qui vero substantiam simplicem concipiunt, illi unicam in ea essentiam unicamque vim agnoscunt, & facultates animæ non alio sensu tribuunt, quam quatenus per unicam illam vim
variae

variæ essentiæ modificationes sunt possibiles. Quodsi ad eas producendâ mens sufficienter determinata est per essentiâ, tum quidem agit necessario: iis autem in casibus, ubi per essentiâ sufficienter non determinata, seipsam determinat atque hæc determinatio motus spontaneus vulgo appellatur, & libertatis essentiâ constituit. Cuinam veritati hinc periculum immineat, ego quidem non video? Quæ enim consequentiæ necuntur, ex falso fluunt supposito, quod omnia inevitabili necessitate sequantur in anima ipsaque ad omnes suas modificationes per essentiâ determinata sit: id quod *Spinozæ* dogma est, a me improbatum. Qui affectibus indulgens precario sumit, dogmata mea cum *Spinozæ* hypothesebus convenire, ut exosa reddat tyronibus, quæ non intelligunt; is ex falso mihi imputatis principiis consequentias infert, quæ nec ex meis fluunt, nec a me conceduntur, & quarum contrarium ipsemet luculenter monstravi. Quoniam vero ex hac definitione animæ, quod sit substantia universi repræsentativa pro ratione corporis alicujus organici & ejus in universo situ, nulla periculosa consecutaria consequuntur, nisi falsa interpretatione facta, ita nec talia in DEO locum habent, ubi eam ad eundem extendo ipsum definiens per substantiam omnia universa possibilia unico actu distincte aut adæquate sibi repræsentantem. Rationes eadem valent de DEO, quas modo de anima in medium protulimus. Sed ais, hanc DEI definitionem mutuatam esse a Scepticis omnium stolidissimis, qui Idealistæ dicantur. Miror hæc dicentem! Nomina mihi, quæso, ex multis tantum unum, qui hanc DEI vel animæ definitionem dederit. Mihi non innotuerunt nisi duo scripta autorum, qui Idealismum professi sunt, idiomate Anglico Londini publicata, *Georgii* nempe *Berkeley* Hybernici & *Arthurii Collierii* Angli: sed in illis ea definitio non extat. Novi *Platonem* visum fuisse nonnullis Idealistam, propterea quod alicubi corpora phænomena appelleret, nec celeberrimum *Malebranchium* ab Idealismo multum abfuisse vulgo credi, sed nec

in eorum scriptis definitio illa reperitur. Enimvero posito, sed non concesso, definitionem ab Idealista ante fuisse inventam; cum hoc Philosophorum genus substantias immateriales agnoscat solasque reales admittat, non video, cur ideo ab iis inventa definitio substantiæ immaterialis bona esse non possit, quia corporum existentiam realem negant. Num substantia immaterialis ita tibi a materiali in esse suo dependere videtur, ut nili huius reali existentia admissa definiri rite possit? Mihi non videtur, neque Cartesianorum ullus concedet, substantiam immaterialem sine dependentia a materia concipi non posse. In materialismum pronior foret, quam par erat, qui hæc statueret. Urges ulterius definitionem Dei controversam esse definito obscuriorem: sed vellem probares. Quisquis enim sis, nulla tamen in affirmando est autoritas, quæ demonstrationis vicem sustinere possit. Philosophus non admittit nili probata. Ubi lateat obscuritas, ego sane non video, præsertim cum singuli termini, qui definitionem ingrediuntur, jam ante definiti supponuntur: id quod a me factum est, qui possibile, universum, distinctam & adæquatam notionem definivi. Reprehendis, quod plurium universorum mentio fiat, cum unicum tantum existat. Quænam hujus reprehensionis ratio? Num putas, DEum tantum præfens quasi intueri hoc universum, quod actu existit, ad cetera, quæ possibilia sunt, sese non extendere ejus scientiam? Negas igitur, quæ de scientia media tradunt Theologi, & in omniscientiam DEI injurios existis. An vero existimas, præter ea, quæ actu sunt, haud alia possibilia esse? Sic cum *Spinoza* & *Hobbeso*, aliisque fatalistis *Abelardi* errorem renovas tuumque facis. Si præter ea, quæ actu existunt, alia possibilia admittis, sed quæ non locum habent nisi in hoc universo, hoc est, stante eadem corporum totalium compage; vocem universi alio in sensu accipis, quam ego, & sic logomachus evadis, atque insuper possibilibus numerum arctioribus limitibus, meo qui-

quidem iudicio, constringis; quam par erat. Enimvero capitalem quendam defectum in ea definitione observas, nempe quod tantum DĒus describatur ab intellectu, nec una mentio fiat voluntatis liberæ, omnipotentia, creationis & providentiæ. Sed ego hunc defectum non agnosco: neque enim opus est, ut omnia substantiæ attributa omnesque operationes in definitionem ejus compingantur. Qui hæc faciunt, Logicam ignorant, quæ non plura ad definitionem requirit, quam quæ ad definitum ab aliis sui similibus discernendum sufficiant. Urges hinc ulterius in ea definitione nihil contineri, quod non etiam dixerint *Aristotelici & Epicuri* asseclæ. Sit ita, quamvis nondum probatum fuerit? sit etiam ita, quod hætenus tamen nondum evictum, systema *Aristotelis & Epicuri* de Deo & mundo causam atheismi continere, an ideo omnes *Aristotelis & Epicuri* de Deo errores suos facit, qui in definitione sumit, quæ ab iis de DEO vera esse agnoscuntur, & quæ ipse falsa non esse fateris? Demonstrandum erat, ex iis, quæ in definitione Dei sumuntur, sequi damnatos *Aristotelis & Epicuri* errores necessaria consequentia: id quod fieri non posse vel inde patet, quod ipsemet vera concedis, quæ in definitione continentur. Ex veritate autem necessaria consequentia non sequuntur errores. Contendis tandem, ipsum *Spinosum* dicere, quod DEVS sit res cogitans (a) & idem esse arbitraris rem cogitantem esse & omnia universa possibilia unico actu distincte sibi representare. Sit ita, quod unum sit, quamvis mihi nondum videatur; sed quid, quæso, inde periculi imminet? Hæsit ea *Spinosæ*, uti notissimum, ex *Cartesio*, qui substantiam incorpoream definit per cogitationem. Idem cum *Cartesio* sentit *Poiretus*, quem Autor novioris Medicinæ mentis in præfatione vocat *virum summum & meritissimum, in cujus scripta cum incideret, magnopere sibi gratulus.* Sen-

(a) Ethic. part. 2. prop. 1. p. 42.

tiunt etiam hodiernum cum *Cartesio* Philosophi & Theologi, quos inter mihi *Ruardum Andalam*, strenuum *Cartesii* defensorem in Academia Franequerana, nominasse sufficiat. Sed scrupulus superest, qui te angit. *Cartesius* ais atheismi occasionem incautis præbuisse, definitione mentis humanæ haud adæquata, quippe quæ in cogitatione posita suam voluntati præstantiam & libertatem haud relinquat. Res facti est: nominandi ergo sunt athei, qui ad atheismum ideo prolapsi, quod *Cartesius* definiverit animam per substantiam cogitantem. Haftenus ne unus quidem nominari potuit. Quod vero vi hujus definitionis libertas voluntatis non evertatur, docebunt *Cartesiani*, nec me defensore opus habent.

§. XXIII.


An theorema de eadem virium quantitate conservata ad atheismum deducatur.

Cartesio immutabilitati Numinis conveniens videbatur, ut, quemadmodum eadem materiæ quantitas semper conservetur, ita quoque eadem virium quantitas constanter sit in universo ad salvanda naturæ phænomena. Quamobrem cum vires æstimaret ex ductu celeritatis in massam, qui motus quantitatem metitur, eandem motus quantitatem constanter conservari statuit. Postquam *Hugenius* & *Wrennus* veras motuum ex percussione regulas investigassent, a *Marioisio* experimentis pendulorum comprobatas; per eas evidens erat, motus quantitatem in conflictu corporum subinde mutari: quod vero constanter conservetur esse, quod producitur ex quadrato celeritatis in massam. Cum itaque *Leibnizius* reperisset vires æstimandas esse non ex ductu celeritatis, sed quadrati ejusdem in massam; evidens erat, in conflictu conservari eandem virium quantitatem, hoc est, virium quantitatem eandem esse post conflictum, quæ erat ante eundem. Admissio influxu corporis in mentem physico & hujus itidem in istud, regula ista, ex qua tanquam naturæ lege omnes motuum regulæ a priori demonstrantur, violatur: unde hanc ordinis naturæ turbationem adversus influxum physicum urgit *Cartesius*.

seſus atque *Leibnisi*us. Neque enim probabile eſt, Deum feciſſe eum naturæ ordinem, qui per animas hominum conſtanter tûrberetur. Adverſus hoc theorema quidam inſurgunt, qui in conſequentiis neceſſendis omne præſidium quarunt, quod ſequatur inde fatum mechanicum, Dei & hominum libertate everſa, immo ipſam mundi & humani generis æternitatem. Sed ecce tibi, quomodo conſequentiæ firmitas oſtendatur. Ex veriſſima, inquit, hypotheſi, quod quilibet homo habeat libertatem & pro libertate principium motus in ſemet ipſo & in ſua poteſtate, manifeſtum eſt, cum numero hominum etiam pedetentim creviſſe numerum & quantitatem motuum: quandoquidem duo, decem aut centum homines non tot motus edere poſſunt, quam innumeræ hominum myriades una viventes. Quare ſuppoſita eadem motuum quantitate in univerſo ſemper conſervata, ſequitur, hypotheſi iſta ſalva non poſſe non generi humano ipſique mundo æternitatem tribui. Priorem conſequentiæ partem de negata libertate & ſtabilito fato cuilibet eſſe evidentiffimam. Quid ad hæc reſpondent Mathematici? Ne ſutor ultra crepidam! Et hac reſponſione eſſe poſſumus abunde contenti. Nemo Mathematicorum hodie docet eandem motus quantitatem conſtanter conſervari, contrarium demonſtrant, quotquot de motu corporum ex percuffione poſt *Hugenium* & *Wrennium* ſcripſerunt. Non motus, ſed virium quantitatis identitas ante & poſt conflictum urgetur adverſus influxum phyſicum, quatenus ut naturæ lex ſpectatur, in qua naturæ ordo fundatur. Illa igitur obſectio non ferit ſcopum. Qui eam urgent, ſatis hoc ipſo probant, quod de rebus, quas non intelligunt, non modo iudicare, verum proſus cum aliis diſputare audeant. Atque hinc adparet, quantum ipſorum obſectionibus ſit tribuendum. Quodſi unus tantum homo exiſtat, cujus anima phyſice inſiuit in motum corporis, eadem virium quantitas non conſervatur in univerſo. Non igitur de eo contro-

troverſia eſt, num virium diverſitas in natura corporea ex influxu phyſico mentis in corpus ſequatur, hanc enim adverſus eundem urgent, qui cum *Leibnizio* & *Carteſio* ei adverſantur: ſed quæritur, num probabile ſit, Deum naturæ ordinem, juxta quem phænomena rerum materialium conſequantur, legibus ſuperſtruxiſſe, quæ ab animabus hominum in phænomenis rerum materialium conſtanter violentur. Quicunque igitur contra eos, qui cum *Leibnizio* & *Carteſio* in hoc argumento ſentiunt, diſputare decrevit, ut rationes minimum probabiles adferat opus eſt, quibus ſuadeat, Dei ſapientiæ non repugnare, quod eum fecerit naturæ ordinem, qui ab anima humana conſtanter turbetur. Qui ex influxu phyſico tanquam conſeſſo argumentatur, is principium petit: ejus enim gratia inſtituitur omnis hæc diſputatio. Nec ſufficit dicere, quod influxus iſte experientia nitatur: contrarium enim oſtendimus ex ipſa experientiæ notione, nec quæ a nobis allata eſt ratio multitudine aliter ſentientium evertitur. Licet enim *Carteſiani* & alii, qui cum iisdem hac in parte faciunt, inter eruditos & reliquos prudentes ne milleſimam quidem partem conſtituere dicantur, cuilibet tamen obvium eſt, ad reſellendas rationes non ſufficere pluralitatem vororum juxta vulgatum illud: *Multitudo errantium non parit errori patrocinium.*

F I N I S.



MONITVM
AD
COMMENTATIONEM LVCVLENTAM
DE
DIFFERENTIA
NEXVS RERVM
SAPIENTIS ET FATALIS
NECESSITATIS,

QVO

NONNVLLA SVBLIMIA METAPHYSICAE
AC THEOLOGIAE NATVRALIS CAPITA
ILLVSTRANTVR.

AVTORE

CHRISTIANO WOLFIO,
POT. REG. SVECORVM, HASSIAE LANDGRAVII, CONSILIARIO
REGIMINIS, MATHEMATVM ET PHILOS. PROF. PRIMARIO IN
ACADEMIA MARBVRGENSI, PROFESS. PETROPOLITANO
HONORARIO, ACADEMIAE REGIAE SCIENT. PARIS.
ATQVE SOCIET. REG. BRIT. ET BOR.
MEMBRO.

EDITIO SECVNDA.

HALAE MAGDEB. MDCCXXXVII.
PROSTAT IN OFFICINA RENGIERIANA.



MONITVM AD COMMEN- TATIONEM LVCVLENTAM DE DIFFERENTIA NEXVS RERVM SA- PIENTIS ET FATALIS NECESSI- TATIS.

§. I.



Scopus Me-
N meditationibus meis metaphysi-
cis, quas de Deo, anima & mundo *taphysica*
entibusque in universum publici *Autoris.*

juris feci, ante biennium altera
vice recusas, cum mihi scopum
proposui, 1. ut notiones & prin-
cipia generalia explicarem, quibus
ad intelligendas & confirmandas

ceterarum disciplinarum veritates opus est, 2. ut eorum,
quæ in anima observantur, rationes redderem manife-
stas, ad philosophiam moralem perficiendam profuturas,
3. ut suppeditarem principia firma, quibus fatalis neces-
sitas profligaretur & atheorum atque hominum profa-
norum molimina adversus religionem naturalem & re-
velatam subverterentur: id quod hoc inprimis ævo ut
fieret e re esse duxi, quo multorum mentes ad profani-
tatem videntur proclives. Qui vel lemmata singulis
articulis præfixa fugitivo oculo percurrit, is minime

dubitabit, hunc mihi, non alium præfixum esse scopum : quem quod mihi assecutus fuisse videar, per se liquet, cum quivis autor scriptum in publicam lucem proferens eam erga se fiduciam habeat. Quid videatur aliis, de eo liberum esto eorum iudicium. Multos omnium ordinum præclaros viros, immo generis profapia & eruditione illustres, calculum suum mihi adjicere cum ex literis ad me aliosque datis, tum etiam ex nonnullis colloquiis dudum intellexi. Non desunt sane, qui publico docendi munere fungentes in datis ad me literis confessi sunt, se a scriptura sacra librum meliorem non nosse sibi quæ ope ejusdem in ipso scripturæ sensu literalis haud parum luminis affusum : id quod a me arroganter propalari ne existimes velim, necessitate ita ferente, apostoli exemplum secutus (a). Ut omnes in universum sic sentiant, nec opto, cum temerarium foret, si unus ultra humanam, nedum divinam sortem positus esse vellem, nec spero, cum non adeo cæco in me ipsum impetu ferar, ut fieri posse existimarem, quæ non fert humana conditio.

§. II.

*Cur fatalem
potissimum
necessitatem
evertere stu-
duerim.*

Quotiescunque cum hominibus collocutus sum, qui suos mihi circa religionem naturalem exposuerunt scrupulos, iis potissimum circa contingentiam universi totius aquam hæere expertus sum. Eri enim libertatem suam in dubium minime vocarent atque adeo admitterent, quædam in hoc universo jam constituto posse fieri & non fieri ; hoc tamen non obstante cetera in rerum natura immutabili quadam necessitate fieri sibi persuadebant, propterea quod quilibet effectus suam habeat causam, hæc vero causa itidem sit effectus alterius causæ & sic porro in infinitum ; inter causam vero & effectum necessarius sit nexus, ita ut etiam Philosophi canonem condiderint : posita causa ponitur, & ea sublata, tol-

(a) 2. Cor, XII, 6. & seqq.

tollitur effectus. Hinc vero ulterius inferebant, cum universum sit ens necessarium, ipsum etiam necessario minimum existere posse adeoque non opus videri Deo. Intelligi adeo, dubitari de existentia Numinis, quod in naturæ ordine absoluta statuatur & fatalis necessitas, hanc vero colligi ex necessario inter causam & effectum nexu. Cum nonnemo, qui dubiis istiusmodi implicitus ex itinere in oras exteras suscepto redibat, mihi *Spinozæ* opera afferret, cogitatis ejus metaphysicis in appendice *ad Cartesii* principia philosophiæ more geometrico demonstrata perlectis, animadvertēbam, ipsum ideo negare ullum in rebus contingens esse, seu quod ex parte rei possit existere & non existere, quod inter ipsum mundum tanquam effectum, & Deum tanquam ejus causam, necessarium esse statueret nexum (b). De eo igitur cogitare cœpi, quomodo contingentia totius universi solide adstruatur atque inde ulterius ostendatur, cum ea connexam esse existentiam entis necessarii istiusmodi attributis vestiti, quæ in Deo commendant Autores sacri. Atque hæc est ratio, cur ad viam contingentiae delapsus fuerim, ceteris ob rationes dudum alibi (c) indicatas mihi non sufficere visis, etsi alias usu suo non destituantur, quemadmodum a me satis superque ostensum (d).

§. III.

Notiones possibilis, necessarii & contingentis *Actus con-* jam satis superque evolvi (e), nec cramben bis coctam *tingentium* apponere lubet. Ostendi etiam, quomodo contingen- *uberius de-* tia naturaliter ad actum deducantur (f). Non tamen in- *claratur.*

A 3

con-

(b) part. 1. c. 3. p. 102. 103.

(c) in *Ratione Prælect.* sect. 2. c. 3. §. 37. & seqq. p. 153.

(d) in *Commentat.* §. 3. 4. Conf. *Gedanken von den Absichten natürlicher Dinge* §. 8. & seqq.

(e) *Commentat.* §. 7. & seqq.

(f) *Ibid.* §. 16.

consultum videtur, ut nonnulla addam, quæ hoc argumentum uberius illustrent. Monui jam, cur contingentium actus naturaliter supponat continuum causarum nexum. Nimirum contingens per essentiam suam ad existendum determinatum non est, atque ideo causa opus habet. Quodsi causa itidem in contingentium numero habetur, causa denuo opus est & ita porro; donec non interrupta serie ad causam primam perveneris, quæ necessario existit, hoc est, Deum: id quod vi principii rationis sufficientis fieri debere nuper observavi. Quamobrem si contingat, plura simul esse possibile, quæ tamen simul existere nequeunt; unumquodque contingens peculiarem præsupponit causarum ordinem seu possibilem seriem, si naturaliter ad actum deduci debet, consequenter quæ, stante hoc causarum ordine, contingunt, ideo certitudinem habent, quæ vulgo *necessitas hypothetica*, itemque *necessitas consequentiæ* appellari solet, quia fieri non potest, ut, stante hoc rerum ordine contingant, quæ nonnisi aliorum ordine ad actum deduci possunt, atque adeo etiam in hoc universo non contingunt. Hanc vero contingentiam non admittunt fatalis necessitatis defensores & *Spinosæ*, etenim juxta ipsos præsens rerum ordo est unicus & absolute necessarius, ac in se immutabilis, ita ut nec per miraculosum concursum Deus quidpiam immutare possit. At si non alia adest necessitas, quam quæ a consequentia nomen trahit, ipseque rerum ordo in se nihil necessitatis habet, nec in se immutabilis est; tum & ad causam primam sive DEVM necessario ducit, tum ipsi in producendo universo omnem libertatem relinquit, tum denique Deo integrum est per concursum extraordinarium quidpiam immutare, quotiescunque visum fuerit. Atque ideo in tractatione metaphysica de mundo hanc ordinis rerum contingentiam stabilio adversus *Spinosam*, ut deinde in doctrina de Deo non modo Dei existentiam, sed ejus etiam

iam in creando libertatem, miraculorum possibilitatem aliaque inde eruere liceat. Neque hæc præjudicium facit libertati hominum, etiamsi suo modo etiam influat in certitudinem actionum liberarum, uti mox distinctius apparebit.

§. IV.

In his nihil contineri, quod *Spinosissimum* sapiat nec *Declaratio* dogmatis Theologorum, etiam illorum, qui Augustinæ ista cum Confessione mecum addiæti sunt, conveniat, nemo negabit, mente D. qui habet animum a pravis affectibus liberum, nec iudicio *Thomas*, & eget. Audiamus primum, quæ habet D. *Thomas*, cum *Gerhardi* Theologi nostrates ipsius luminibus sapissime usi fuerint, *convenit*. Causam contingentem ex se terminari ab extrinseco, disertis verbis docet ille veritatis confessor (g). Admittit etiam is ordinem causarum a Deo libere constitutum & præter hunc ordinem alios, hoc materialiter, & formaliter differentes. Defendit enim (h), *DEum posse facere* NB. *res alias & iis* NB. *aliud imponere ordinem*. Immo a voluntate divina in eventus rerum, semel constituto causarum ordine, necessitatem hypotheticam seu consequentiæ derivat: disertis enim verbis docet (i), *quod necesse sit aliquid fieri, si Deus vult*, NB. *non absolute, sed conditionaliter*, atque inde infert, *voluntatem Dei ponere necessitatem conditionalem in rebus*. Immo doctor angelicus tandem fatetur (k), Deum in tempore nil facere, nisi quod ab æterno præordinavit, atque adeo concedit per causarum seriem eventus rerum esse prædeterminatos. Sane *fieri non posse* pronunciat, *ut aliqua faciat, quæ non præciverit & se facturum præordinaverit*; etsi largiatur, quod, *si potentiam absolutam spectes, alia facere possit, quam quæ præcivit & præordinavit*. B. *Gerhardus*

(g) Summa Theol. part. 1. quæst. 13, art. 3.

(h) quæst. 25, art. 5, concl. 5.

(i) quæst. 19, art. 8, concl. 34.

(k) quæst. 25, art. 5, concl. 4.

hardus (l) eam in rem ex eodem *Thoma* citat sequentia verba: *Deus non necessario vult, quicquid vult; posito autem quod aliquid velit, est necessarium, quia voluntas DEI est immutabilis.* Probat vero idem *Gerbardus* non modo hæc *Thomæ* verba, verum etiam cetera, quæ in medium adduxi, ab ejus sententiâ non sunt aliena. Etenim ubi (m) de scientia media differit, *Becano* assentitur assenti, *Deum ab æterno non absolute, sed sub conditione cognovisse, quid homines & angeli facituri essent pro sua libertate, si cum his vel illis circumstantiis in tali vel tali rerum ordine collocarentur.* Unde apparet, ipsum præter hunc rerum ordinem tanquam possibiles adhuc admittere alios rerum ordines, atque agnoscere, in alio rerum ordine actû fieri potuisse, quæ in ordine præsentis ad actum non deducuntur, deficientibus nimirum rationibus ad eundem sufficientibus. Immo vi præsentium agnoscit, illa ipsa, quæ a libertate humanâ pendent, in alio rerum ordine alia futura fuisse, consequenter hunc in actionum liberarum determinationem influere. Admittit (n) in futuritione contingentium veritatem, adeoque & certitudinem: *Quod contingenter, inquit, futurum est, hoc vere futurum est.* Atque hinc porro infert: *præsciri ergo (a Deo scilicet) potest.* Et alibi (o) inculcat, præscientiam DEI afferre rebus immutabilitatem a posteriori, hancque ita interpretatur: *Quando Deus scit rem esse, necesse est eam esse: interim tamen res sua natura & NB. respectu suarum causarum poterat aliter esse.*

§. V.

*Mundorum
plurium pos-
sibilitium plu-
ralitas quem
hic locum
babeat.*

— *Godofredus Gviliclmus Leibnitius*, vir in omni eruditionis & scientiarum genere summus, monuit possibilitium pluralia contingentia duplici modo spectari posse, tum ut sejun-

(l) Loc. 1. de Deo §. 176. f. 322.

(m) loc. cit. §. 244. f. 314.

(n) loc. cit. §. 255. f. 316.

(o) Loc. de providentia §. 39. f. 19.

sejuncta, tum ut coordinata in integros mundos possibiles infinitos (p), atque ideo in præclaro Theodicæ opere, intelligentibus rerum æstimatoribus tantopere æstimato, sumit, plures mundos esse possibiles. Cum igitur in Cosmologia transcendentali, meditationibus meis metaphysicis inserta, monstraverim, unum quodque possibile contingens integrum supponere causarum ordinem seu, phrasi mea, integram possibilitium inter se connexorum seriem, siquidem naturaliter ad actum deducendum; ego istiusmodi seriem aut, si mavis, causarum ordinem *universi* nomine compellavi, vernacula nostra *eine Welt*. Ut consulerem brevitati loquendi, opus erat termino: quamobrem cum terminus a *Leibnizio* jam esset introductus, inconsultum fuerat novum comminisci. Quando igitur affirmo, plures mundos esse possibiles, non aliud sibi volunt hæc verba, quam plures præter hunc causarum ordines esse possibiles, quibus etiam ea, quæ in hoc mundo nunquam existunt, ad actum naturaliter deduci possent. Nempe si naturaliter fieri debuisset, ut actu surgerem, & quidem libertate mentis illæsa, quando sedeo, tum aliquem esse statuo causarum ordinem, a præsentis diversum, quo id consequi poterat. Patet ergo, quid sibi velit hæc phrasis: *in alio mundo fieri potuisset, ut actu surgerem, quando nunc sedeo*. Nimirum si alius fuisset causarum ordo, homo in eodem constitutus libere sese ad surgendum determinare potuisset, dum sedet. Rem igitur per lumina a D. *Thoma* mihi affusa affecutus, cujus summam Theologiæ a *Carbone* in compendium missam in prima juventute mihi familiarem reddidi; nomen vero a *Leibnizio* mutuatus, ex quo *Theodicea* ipsius prodit.

§. VI.

Ut mentem meam facilius percipiant, qui in hoc *Contingent*-argumento subtili ac profundo non satis versati, *exemplum actus* (DIFFER. NEX. RER.) B *plo illustratur*.

(p) in *Causa Dei* §. 15. p. 6.

plo quodam singulari illustrare lubet, quæ de contingentium actu hæcenus disserui. Retineamus exemplum, quod modo in medium attuli. Ponamus scilicet, me litteras ad amicum scripturum confedisſe. Dum ſedeo, poſſibile eſt, ut ſtem, ut ſaltem, ut deambulem &c. Structura enim corporis perinde diſpoſita ad hoc ſitus ac motus, ac ad ſeſſionem. Interim tamen ex omnibus iſtis poſſibilibus unum tantummodo actum conſequitur, nempe ut ſedeam, ceteris in regione idearum ſeu in numero nude poſſibilium perſiſtentibus. Quodſi jam quaſi-veris, quænam ſubſit ratio, cur actu ſedeam, hæc quæquam vero ſtem, vel ſaltem, vel deambulem &c. ratio quidem proxima eſt, quod mihi ita commodum viſum fuerit, hoc eſt, libera mentis voluntas: enimvero quodſi quaſi-veris ulterius, quidnam me permoverit, ut ſedere vellem, rationem in epiſtolam ſcribendam conjicio & huius ulterius v. gr. in iter nonneminis eo proſecturi, ubi amicus degit, ad quem ſcribere decrevi. Apparet adeo, in cauſarum ordine præſenti occurrere aliquas, quæ animæ aſam præbent, actum ſedendi decernendi, & quibus abſentibus, pro diverſitate circumſtantiarum forſan alium decerneret. Quamvis itaque anima libera ſit in decernendo, præſens tamen cauſarum ordo inſluit in hoc decretum libertate illæſa: quod enim idem illæſa libertate fiat, res ipſa loquitur nec ab iis in dubium vocari poteſt, qui libertatem mentis tuentur. Jam vero non tunc demum certum fuit, animam in hoc cauſarum ordine ſub his circumſtantiis decretum ſedendi formaturam, dum id ipſum contingit, ſed ab æterno certum fuit, id eventurum, cum idem Deus ab æterno præciverit. Atque hoc intuitu *poſſibile* dico in *hoc univerſo*, quod in eodem actum conſequitur, quia ſtante hoc rerum ordine habet veritatem determinatam. Quia vero cetera poſſibilia non ſimiliter eodem cauſarum ordine ſubſiſtente veritatem determinatam habent (alias enim & ipſa exiſtere deberent, quod non modo impli-

cat;

cat; verum etiam experientiæ contrariatur); ideo in *hoc universo* eadem *impossibilia* appello, licet in se possibilia sint. Sunt nempe absolute possibilia, sed non respective, quatenus nimirum possibilitas respectum ad actum seu existentiam involvit. Interim tamen ne quis possibilia nunquam exitura cum *Spinoza* pro chimæris habeat per ignorantiam confictis, non repugnare ostendo, quod in alio rerum ordine seu in alio universo eadem perinde habeant veritatem determinatam, certo in eodem exitura, quemadmodum alterum in præsentī certo existit. Nam ponamus in rerum ordine contineri, ut, dum ob literas scribendas actum sedendi intendis, subito incendium in vicinia exoriat, decreto sedendi mutato, ex conclavi egredieris, atque ita aliud possibile actum consequitur ob alium causarum ordinem seu, nostra phrasi, in mundo aut potius universo alio, libertate mentis actum egrediendi decernentis, illibata. Atque hac ratione *respective* dicitur *possibile in alio mundo*, quod in nostro pro impossibili habendum, hoc est, pro tali, quod in eodem actum non consequitur. Quodsi quis contingentium, eorum etiam, quæ a libera hominis voluntate pendent, esse determinatum non admittat, is cum *Socinianis* sentit a Theologis Augustanæ Confessionis ideo censuram meritis (q). Sentiant cum illis, quorum interest simulare cum his consensum, non obstante dissensu. Negare igitur ulterius cum *Socinianis* tenetur præscientiam divinam contingentium a libera hominis voluntate pendentium, quæ & ipsa juxta *Augustinum* in causarum ordine continetur (r), atque cum iisdem particularia fingens decreta in tempore facta in anthropomorphismum incidat necesse est.

B 2

§. VII.

(q) Vid. Musæus in Collegio Controversiarum disp. 4. quæst. 1. §. 21. p. 435.

(r) §. 45. Commentat. lucul. de differentia nexus &c.

§. VII.

*Quenam
contingen-
tia ad de-
monstran-
dam Dei
existentiam
scitu neces-
saria.*

Ad evincendum totius universi actum contingentem, ut inde Numinis existentia ceteræque perfectiones demonstrantur, non opus est consideratione contingentium particularium, quæ a libertate hominum pendent. Existentiam enim DEI cum libertate humana non necessario connecti, sicuti cum contingentia mundi totius existentis, satis liquet. Et si quis vel maxime contenderet, ex libertate hominis existentiam Dei demonstrari posse, non tamen ideo opus est ut cum ipso feram contentiones reciprocas: neminem enim fore arbitror, qui non ultro largiatur, a sola universi totius existentis contingentia, insuper habitis particularibus contingentibus a libertate hominum pendentibus, ad Dei existentiam firmiter concludi. Ego cum in Cosmologia transcendentali generales mundi affectiones explicarem in usum existentiae ac attributorum divinorum demonstrandorum, de universali mundi totius contingentia tantum fui sollicitus, nullo habito respectu ad ea, quæ a libertate humana pendent, quatenus ab eadem pendent. Atque adeo hæc sine discrimine trahenda non sunt ad contingentia particularia, ex doctrina de libertate dijudicanda. Etenim quæ in Cosmologia transcendentali de contingentia totius universi adversus fatalis necessitatis assertores atque atheosevici, salva sunt, quemcunque modum explicandi commercium inter animam & corpus elegeris. Neque enim is ad contingentiam totius universi quidpiam confert. Immo cum ea scriberem, quæ contingentiam totius universi attingunt (quemadmodum in præfatione primæ jam meditationum mearum metaphysicarum editioni præmissa monui), constitutum mihi adhuc erat quæstionem de commercio inter mentem & corpus prorsus indecisam relinquere. Si vel maxime nullus esset homo, aut si fingamus homini nullam competere libertatem; non tamen ideo mundus in

in se desineret esse contingens, cetera enim adhuc eodem sese modo haberent, quo nunc se habent, nec minus inde existentiam Numinis cum ceteris eius perfectionibus adversus atheos demonstrare liceret. Hæc ea fini adnotare libuit, ne cum doctrina de contingentia totius universi commisceantur hypotheses de commercio inter mentem & corpus in præjudicium veritatis, nec libertatem hominis in agendo quispiam negari argutetur, quod in contingentia universi adstruenda ejus nulla habeatur ratio.

§. VIII.

Enimvero forsan excipis, etsi in adstruenda contingentia totius universi non necessario haberi debeat ratio libertatis humanæ, harmoniam tamen præstabilitam talia involvere, cum quibus contingentia totius universi subsistere nequeat. Cum enim motus organorum corporis a voluntate pendentes ab anima non proficiantur per physicum quendam influxum; eos fatali quadam necessitate fieri, adeoque contingentiam totius universi subsistere amplius non posse, sed omnia in absolutam & fatalem necessitatem degenerare. Qua consequentia id inferatur, ego quidem non video: neque enim actionum humanarum ab anima dependentia quidpiam mutationis adfert ceteris in universo, quod quoad esse suum objectivum ab intellectu divino; quoad existentiam a voluntate Numinis unice pendet. Mihi potius contrarium videtur, nempe harmonia præstabilita contingentiam, quæ totius universi est, mirifice confirmari. Quoniam enim certum est, animam vi libertatis suæ semetipsam citra ullum externum influxum in eam determinare partem, quæ ipsi commoda visa fuerit, cum sese perinde in alteram determinare posset; corpus humanum per infinitam Numinis providi sapientiam ita dispositum, ut jussis liberis exequendum par sit, quam maxime loquitur, corpora alia humana innumera perinde ac

Num harmonia præstabilita tollat contingentiam totius universi.

hoc, quod existit, fuisse possibile, quæ desideris animæ in contrarias partes sese determinantis satisfecissent, hoc autem a Deo productum fuisse, quod scopo sibi proposito conveniret. Non diffiteor, immensam sic evadere sapientiam divinam & super omne extolli, quod animo comprehendere licet; sed ego nunquam existimavi, me in Deum injurium fieri, si ita concipiam opera ipsius, ut perfectionis divinæ imperscrutabilis ideam exhibeant. Immo in meditationibus meis metaphysicis (s) jam observavi, ob actuum illorum contingentiam fieri potuisse, ut inter libera animi decreta & motus organorum corporis harmonia præstabiliretur.

§. IX.

*Non eadem
est latitudo
liber-
tatem.*

In Commentatione ipsa (t) jam satis superque ostendi, in systemate harmoniæ præstabilitæ animæ relinqui eandem prorsus, quam in communi influxus habet, libertatem, cum nihil in ea mutet quoad actus reflexos & ex aliis elicitos: id quod etiam agnovit *Jaque-lotus*, cujus ibidem verba leguntur. Etenim solæ sensationes, hoc est, quæ mutationibus in organis sensoriiis factis respondent, perceptiones in mente producuntur ex necessitate naturæ ipsius, quas juxta commune systema corpus animæ tanquam tabulæ rasæ imprimit. Sed præsentibus istis in anima ideis ipsa in utroque systemate eodem prorsus modo ulterius agit: unde ne minima quidem subest ratio, cur vel minimam in alterutro differentiam circa appetitus inde tandem enatos suspicari liceat. Neque vero verendum est, fieri aliquando posse, ut mens aliter decernat, quam corpus a Deo ad exequendum jussa sit dispositum: præscit enim DEus ipsas liberas hominum voluntates, quæ juxta Theologos etiam nostros esse suum determinatum habent (u), atque adeo fieri non potuit, ut sua ipsum falleret præscientia.

§. X.

(s) §. 885.

(t) §. 21.

(u) Vid. Musæus loc. cit. not.

§. X.

Quodsi hæcenus dicta serio perpendas, nec minus repetas, quæ in ipsa Commentatione de contingetia universi & libertate humana disputata sunt, videbis utique, nihil absolutæ ac fatalis necessitatis a me statui, multo minus autem actiones hominum liberas fato subijci & animam in agens necessarium converti, quas sane impias & profanas opiniones abominor atque detestor, certissime persuasus hæc opinionum monstra a me in meditationibus meis metaphysicis profligata, hæc quaquam vero stabilita esse. Neque vero adeo hebes sum, ut perspicere non possem, me argumentis, pro contingetia & libertate in medium allatis, fatalem necessitatem tam in mundo, quam in anima stabilire. Et si vel maxime ego tam infelix essem, ut talia non viderem, non tamen similis suspicio caderet in viros singularem acuminis cum ingenii, tum iudicii gloriam consecutos, quos inter si *Jacquetotum* refero, recte sentientium iudicio minime erravero. Ut autem ad Commentationem luculentam, ex qua mentem meam abunde perceperunt viri boni & intelligentes, monitum hoc adjicerem, efficit vir quidam doctissimus, qui, utinam! non dudum orbi erudito *Rixatoris* nomine notus esset ac aliis elogiis apud externos inclaruisset, quam quæ in Actis Eruditorum (x) leguntur, cavillationum quoddam volumen adversus meditationes meas metaphysicas in lucem publicam protulit, in quo mihi imputat hominum profanorum sententias, a mente mea non modo maxime alienas, sed illas ipsas, quas in meditationibus meis metaphysicis omnibus viribus evertere annisum sum. Imputationes suas pro conclusionibus venditat ex principiis meis deductas per evidentem ac necessariam consequentiam, atque ideo sibi concedi postulat (y), *e conclusionibus, quæ*

Quem in finem hæc adducta sint.

(x) A. 1721. p. 422. (y) in Protheoria postul. 12. p. 5.

quæ per justam & evidentem consequentiam e præmissis deductæ sunt, dijudicandas esse ipsas præmissas : id quod suo more ex superabundanti demonstraturus, id primo liquere ait e modo argumentandi ab effectu ad causam secundum axioma, *qualis causa, talis effectus*, quod in sensu morali æquivalet trito isti : *Quicquid agis, respice finem, certe nunquam male ages* (2). Equidem cum jam tum temporis, quando meditationes meæ metaphysicæ primum in publicum prodirent, disertis verbis declaraverim, me non responsurum esse ad objectiones 1. ab ignorantia profectas, quarum discussio ulteriorem doctrinis lucem minime affundit, nec 2. cum ea, qua par est, modestia ac animi moderatione prolatas (a), nec 3. e vulgari rixatorum more in confusum & prolixum chaos superfedere poteram ac superfedissem utique, nisi singularis quædam circumstantia consilium mutari jussisset, ita judicantibus amicis & collegis institutum censoris minus probantibus. Nimirum cum Cl. censor facile prævideret, se rationibus destitutum in sua autoritate parum præsidii reperturum ad persuadendum imputationum suarum veritatem partim iis, qui ingenii viribus, partim ceteris, qui otio destituuntur ad has controversias omni ævo pro intricatissimis habitas dirimendum; in testimonio Ordinis sui omnem spem suam collocavit, imprimis cum ipsi admodum faveat, me verò acerbis ac diris imputationibus & accusationibus oneret, de quibus singulis postea sigillatim dicemus. Quoniam Cl. censor est os & Promachus Ordinis; sui continuis controversiis impliciti, non desunt, qui testimonium ipsi adeo honorificum, in me tantopere injurium ex ipsius calamo emanasse suspicantur. Judicarunt itaque amici, commentum me ta-

cente

(2) Syrac. VII, 40.

(a) in der Erinnerung wegen der Einwürfe S. 8. 9.

(b) im sichern Mittel wieder ungegründete Verleumdungen S. 7.

in præjudicium Academiae *Fridericianæ* invalescere posse, inprimis si adversarii ex silentio meo ansum triumphandi arripiant: quod futurum tanto confidentius existimare liceat, quoniam Cl. censor more suo classicum ante triumphum canit. Publico scandalo etiam medela publica esse occurrendum. Enimvero cum inania verba proferre religioni mihi ducam Christi disciplina, quam re, non verbis profiteor, meliora edoctus (c), ad tot inania Rixatoris verba nihil repositurus præcipua tantum litigii capita notabo & fontes, unde dijudicanda sint, indicabo.

§. XI.

Primum igitur tenendum est, Cl. censorem mihi *Cl. censor* tribuere sententias, quarum ne vestigium quidem in *mibi tribu-* scriptis meis apparet. E. gr. p. 213. disertis verbis scribit, *me nexum rerum omnium circularem* passim urgere, *scriptis meis* quali progressum quorundam atheorum circularem in *in-* finitum adfererem. Sed hujus hypotheseos ne *minitur.* mum vestigium in meditationibus meis occurrit (d). Citat equidem §. 543. Metaphysicæ; sed ibi hæc tria affirmantur, quod 1. in tellure multa sint corpora partialia, in coelo totalia; quod 2. partialia alia intercant, alia oriuntur & in ipsis totalibus continuæ mutationes accident, saltem quoad situm observabiles; quod 3. corpora in spatio cum ratione sint juxta invicem ordinata & mutationes in tempore non minus se invicem cum ratione consequantur, ita ut unum in se contineat rationem quandam, cur alterum juxta ipsum collocetur, seu in hoc ordine hunc locum occupet, & causa præcedens intuitu temporis non minus contineat rationem effectus sequentis. Quis, quæso, hinc exsculpet progressum circularem in infinitum, qui revolutiones in universo ponit

(DIFFER. NEX. RER.)

C

nit

(c) Matth. XII, 36.

(d) conf. Comment. §. 9. p. 28.

nit suo ordine iterandas. Neque veritati consentaneum; quando addit, me de initio nexus nullam genuini sensus mentionem facere. In Theologia enim naturali abunde ostendi, Deum esse istius autorem & eundem hoc universum creasse. Immo ostendi nexum in se contingentem deducere ad causam primam, quod est ens necessarium (e). Methodus demonstrativa requirit, ut singula suo tradantur loco: qui sine probatione multa sumunt, iis juxta scholæ methodum in uno loco congerere licet, quæ ad idem argumentum referuntur. In Commentatione (f) jam sufficienter removi a me suspicionem æternitatis mundi adsertæ, quod cum D. *Thoma* demonstrationem creationis in tempore ex lumine naturali difficilem statuam, quæ publice adhuc desideretur, atque cum eodem affirmaverim, licet mundus semper fuisset, cum tamen non parificari Deo in æternitate. Hoc tamen non obstante tanquam a me concessum sumit, mundum esse æternum & ob æternitatem mundi plurimis in locis mihi insultat, suæque commenta adversus me conficta ista hypothesi in crustat. Et facile apparet, ex falso attributam hypothesin de æternitate mundi ansam dedisse commentò alteri de progressu rerum circulari in infinitum. Similiter sæpissime ait, me fatum Stoicum manifesto confiteri, ubi nec fati minimum vel somnare licet. E. gr. dum dico animam ex necessitate naturæ (suæ scilicet) producere perceptiones mutationibus in organis sensoriiis factis respondentes; ipse clamat: *habemus hic, quod probe notandum est, manifestum fati seu necessitatis absolutæ confessionem de ipsa anima, utpote posita in ea agendi necessitate, quæ ipsius naturæ necessitas est.* Ita subdole, quæ de solis sensationibus dicuntur, ad omnes animæ operationes extendit, & verba mea detorquet

(e) Conf. Commentatio §. 3. p. 6.

(f) §. 17. p. 55.

quet in *Spinoſæ* phraſin, ut credulis de putatio cum damnato autore conſenſu fucum faciat: neque enim nobis perſuadere poſſumus, Cl. cenſorem, qui teſte ſuo Ordine totam ſyſtematis *Leibniſiani* compagem & analogiam perſpexit, fuiſſe adeo hebetem, ut ea non videret. Aut ergo fallit teſtimonium, aut a candore alienus Cl. cenſor. Similiter dum (g) actiones externas, quæ motu organorum corporis perficiuntur, mechanismo ſubjacere pronuncio, quem anima ſuo imperio violare nequeat, & §. 14. cito, ubi oſtendi exemplo ambulantis, cum non aliter ambulare valere, quam fert ſtrutura corporis atque per Staticæ ac Mechanicæ regulas integrum; *quid opus eſt*, magna confidentia, quaſi re bene geſta, exclamat, *operoſa Spinoſismi Leibniſiani deſectiōe & demonſtratione? quandoquidem hic novam ac expreſſam habemus erroris plusquam Stoici confeſſionem probe noſtandam*: ſed quem in finem, quaſo? Ut de fide atteſtati ſcripto præmiſſi ac autoris genio judicare liceat. Quis enim crediderit, animam imperare poſſe corpori motum, qui per organi requiſiti ſtrutura & Mechanicæ ac Staticæ regulas executu impoſſibilis? Quis unquam ſibi perſuaſerit, imperium animæ tam efficax eſſe poſſe, ut claudo pede ſine claudicatione incedat *Vulcanus*? Novi equidem, quod dudum aſſeruerit, *mechanismum ſaniora medicinae principia, ideoque eam totam, labefactare & corrumpere, & apud incautos in moralibus ac in ſpirituatibus ſublata libertate inducere neceſſitatem mechanicam, & fatalem* (h): ſed aſſeruit, non probavit. Nec ita videtur aliis qui, quid mechanismus ſit, intelligunt; neque ego, qui multa Medicorum ſcripta evolvi in Anglia, Gallia, Batavia, Germania, Italia edita, vidi quod ſibi a mechanismo metuant, ex quo motus vitales in corpore hu-

C 2

(g) Comment. §. 21. p. 69.

(h) in Medicina Mentis part. 5. c. 7. §. 64. p. 78.

humano ortum trahere unanimi ore confitentur. Confulat celeberrimum nostrum *Hoffmannum*, qui de usu mechanismi in medicina ipsum meliora docebit. In numerum *obirectatorum* refert (i), *qui non erubescunt adferere, ejusmodi doctrinas saniora medicinæ principia labefactare*. Ita contra simplices substantias cramben recocturus, quam artium quidam magister apposuerat, ejus autoritate confusus repetit, me simplicibus meis æternitatem tribuere: cum tamen, quæ de simplicibus trado, si in unum locum congerantur per librum hinc inde dispersa ob methodi rationem, perspicacioribus manifestum sit, istis admixtis demonstrari posse creationem ex nihilo, qualem demonstrationem ut interea ex sua materia universali & uniformi ex *Ovidio* desumpta extruat Cl. censor, antequam meam in lucem proferam, multorum nomine est quod rogo. Ejusdem farinæ sunt, quando toties urget, me non admittere nisi unicam in mente facultatem & quidem omnium infimam, nempe producendi perceptiones rebus corporeis respondentes; cum tamen omnes animæ facultates, quæ ipsi tribuntur, & a posteriori stabiliam, earum notiones distinctas tradam & rationes a priori reddam. Ratio commenti in eo consistit, quod nonnisi unicam vim in anima admittam, quæ essentiam constituit ipsius atque naturam, & per eam ad actum deduci demonstrarem, quæ ob varias istas facultates tantum possibilia sunt: facultates enim & potentias nudas scholæ per nudam agendi possibilitatem explico adeoque a vi distinguo. Unica est in anima vis tanquam substantia simplici, per quam essentia ipsius ætuoſa est; sed per unicam illam vim ad multiplices actiones disposita est, quæ varix ad agendum dispositiones *facultatum* nomine veniunt. Sufficiant hæc speciminis loco adducta, ex quibus judicium fiat, quod a mente

(i) Medicin. ration. Tom. I. part. 1. schol. ad §. 35. p. 6.

te mea maxime aliena pro hypothefibus a me defenfis
venditare non erubefcat Cl. cenfor.

§. XII.

Quoniam Cl. cenfor fatis fuperque paffum pro-
dit, fe nonnifi carpendi animo cavillationum fuarum vo-
lumen compilaffe, non mirum videri debet, quod et-
iam iftiusmodi artificiis utatur, quibus facile fucus fiat
le&tori incauto. Inter ea refero, quod textum meum
Germanicum verbis Latinis parum convenientibus sub-
inde reddat, ut fenfum fundant ipfius imputationibus
faventem, a mente autem mea alienum. Ita e. gr. *Em-
pfundungen* reddit termino generali perceptionum, ubi
tamen ea tantum perceptionum fpecies designatur, quæ
fenfationum fert nomen. Equidem hoc ferendum vide-
bitur nonnullis, fed minime ferendum effe iudicabit,
cui ex antecedentibus innotuit, quod, quæ de hac per-
ceptionum fpecie in fingulari a me dicta funt, ad omnes
animi cogitationes, ipfos etiam appetitus atque averfa-
tiones trahantur (§. 11.). Similiter vocem Germanicam
die Kraft, quam ego Latine per *vim* explicandam effe in
adjecto indice nonnullorum terminorum monui, con-
ftanter voce *facultatis* reddit, ut ipfis meis verbis (fi fu-
peris placet!) probare poffit, me nonnifi unicam in ani-
ma facultatem admittere, nempe cognofcitivam, ejusque
nonnifi gradum inferiorem, atque adeo voluntatem li-
beram negare, confequenter fatalem & abfolutam ne-
ceffitatem actionibus humanis afferre, ficque & religio-
nem univerfam & omnem philofophiam moralem atque
civilem evertere; quas confequentias ubique repetit,
ubi fatum exfculpere conatur. Unde malum in me ani-
mum & intenfitatem affectus, quo abreptus calamum
arripuit, colliges. Huc etiam refero quod conftanter
per *fundamentum* interpretetur, quod *ratio* a me appella-
tur, ut verba mea fenfum obfcurum fundant in perversum
facile vertendum. Magis autem in me injuria eft

versio ordinis non interrupti (einer unverrückten Ordnung) per phrasin *ordinis immutabilis*, ut inde rursus necessitatem cum aliqua veritatis specie exsculpere possit &c.

§. XIII.

Cl. censor
commiscet,
quæ sunt
disjungen-
da.

In Cosmologia transcendentali tantum de contingentia totius universi egi, insuper habitis contingentibus particularibus, quatenus a voluntatis libertate pendent, quoniam illa sola sufficit ad existentiam & attributa divina demonstrandum, nec ibi locus erat agendi de particularibus in relatione ad voluntatem humanam, in Psychologia demum explanandam. Æquum igitur erat, ut duo hæc capita a se invicem distingueret Cl. censor. Sed ille distincta commiscet, cum in systemate harmoniæ præstabilitæ nonnulla occurrant, quæ extra nexum ejus prolata falsæ interpretationi haud difficulter obnoxia sunt. Similiter aliorum sententias subinde cum meis conjungit, quasi eas probassem aut quasi prorsus meæ essent. E. gr. multas consequentias de fatali necessitate adversus me nectit inde, quod anima sit *automaton spirituale*. Sed ego hoc nullibi asserui, nec commodum mihi videtur uti hac phrasi, etsi sano sensu explicata tolerari possit, ne eam in perversum sensum detorqueant vel vii systematis non capientes, vel malevoli. Porro mihi tribuit *Leibnitianam* de monadibus sententiam, de quibus tamen judicium meum suspendi, propterea quod circa tributam ipsis vim percipiendi nondum mihi satisfeci. Ego vero autoritate nullius moveor, sed non nisi rationibus victus cedo. Illorum meam facit opinionem, qui influxum physicum animæ in corpus & corporis in animam rejiciunt, quod distincte explicare cum non possimus, cum tamen disertis verbis monuerim (k), ob hanc solam rationem eum rejici non posse. Lubens enim concedo, multa a nobis observari in rerum natura quo-

(k) §. 762, Metaphys.

quorum existentiam negare non possumus, etsi rationem non comprehendamus: mihi in explicandis rerum naturalium phænomenis quotidie versanti quotidiana sunt exempla, ut talia ignorare nequeam. Sed more suo omittit verba, quæ obstant, quo minus cetera in perversum sensum detorqueat.

§. XIV.

Qui de veritate systematis & dogmatum a me propositorum judicare voluerit, is, agnoscens viris doctis, æquis rerum iudicibus (1), non modo integros textus attente perlegere, sed & potestatem terminorum recte evolvere & catenas ratiociniorum summa attentione persequi tenetur. Ast noster constanter verba mutilata hinc inde excerpit, sensum iis diversum a mente mea tribuit & suas inde consequentias necit. Quod autem verba extra contextum prolata & extra connexionem alicujus systematis ponderata sensum a mente auctoris prorsus alienum fundere queant, quis ignorat? Quis nescit, ex ipsa scriptura sacra hac ratione adduci dicta, quibus errores incrustentur a veritate procul distantes? Reverentia erga codicem sacrum obstat, ne exemplo doceam, si eodem modo agendum sit, quo Cl. censor utitur, ipsis scriptoribus sacris consequentias istas (absit blasphemia verbo!) imputari posse, quas ipse mihi obtrudit. Et memini me aliquando legisse responsum aliquod theologicum a quodam Theologorum ordine profectum, quo interrogati, num salva conscientia liber aliquis hymnorum sacrorum novus in ecclesiam introduci possit, negativam adstruebant variis excerptis, unde Spinozismum, damnatas hæreses, obscena & libidinis irritamenta in hymnis ipsis contineri non sine omni specie docebant. Vix tamen mihi persuadeo autorem illius libri aliosque eidem pretium statuentes con-

Cl. censor
verba muti-
lata extra
systematis
nexus alle-
gat.

(1) Comment, §. 2. p. 3.

concessuros, quæ excerpta insinuare videntur. Controversiam ipsam meam non facio, neutri parti palmam adjudicans, neutri etiam abjudicans, cum eam examinare non vacaverit, nec ad me illius examen ullo modo spectet, immo ipsum responsum obiter saltem legendi potestas olim mihi data fuerit. Potius igitur unum & alterum exemplum ex Cl. censoris compilatione adducam, quo rei veritas appareat. E. gr. in Commentatione jam docui (m), quem in finem inculcaverim, si vel maxime mundo æternitas concedatur, eam tamen fore aliam ab æternitate Dei, seu ut D. Thomas loquitur, quem sequor, *non parificari Deo in æternitate*, quia scilicet æternitas mundi foret infinita rerum successio, æternitas autem Dei est sine successione & tempori opponitur. In his nihil contineri fidei orthodoxæ & notionibus rerum contrarii, non diffitebuntur, quibus non est animus sugillandi. Nec qui rationem in Commentatione datam & in discursu auditoribus meis inculcatam expendit, habere potest quod reprehendat, cur istam D. Thomæ thesin catenæ meæ inseruerim. Si carpere velit, carpat dicatque consultius fuisse ab eadem thesi abstinere. Ego etsi aliter sentiam, ferram tamen contentionis cum ipso minime recipiabo: abundet enim per me suo unusquisque sensu. Ceterum thesi isti adscripti in margine lemma: *æternitatem mundi ab æternitate Dei diversum*. Hoc lemma paragrapho affixum tanquam thesin totidem verbis a me propositam adducit Cl. censor, ut lectori persuadeat, me de æternitate mundi tanquam re concessa loqui, etsi ibidem tantum ex hypothesi loquar, cum differentia inter æternitatem Dei & æternitatem mundi sapissime tanquam argumento ad hominem uti liceat. Hæc quoque est ratio, cur phrasi *alterius mundi* constanter ludens multas ineptias fingat, quas nemo sanus admiserit,

eas-

etque pro meis sententiis venditet. Si quis autem contextum expendit & ex antecedentibus sequentia interpretatur, is sensum eruit nihil absurditatis habentem, quem superius (§. 6.) jam exposui. Immo rem aliter se habere non posse, assequitur. Distingvo nimirum *inter possibile absolute tale* & *inter possibile hypotheticum*, quorum istud vocavi vernacula nostra *das Mögliche absolute*, hoc vero cum addito *das Mögliche in dieser Welt*. Illud nempe est, quod nihil contradictionis in se involvit, sed hoc, quod per præsentem rerum ordinem naturaliter ad actum deducitur. Illud in hoc ordine non habet esse determinatum; secus enim existeret: hoc autem in præsentis causarum ordine, quas inter *Augustinus* etiam voluntates nostras liberas refert (n), esse determinatum habet, adeoque ad actum deducitur. Quis vero ideo, quod non omnia possibilia in præsentis causarum serie esse determinatum habent, ut actum consequantur, dixerit, ea, quæ contingunt, absolutam & fatalem necessitatem habere? Sociniani equidem pro absolute necessario cum Fatalistis habent, quod per causarum seriem determinatum est, ut existat, atque adeo negant contingentium particularium determinatam veritatem; sed ego cum Theologis nostratibus aliisque contrarium contra *Socinianos* defendo. Huc etiam pertinet, quod *Cl. censor* tantopere urgeat, *liberam volitionem cum necessitate naturæ toties expresse asserta non posse consistere*, cum & contextus, & integri systematis ratio aperte loquatur, me non omnes operationes animæ ex necessitate ipsius derivare, sed tantum eas, quibus producuntur perceptiones sensationum nomine compellari solitas, quas *Aristoteles* vi corporis in anima excitari statuit in suo influxus systemate, eam instar tabulæ rasæ considerans, cui ideæ imprimuntur. Nemo autem unquam asseruit, esse

(DIFFER. NEX. RER.)

D

ani-

(n) Comment. §. 15. p. 51.

animæ aliquam in istud perceptionum genus liberam potestatem: secus enim effere possemus, ut cibus procrearet saporem pro imperio mentis & quæ his sunt gemina. Ideo vero, quod perceptiones istæ ex actuum liberorum numero eximuntur (id quod ab omnibus fieri manifestum est) minime tollitur libertas, quam habet anima in appetitibus suis determinandis. Immo omnium crimationum fons est locorum mutilatorum inspectio. Integrum legi oportebat systema, vis & potestas verborum erat trutinanda & sufficiens temporis spatium meditationi indulgendum, ne iudicium præcipitaretur: quam profecto præcipitantiam quilibet animadvertet, qui præcedens monitum cum Commentatione conjunxerit. Possem addere exempla plura, v. gr. dum in cachinnum effunditur, quod dixerim (o), animam iis in casibus, ubi per essentiam sufficienter determinatam non est, seipsam determinare atque hanc determinationem, quæ motus spontaneus vulgo appellatur, libertatis essentiam constituere, hoc est, juxta notionem essentiaæ a me stabilitam, ob hanc facultatem semetipsam determinandi fieri posse, ut in anima locum habeat libertas. Voulam enim spontanei capiat & moribus spontaneis etiam esse locum in horologio argutatur. Quodsi vero evolvisset, quæ in metaphysicis (p) de illa facultate animæ, qua semetipsam determinat per essentiam suam non determinatam, de industria doceo, instantiam ab horologio desumptam frustra urgeri utique vidisset. Ex eodem fonte emanat, quod p. 56. mihi imputet, quod negem, *Deum ob hujus universi nexum æternum res nonnullas singulares, quæ in eo existunt, eodem salvo potuisse aliter producere & in eodem quicquam se aliter habere posse, quam se ipso actu habet.* Ego enim vi immutabilitatis essentia-

rum

(o) Commentat. §. 22. p. 75.

(p) §. 8. & seqq.

(q) Summ. Theol. part. 1. quæst. 25. art. 6. concl. 1.

rum tantum cum D. *Thoma* (q) affirmo, *Deum non posse facere aliquam rem meliorem substantialiter, quam ipsa sit*, seu ipsam rem, quam producere libere decrevit, non potuisse aliter producere, quam fert essentia ipsius, hoc est, phrasi S. *Augustini*, idea ejus in intellectu divino. Et cum possibilia omnia simul existere nequeant, si cum *Leibnizio* ut in plures mundos coordinata, seu juxta communem loquendi morem in diversos causarum ordines digesta in intellectu divino spectentur, contendo fieri non posse, ut omnia promiscue in eodem ordine habeant locum ob contradictiones orituræ, adeoque, ubi de permissione mali terminus est, defendo, Deum causarum ordinem, seu phrasi *Leibnitiana*, mundum ita producere debuisset, quemadmodum eum possibilem exhibuit idea in intellectu ipsius. Assentior nimirum etiam in his doctore angelico (r) affirmanti: *Deum non posse facere cum majore sapientia & bonitate, adeoque non melius, quam fecit*. In eundem censum referri debet, quando mihi p. 29. imputatur, quasi cum *Leibnizio* assereretur, Consilium Dei e scopo mundum optimum constituendi in malum effectum influere, cum tamen denuo non aliud defendam, quam quod D. *Thomas* (s) disertis verbis docet, *DEVM permittere aliqua mala seu defectus aliquos NB. in particulari, ne impediatur NB. bonum totius*, quia scilicet alias ex minori sapientia & bonitate fecisset mundum, quam poterat, vi eorum, quæ paulo ante ex eodem doctore citata sunt. Apparet verò ex hæcenus dictis, pleraque, quæ impugnantur, non *Leibnitium* autorem agnoscere, sed dudum ante ipsum a Theologis & Philosophis tradita fuisse, quorum non exigua semper fuit in universa ecclesiâ autoritas. In hunc enim numerum referendum esse D. *Thomam*, quis negare ausit?

D .

§. XV.

(r) loc. cit concl. 4.

(s) quæst. 22. art. 2. concl. 4.

§. XV.

Cl. censor
damnat
dogmata a
Theologis
constanter
recepta &
alia ab iis
saltem tole-
rata.

Damnat etiam Cl. censor & in numerum doctrinarum periculosarum refert, quæ a Theologis, quorum per imperii leges stat autoritas, constanter & partim acriter defensa. Ita enim doctrinam de æternitate essentialium p. 56. absoluti fati matrem & originem & omnis libertatis pestem vocat, autoritate *Poirets* suffultus. Ita ergo absoluto fato patrocinantur etiam Theologi non modo ecclesiæ Romanæ in universum omnes, sed & nostrates, paucis forsitan exceptis, qui cum *Poires* sentiunt. Quam absolum hoc sit, ex antecedentibus intelligitur. Et enim cum essentia dicat possibilitatem rei, necessitas ejus non aliud sibi vult, quam quod illud, quod est possibile, una non impossibile esse possit: quod nemo sanus negare valet, nisi primum illud contradictionis principium, quod impossibile pronunciat, ut idem simul sit & non sit, in dubium vocare velit. Equidem Cl. censori non minus periculosum videtur, quod possibilia deriventur ab intellectu divino antecederet ad voluntatem. Sed improbat dogma receptum, a Theologis nostratibus contra *Lussendorffium* acriter propugnatum. Nonne omnes Theologi uno ore fateantur, potentiam Dei non sese extendere ad impossibilia? Potentiam tamen Dei ad omnia extendunt, quæ vult. Necessè igitur est, ut nostro concipiendi modo aliquid sit possibile, antequam Deus idem velit. Cum Cl. censor verba mea captare & in perversum sensum detorquere soleat, monendum est, sermonem hic esse de prioritare ordinis, non temporis. Immo si possibilitas a voluntate Numinis penderet, quemadmodum *Poiretus* cum *Bourignon* docuit, fieri sane posset, ut Deus contradictoria vellet, consequenter contradictoria vera esse possent. Lubens fateor, me talia concoquere non posse, quamdiu non omnem rationis usum ejuraverim. Affinis est doctrina de actionibus per se honestis, cujus confectarium est, posito per impos-

possibile, non dari Deum, fore tamen jus naturæ. Hanc *Grosii* sententiam, quam & olim Philosophi, & ante ac post ipsum Theologi amplexi sunt atque contra *Puffendorffii* justitiam arbitrariam acerrime propugnarunt, Cl. censor dogmatis periculosis accenset, mirantibus aliis, quomodo sine Theologorum nostratium censura justitiam arbitrariam defendere possit Theologus. Quod tantopere carpit in doctrina de Commercio inter mentem & corpus, nempe quod influxus physicus ab *Aristotele* ad illud explicandum usurpatus rejiciatur, non modo systema *Leibnitianum*, quod proposui, verum etiam *Cartesianum* ferit. Immo celeberrimus ille ac exquisiti judicii Theologus *Jacquelotus*, ut nuperrime monui (t), majoribus difficultatibus *Cartesianum* premi agnoscit, quam *Leibnitianum*, in quo NB. si bene intelligatur, libertas non destruitur. Agnoscit etiam utrumque censor: hoc tamen non obstante in me debaccharur, quasi ipse primus contra doctrinam universalem, in cujus possessione ac confessione perpetua cum viris doctis universum genus humanum fuerit, surrexissem eamque tanquam erroneam rejecissem. In omnibus autem academiis Protestantium *Cartesii* systema toleratur, nec ullibi ob negatum influxum physicum tantæ excitantur turbæ: immo ipsimet Theologi, quos inter nuper, *Cel. Andalem* in academia Franequarana nominavi, idem amplectuntur, nemine ipsis litem intentante. Quid quod in ipsa ecclesia Romana, ubi philosophia *Aristotelica* adhuc floreret, celeberrimus ille Congregationis Oratoriæ Presbyter, *Malebranchius* rejecto influxu physico *Cartesii* systema causarum occasionalium excoluit? Doctores Sorbonnici minime negotium fecere *Cel. Regio*, quod in Cursu suo philosophico idem propugnaret atque Parisiis doceret. Nec Celeberrimo *Sturmio* in academia Altorff-

D 3

na

(t) Comment. §. 18. p. 59.

na dicam ideo scripsere Theologi, multo minus turbas contra eum excitavere, quod influxum physicum negaret & *Cartesii* systema amplecteretur, quod moderni *Cartesiani* cum *Leibnitiano* in gratiam reducunt, hoc nonnisi pro explicatione illius rationali agnoscentes. Ante hos viginti annos Lipsiæ in disputatione publica de loquela, quæ censuram viri Theologi subierat, impugnato physico animæ in corpus influxu, *Cartesii* systema meum feci, nec quisquam ideo me periculosorum dogmatum suspectum reddidit. Et sane negatus physicus animæ in corpus & corporis in animam influxus præcipuum fere est, quod; impugnat Cl. censor & unde consequentias adeo periculosas deducit: pleraque enim, quæ de fato tantopere urget, ex systemate harmoniæ præstabilitæ, quatenus influxui isti obstat, assumuntur ceterisque constanter immiscentur. Patet etiam ex ante dictis (§. 17.), quod Cl. censor cum *Socinianis* damnet receptum dogma de determinato esse & determinata veritate actionum ipsarummet liberarum & quod æterni Dei consilio omnia definita sint, quæ ipse vel facturus, vel permissurus est in tempore: quod tamen utrumque a Theologis nostris agnoscitur & contra adversæ partis patronos defenditur.

§. XVI.

In quo ear-
do totius
controver-
sæ vertitur,
id precario
sibi concedi
postulat.

Cardo totius controversiæ in eo vertitur, num ego fatalem ac absolutam omnium rerum necessitatem defendam, propterea quod cum Theologis nostris veritatem contingentium determinatam admittam, vi cuius ab æterno certum fuit, ea in tempore exitura. Sed Cl. censor p. 4. sibi precario largiri postulat, *nexum rerum materialium concatenatum, in consecutione sua necessarium & fatum physico-mechanicum seu fatalem necessitatem esse synonyma. Fatum vero illud, præsertim ad causas reipsa liberas applicatum, reipsa constituere Spinosissimum paritalem.* Ut hoc postulatum intelligatur, explicandum id erit secundum mentem meam, quandoquidem contra me

usur-

usurpatur. Tenendum itaque vocem concatenationis desunttam esse ex *Spinoza*, nec a me adhiberi, neque a me intelligi, quid sibi velit, cum ideæ meæ de nexu rerum applicata nullum fundat sensum. Deinde observandum est, me nexum cum Theologis nostris appellare *hypothetice necessarium* aut *conditionaliter necessarium*. Cl. censor autem substituit pro *necessitate conditionali* necessitatem in consecutione, ne consensus cum Theologis nostratibus appareat. En egregium æquitatis ac candoris specimen in præcipuo controversiæ momento! Quodsi itaque postulatum phrasi mea enuncies, ita habebit: *Nexus rerum materialium sapiens post decretum Numinis liberum hypothetice necessarius & fatalis necessitas sunt synonyma*. Hæc est sententia Fatalistarum, quam largiuntur ipsis *Sociniani*, negant vero Theologi trium per leges imperii stabilitarum religionum. Cum in mei odium Cl. censor Fatalistis cum Socinianis concedat, quod minime verum esse contendunt Theologi etiam nostrates; illud omnino firmiter demonstrari, non precario postulari debebat. Quoniam vero nexus rerum materialium hypothetice necessarius est a fatali necessitate longe diversus, quemadmodum in Commentatione clarissime ostendi; nec quæri potest, quid pariat hoc fatum ad causas liberas, hoc est (si adversus me valere debet) ad corpus humanum applicatum. Desinat igitur inculcare, bonum philosophum teneri admittere omnes ac singulas conclusiones, quæ per justam & evidentem consequentiam e suis principiis, tanquam præmissis, resultant. Qualis enim hæc consequentia: Nexus rerum materialium a Deo libere & sapienter electus post decretum divinum hypothetice necessarius & absoluta ac fatalis necessitas sunt synonyma: ad corpus vero humanum applicatus reipsa constituit *Spinosismum* partialem. Ergo nexus rerum materialium &c. est fatalis necessitas a *Spinoza* defensa. Perinde est, ac si quis dic-

cc-

ceret: Stultus & sapiens sunt synonyma. Ergo Titius, quem sapientem vocat *Mevius*, non est sapiens, sed stultus. Postquam vero hoc postulato precario sibi concessum arbitratur nexum rerum, prout a me modo determinatur, esse synonymon fatalis necessitatis; tanquam certum sumit, me fatalem necessitatem adstruere, atque adeo singula verba ex hac hypothesi interpretatur, quæ detorsioni sunt obnoxia.

§. XVII.

*Monitum
de Dei defini-
tione
idealistica.*

Adversarium meum non sincere mecum agere, vel exinde colligant, qui de re ipsa judicare non valent, quod singula capita controversa odiolis hæresium titulis oneret: quod ego ab ingenui hominis moribus alicum esse duxi. In hunc etiam censum referri debet, quod definitionem meam de Deo & mente humana *idealisticam* vocet, etsi nullum nominare possit auctorem Idealistam, qui eandem tradiderit, utut ab initio asseruerit, me eam ab Idealistis hausisse. Vocat nimirum (u) Idealistas scepticorum & atheorum stolidissimos, non philosophis, sed personis miserabilibus &, quamdiu se pro talibus gerant, insanabilibus annumerandos, contra quos & quibus cum non sit disputandum. Quodsi igitur hoc certum sit, principia mea esse idealistica, prona consequentia (neque enim saltum in ratiocinando agnoscet Cl. censor) fuit iplius de libro meo & de *Leibnitio* iudicium. Sed ego non agre fero contemptum meorum ab eo, cuius scripta & methodus nec ad meum sunt palatum, neque credo *Leibnitium*, si in vivis esset, Cl. censori invisorum suam, quam crepat, iudicii præstantiam ad res philosophicas dijudicandas. Transeant hæc: de re ipsa dispiciamus. Idealisticum est, quod affirmem, essentiam
Dei

(u) in *Causa Dei* p. 19.

Dei consistere in vi repræsentativa omnium universorum possibilium adæquata & simultanea, hoc est, hanc vim esse primum conceptum Numinis ex creationis operibus agnoscendi, unde cetera ejus attributa deriventur. Occurrit apud Gerbardum (x) *essentia divina*, inquit, *est cognitio intuitiva tam sui, quam omnium futurorum & possibilium*, atque Gerbardus sententiam verissimam vocat. Si offendar in mea thesi vox repræsentationis, audi D. Thomam ita loquentem (y): *Deus in se omnia continet & potest omnia NB. repræsentare*. Quod si quænaveris, quomodo omnia in se contineat, respondet idem (z): *DEUS cognoscendo essentiam suam participabilem secundum varios modos similitudinis format varias ideas*. Si quænaveris ulterius, ubinam sint illæ idee & cur æternæ dicantur? respondet denuo idem (a): *Vera & necessaria dicuntur æterna, ut sunt in intellectu divino*. Neque vero offenculo esse potest universorum possibilium terminus, cum negari non possit, possibilia etiam considerari posse ut in certos ordines ab intellectu divino digesta (s.), sine quo nil quicquam foret possibile: neque negari potest de Deo notitia, cujus ipsemet autor est. Si intuitu DEI nihil periculi habet hæc definitio, nec respectu animæ tale quid metuendum. Quando vero Cl. censor affirmat, ex notione animæ a me data non posse deduci diversas ejus facultates & attributa, ambabus manibus largior, quod ipsius methodo deduci nequeant. Neque enim ego ita argumentari soleo, quemadmodum Cl. censor argumentatur: Anima habet vim repræsentandi universum. Ergo

(DIFFER. NEX. RER.) E ha-

(x) Loc. de provid. §. 34. f. 18.

(y) Summa Theol. part. 1. quæst. 12. art. 8. concl. 4.

(z) loc. cit. quæst. 15. art. 2. concl. 3.

(a) part. 1. quæst. 10. art. 3. concl. 5.

habet facultatem volendi libram. Neque enim assuetus sum istiusmodi in geometria argumentationibus: Triangulum habet tria latera. Ergo tres anguli simul sunt duobus rectis æquales. Tales argumentationes decet viros limati atque subacti iudicii, ad philosophiam perficiendam (forsan pervertendam) natos, quale in mathematicis, iudice nostro, desideratur.

§. XVIII.

*Monitum
de testimo-
nio Cl. cen-
soris libro
premisso.*

Sed tædet his diutius immorari. Pauca addam de testimonio, quo commentis suis pondus conciliare studet Cl. censor. Ego exemplum Christi secutus testimonium ab hominibus non accipio (b): res mea pro me loquatur. Nec quando auctoritates adduco, iis veritatem thesium confirmare nitor, alias enim idem fecissem in meditationibus meis metaphysicis, sed tantummodo ostendo, perperam meorum cum *Spinoza* crepari consensum. Doleo viros venerandos ex præcipientia & affectu cum de *Leibnitio*, tum de me iudicasse, tanto quidem magis, quod ipsos minime fugiat, quibus oculis videat Cl. censor. Hypotheses *Leibnitianas* ex antiquo *Stoicorum*, nec non ex recentiori *Spinoza* eorumque pseudophilosophorum, qui *Idealistæ* vocari solent, systemate adoptatas esse, est criminatio Cl. censoris nullo idoneo argumento probata, nec probanda. Me istam philosophiam *Leibnitianam* in peculiaris systematis formam redegissem, non omnino verum est, cum paucissima sint *Leibnitii*, quæ in meditationibus metaphysicis leguntur: plura controversa ex D. *Thoma*, quam *Leibnitio* hausta. Sed sit ita: neque enim criminatio de *Leibnitio* evicta est. Immo novi, cum Theodicæa viri etiam post facta summi primum prodiret, unum ex venerabili illo ordine librum a principibus sanioribus mihi commendasse. Quod

(b) Joh. V, 34.

Quod ex philosophia a me tradita damnum in studiosos redundarit, ego ignoro: novi autem e contrario, quod multi theologiæ studiosi meliores ceteris fecerint progressus, qui lectiones meas frequentarunt. Immo non desunt exempla eorum, qui ob autoritatis præjudicium dominans in atheismum prolapsi, in meis lectionibus ab hoc errore liberati multas mihi agere gratias & conquesti sunt, in detrimentum studiosorum suspectas reddi lectiones ipsis adeo proficuas futuras. Quodsi unus alterve prodiderit contentum methodi docendi Cl. censoris, id quidem non probo, sed eundem mihi prodiderunt alii, qui ex aliis academiis nostram visendi gratia huc allati me invisere dignati sunt. Multos esse in ordine nostro, qui Cl. censoris mecum agendi modum probent, non novi: aliam plerorumque collegarum expertus sum sententiam. Eti enim non in omnibus mecum sentiant; nec tamen suas quoque sententias Cl. attestatoribus probari probe norunt. Cl. censorem systema *Leibnitianum* meamque mentem perspexisse, quis largietur, nisi eum candore omni destitutum affirmari velit? Contrarium patet ex iis, quæ ante dicta sunt. A modestia illa, qua usus est Cl. censor, liberet me Dominus! Me in Commentatione annisum fuisse, ut tuerer systematis mei veritatem non inficior: sed me *Leibnitianas* hypotheses naturali & revelatæ religioni noxias in crustasse, pro criminatione Cl. censoris repetita vi superiorum declaro. Dogma de potestate & regimine animæ in corpus me in præfatione Metaphysicæ pro tanto errore habere, per quem immortalitas animæ cum præcipuis religionis capitibus concidat, nego & pernego. De integro systemate influxus *Aristotelico* sermo est, & quæ de immortalitate animæ dicuntur, locum habent quoad partem ejus priorem, ubi anima instar essentiae nudis potentiis seu facultatibus dotata considerata opus habet vi externa corporis, ut ad agendum exciteretur. For-

Forſan autem Rev. atteſtatores huic ſententiæ non ſubſcribunt: neque enim neceſſe eſt, ut theologus ullum in philoſophia receptum ſyſtema explicandi commercium inter mentem & corpus recipiat, contentus veritate iſtius commercii, quatenus a poſteriori conſtat, quemadmodum nec philoſophus in philoſophia practica ullius rationem habet. Unde obiter moneo, injuriam mihi fieri a Cl. cenſore haud levem, quando ad harmoniam præſtabilitam *Leibnitii* trahit, quæ ego de principiis Metaphyſicæ in genere eorumque in ceteris diſciplinis uſu diſſerui. Si a doct̃rina mea quædam provenire ſcandala, illorum culpa factum eſt, qui cum Cl. cenſore dogmata mea pervertunt & ſenſum a mente mea maxime alienum iis ſdem aſſingunt. Spero itaque, Viros egregios, poſtquam cum attentione præſens monitum ad Commentationem de nexu rerum ſapiente adjectum perlegerint, tandem veritati ad oculum demonſtratæ locum relicturos atque ingenuè conſeſſuros, me ab erroribus ob non ſatis intellectam mentem meam mihi imputatis immunem eſſe. Deus nos omnes confirmet in veritate faxitque, ut gloriæ ipſius ac pietati infuſatæ ſtudeamus!

F I N I S.



